



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.


About Google Book Search


Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>



*Leabhar nan sonn, gearr-aithris
air curaidhean na Craoibhe ruaidhe*

Alexander Fraser





2894 . e . 4

LEABHAR NAN SONN

GEARR-AITHRIS

AIR

CURAIIDHEAN NA CRAOIBHE RUAIIDHE

IS AIR

DIULANAICH IOMRAITEACH

LA AN DIUGH

LE

ALASDAIR FRISEAL



TORONTO

CLO-BHUAILTE LE UILLEAM BRIGGS

1897



FACAL DO'N LEUGHADAIR.

THA na sgriobhaidhean a leanas air an tairgse do Ghaidheil Chanada le dochas gu 'm buin iad gu caoimhneal riutha.

Chaidh an cur ri cheile an toiseach airson paipeir-naigheachd, agus air do'n chlo a bhi air a shuidheachadh aig an am, gu cabhagach, tha 'n litreachadh a' nochdadh mhearachd ann an iomadh aite—ni a tha ro mhinic a' tachairt gu mi-leas cainnt ar mathar.


Bho'n am 'san deachaidh an cur a mach an toiseach chaochail dithis de na daoine air a' bheil iomradh 'san leabhar. Cha 'n 'eil Eachan Mac-Illeathain ni 's mo; 's tha 'm fòd air fàs uaine thar uaigh Shiorraim Mhic-Eallair, ach tha ainm gach aon diubh cubhraidh do na Gaidheil, agus bithidh an cliu buan.

“ Ach ni 'n searg 'ur cuimhne mar lus,
Fheara bu mhor tlus agus bàigh ;
Mar sholus gu aimsir an céin,
Triallaidh 'ur sgeula 's an dàn.”

TORONTO, *An Dudhlachd*, 1896.

CLAR-INNIS.

Do'n Leughadair	-	-	-	-	-	-	-	iii
Duain Ultach	-	-	-	-	-	-	-	7
" Duan a' Ghairbh	-	-	-	-	-	-	-	9
" Na Cinn	-	-	-	-	-	-	-	17
" Deirdri	-	-	-	-	-	-	-	25
" Fraoch Mac-Fithich	-	-	-	-	-	-	-	34
Am Bard MacColla	-	-	-	-	-	-	-	35
Siorram MacEalair	-	-	-	-	-	-	-	67
Daibhidh Speinse	-	-	-	-	-	-	-	76
Domhnall Catanach	-	-	-	-	-	-	-	84
Ceilidh Ann an Canada	-	-	-	-	-	-	-	97
Feasgar Sabaid 's a Ghaidhealtachd	-	-	-	-	-	-	-	110



EACHAN MACÌLLEATHAIN.

DUAIN ULTAGH.

“ 'S ann a'n Ile bhoidheach a rugadh mi 's a thogadh mi,
S ann an Ile bhoidheach a rugadh mi 's a bha mi riamh.”

THA eilean uain' Ile iomraiteach am measg eileanan na Gaidhealtachd, cha 'n ann amhain airson a mhachraichean torach 'sa raointean cluaineach, ach mar an ceudna, 's gu sonraichte, airson nan-daoine foghainteach, foghlumte a thug e do'n Ghaidhealtachd, 's do 'n t-saoghal. Bithidh cuimhne air Iain Og Ile, am fad 's is urrainnear “Leabhar na Feinne,” nosgeulachdan na Gaidhealtachd a' leughadh; bho Ile thainig Foclair mhic Ailpein, leabhar air am bheil seula ard-foghlum: thug Ile dhuinn Mr. Niall MacNeill, ollamh ionnsaichte Lunain; agus a bhrathair Iain, a sgrìobh iomadsreath ann an Gaidhlig ghlan dhuthchasach; thogadh ann an Ile, Iain Mac Mhurachaidh (Murdoch) an sar-Ghaidheal, a thug seachad fallas a ghruaidhe agus neart a chinn gu bhi leasachadh crannchur 's gu bhi dìon coirichean a luchd duthcha bho tharcuis agus ana-dheanadas nan uachdaran; tha Daibhidh Speinse againn fein ann an Canada, ach dhearrsaich solus na greine an toiseach air ann an Torradh 's an eilean Ileach. Tha a bhuadhan inntinn, us ard-fhoghlum aithnichte air feadh na duthcha, agus mar Ghaidheal deas, dileas, tha e seasamh ceann us guailean tharseanairean a luchd-duthcha. Ach 's an'

la an diugh cha 'n 'eil mac cluìteach aig Ile co-ionnan ri Eachan MacIlleathain, maighstir-sgoil aig Baile-Ghrannnd, mu lethslighe eadar ceann Loch-an-Dail agus Port-Ascaig. Tha iomadh bliadhna a nis o'n rugadh Mr. MacIlleathain. Tha e suas ann an aois, ach tha a shuill fathast geur agus a bhreathnachadh gun mheirg gun fhailneachadh. Mar dhearbhadh air 'sin, tha e an deigh leabhar luachmhor a chur am mach do dhuain Ultach, le mineachadh foghlumte a bheir soilleireachd air cuid do phuingean dorcha seann eachdraidh na h-Eirionn, 's a chuidicheas iadsan a tha ag sireadh eolais air ceann toiseach cuid do na h-ursgeulan Gaidhealach. 'S fhada bho 'n a thoisich MacIlleathain air saothrachadh anns na raointean farsuing so. Bha a lamh ri faicinn gu soilleir anns a cho-chruinneachadh do sgeulachdan a chaidh a chlo-bhualadh fo aimn agus aig cosdas Iain Oig Ile. Bha e 'na sgriobhadair deas, comasach air cuspairean a bhuineadh do chinneadh, eachdraidh agus canain nan Gaidheal, re moran bhliadhnachan agus is iomadh paipeir-naigheachd a thug aite do dh'obair a phinn. Tha e air a mheas le daoine ionnsuichte a bhi 'na shar-oileanach, 'na dhuine air leth foghlumte agus lan-chomasach air a chuid eolais a chur gus a bhuil is airde. Tha am beachd so air a dhaingneachadh gu tur leis an leabhar ur a tha a nis air tighinn bho 'laimh. Is airidh e air aite ard am measg leabhraichean Gaidhlig ar latha-ne; faodaidh e a bhi air a chur taobh ri taobh ri obair Dhoctair Chamshroin, nach mairean, a bha ann an eilean Arrain agus cliu ni 's mo na sin bhitheadh eduilich a dhioladh do leabhar sam bith is aithne dhuinn. Tha seachd duain air am faotainn anns an leabhar,—Duan A' Ghairbh Mhic Stairn, Na Cinn, Cuchulainn 'n a

Charbad, Deirdri, Caoidh Dheirdri, Fraoch Mac Fithich, agus Conlaoch. Tha iad sin, le eadar theangachadh Beurla, foclair goirid, agus beachdan an ughdair air na duain, air an cur sìos anns an leabhar, agus, mar a thuirtear, tha obair Mhic Illeathain 'n a thabhartas luachmhor do litreachas nan Gaidheal. Tha susbainn cuid de na duain air a thoirt 'n ar briathran fein, mar a leanas:

DUAN A' GHAIKRBH MHIC STAIRN.

'Se ionad iomradh an sgeoil so Teamhra ann an Eirinn. Tha an duan ro shean. Tha daoine foghlumte ann am beachd gu bheil e mun nithean a thachair roimh chogaidhean nan Lochlannach ann an Eirinn, ach cha ruig sinn a leas a bhi ro-chruaidh chinnteach mu 'n am; tha iomadh sgeula, taitneach, brioghail, aig am bheil a bhunnta air fholach as an t-sealladh 's na linntinn a dh'aom. Ann an Talla Theamhra bha Conall, Cuchulainn, Brichean, agus cuid eile do Churaidhean na Craoibhe Ruaidhe, mar a dh' ainmicheadh aireamh thaghta do laoidh na h-Eirionn. 'N uair a bha na laoidh ag cumail cuirm agus ag deanadh aoibhneis air leth an treunalachd agus an comas arm, bha an dorsair ag deanadh faire gu dileas aig taobh am muigh an doruis. Cha b'fhada gus am fac e loingeas ag tighinn thairis air a chuan agus thog e caismeachd mar so:

“ Eirich a Chu na Teamhra,—
Chi mi loingeas tha do-labhradh;—
Lom-lan, nan cuan clannach
Do loingeas mor nan allmharach !”

Bha Conall subhach le teas na cuirme; cha b'e upraid no cogadh a bha 'n a bheachd agus ann am briathran

frionasach mhaoidh e air an dorsair ag radh nach bu naimhdean ach luchd-cuideachaidh a bha 's an t-sealladh. Cha b' fhada gus an do thog an dorsair caismeachd eile, ach a nis 's ann a bha aige ri innseadh gu'n robh curaidh mor, lan armaichte, aig an dorus, a bha 'toirt dulan do laoich Eirinn air fad, 's ag radh gu'n robh e comasach air an cur uile gu leir fo chis. Cha robh cluiche a b' fhearr leis na seoid na strith de'n t-seorsa 'so agus dh' eirich iad gu dealasach gu bhi a'm b' an fhiraig an robh an danadas an cur gu dulan.

“Chuige mise,” arsa Cu-riodh,
Araon agus O'Conchair,
Fear-dian taoibh ghil,
'S Fraoch fial Mac Fiuighaidh,
Aodh MacGaradh a' ghluinghil,
'S Caoilte ro-gheal Mac-Rouain.

Ach bhac an dorsair iad. Bha e 'n a chomhairliche glic. B' e An Garbh Mac Stairn a bh'aig an dorus agus b' aithne dha ni-eigin do neart a ghaigich sin. Ars' esan :

“Chonnaire mise coig catha deng
Do dh' fhamhairibh as ni 'm breug
Breth air a' Gharbh as Tir shoir,
Am Maoigh gallan nan comhrag.”

B' e Conall aon do na gaisgich a bu chliutaiche am measg churaidhean na h-Eirionn. B' a nm da, Conall Cearnach, a' ciallachadh duine a bha buadhmhor neogathach ri aodan cunnairt no Catha. Mhol na baird e mar “Sonn catha na claoin Teamhrach.” Ach 'n uair a chual' e ainm Mhic Stairn ann am buil an dorsair dh' fhan e air ais 's an Talla Bha caoin ghuth maighdinn an Talla, d'am b' ainm Maobh, Inghean Ochaidh, fath na

Feinne, mar an ceudna an aghaidh na comhraig. “Na leigidh oglach nan cath” ars’ ise, “Staigh do thaigh Teamhra nan righ-fhlath.” Dhuaisg a briathran “oglach nan cath,” inntinn Chonaill, oir b’ fhear cogaidh e eadar chnaimh ’us chraicionn, agus cha leigeadh an tamailt leis an Garbh a chumail an mach ni b’fbaide. Ghrad dh’ fhosgladh an sin an dorus agus shuidh Garbh sìos gu bidh a chum a neartachadh agus urachadh mus toisich-eadh a choimhstri. .

Chaidh aite trì cheud fear a reiteachadh air a shon agus chuireadh biadh agus deoch airson coig fichead duine fa chomhair an fhir mhoir. Bha na curaidhean ag amharc le iognadh mar a bha an gaisgeach a’ cur casgadh air ’ocras. Dh’ eirich Cuchulain a dh’ aon taoibh agus thog e a sgiath, bha suil Naois an deigh a dha shleagh agus ghlac Conall Cearnach a chlaidheamh. ’N uair a sheall An Garbh mu’n cuairt air bha caogad mac righ mu thimchioll. Thoisich na daoine air labhairt ri cheile. Ged a thainig An Garbh d’ an ionnsuidh mar namhaid thug iad lan “Chothram na Feinne” dha. B’ e Brichdean a cheud neach a labhair. Ars’ e, ann am briathran seimh: “Fearas ’s faoilte dhuit gun fheall, am fianuis fearaibh Eireann!” Thaitinn na briathran ri Conall an t-Ard Righ, agus thug e misneachd do Bhrichdean a’ dhol air aghairt. Ag tionndadh gus A’ Gharbh dh’ ainmich Brichdean dha aon an deigh aon do laoich na h-Eirionn leis am faodadh e cogadh a’ dheanadh. Mhol e am buadhan ’s an gaisge. Chuir e suas iad mar dhaoine dearbhta a b’ iomchaidh air cath a chur leis A’ Gharbh. Cha do mheas an “Treun-fhear” iad a bhi airidh air an urram sin, oir cha bu bheag an ni anns na laithean sud strith a dheanadh le gaisgeach cho ainmeil

ris A' Gharbh. Bha mic an Rìgh suas ris na h-uile cleas ann an cleachdadh arm agus thugadh iadsan am mach am fianuis A' Ghairbh. Cha mho a ghabh e riu-san. Bha aon duine aiumeil agus treun thar gach neach eile ann an Eirinn agus b' ann le buaidh airsan a b' aill leis a bhi cosnadh cliu. B' e sin Cuchulainn. Labhair e :

“ Bheireamsa briathar rìgh ann,
Fhearaibh aille na h-Eireann ;
Nach teid mi fein ann am luing,
'S mi gun gheill o Chuchulainn.”

Dh' eisd Cuchulainn ris gun gheilt. Bha a sgiath air a togail os aird, agus bha e dian-dheas airson na coimhstri. Bu rìgh e fein agus thilg e air ais gu h-uailleach briathran a choigrich.

“ Bheireamsa (ars' esan) briathar rìgh eile,
Nach toir thu mo gheills' air muir
'S mi fein ann a' m' bheatha.”

Thoisich e an sin air caineadh, 's air di-moladh A' Ghairbh:—“ 'S bodach thu bhuidheann udlaidh, 's olc thu fein, 's olc do mhuintir,” 'chum a ghuineadh gu geur fhearg 's gu cuthach-cath. Thainig iad gun dail gu cruaidh bhuillean. B' ann an sin 'bha 'chomhrag. Bha claidheamh ri claidheamh a' cluiche ann am mire-chath. Bha an talamh air chrith. Bha fuaim nam buill-ean air a ghiulan leis a ghaoith bho ghleann gu gleann, 's air a thilgeadh air ais gu larach a chogaidh le mac-talla nam beann. Re sheachd la chog na laoiach, gus nach “ b' airde An Garbh air a' mhaoigh, na Cuchulainn, a'n gaisge.” Cha robh a lethid riamh ri aithris ann an Eirinn. B' iomadh gnìomh gaisge air an robh iomradh ann an ursgeulan nan seanachaidh, ach thug comhrag Chuchulainn agus A' Ghairbh barr-

achd orra uile. Bha an da ghaisgeach gu math a reir a cheile. Bha An Garbh, laidir, treun agus ro-ealanta. Bha Cuchulain cleasanta, sgiobalta, agus neartmhor. Cha 'n fhaca namh riamh cul a h-aon diubh. Bha iad mar leoghain ann an neart, ann an cridhe 's ann an togradh. Cia mar a chrìochnaiceadh a chuis, cha b' urrainn daibhsan a bha 'g amharc orra, innseadh, oir bha iad co-ionann ann am buadhan ; bha gach neach diubh ag cumail suas a chliu. Air an t-seachdamh la chaidh am fortan le Cuchulain. Le aon bheum cuimseach sgoilt e sgiath A' Ghairbh 'n a da bhloids agus dh' fhag e gun dion e. Bha An Garbh a nis ann an dearbh chunnart, ach thuirt e ri Cuchulainn nach geilleadh e 's nach tionndadh e troidh fhad 's a bhitheadh e ann am beatha. Bha cridhe mor cho math ri gairdean laidir aig Cuchulain agus thilg e a sgiath uaithe air an fhaiche. Shaoileadh le maithibh na h-Eireann gu 'n robh so tuille 's a choir a' dheanadh airson coigrich a thainig gus an cur fo chis. Ach cha chromadh inntinn ard Chuchulain cho iosal 's gu 'n gabhadh e ana-cothram air neach sam bith ann an strith. An deigh do' n chath toiseachadh a ris cha robh a chrìoch fad' ann an amharus. Chog Cuchulain le ealantas fìor ghaisgich agus le aon bheum sgar e ceann A' Ghairbh bho cholainn. 'N uair a shìolaidh follach nan laoch, chuir Conall failte air a Bhuaidh-fhear, a' toirt dha a "cheud chorn" ann am fianuis fearaibh Eireann. Fhreagair Cuchulain ann am briathran an duain mar so :

" Rinn mise gnìomh air Giolla nan Cuan,—
 Creideadh an rìgh mar is dual ;—
 Tha leaba aon laoidh 'n so, a bh' air Cuan,
 Tha 'n diugh gun aiseag le iomairt aluaigh,

A thriall gu taigh Teamhra nan righ-fhlath
Ghabhail geill air fearaibh Eireann."

Is e sin suim Duain A' Ghairbh Mhic Stairn, gun dad a leudachadh air briathran a bhaird. An toiseach tha caisneachd an Dorsair agus freagairt fheargach Chon-aill; an sin tha An Garbh aig an dorus agus tha na laoi ch aigeannach air am bacadh leis an Dorsair o dhol a' m bad a choigrich; an deigh earail bho Mhaobh, Ingh-ean Ocbaidh, flath na Feinne, thugadh aite agus aoidheachd do'n Gharbh ann an talla Theamhra; thagh e Cuchulainn am mach bho churaidhean na h-Eirionn air fad agus chuir iad cath a bhunaich re sheachd laithean agus a chrìochnaich le buaidh do Chuchulainn.

A reir an duain bha na daoine so am measg laoi ch na h-Eirionn aig an am:—Conall Cearnach aon do na righrean, Cu-riodh agus Lugha a mbac, Fiabhaidh Mac-Ghoraidh, Fraoch MacFìughaidh, Aodh MacGharadh, Caoilte MacRonan, O' Conclair, Brichean, Luagha, Cormaig, Buinne agus Naois. Tha cuid de na h-ainmean sin coitichionn anns a Ghaidhealtachd, 's gu sonraichte ann an Eirinn gus an latha an diugh, agus tha an duan a nochdadh gu 'm bheil iad sean le aois iomadh ceud bliadhna.

Tha e air aithris gu'n d' thainig An Garbh as an Esraidh, ainm a tha air a sgrìobhadh ann an aite eile, "Essa-Roimh" ag ciallachadh, a reir beachd Mhr Mhic-Illeathain, "Eas na Roimh." Ann an rann do'n duan so mar a tha e air a chur sìos le Mac-an-Leisdeir, tha e air a radh gu'n d' thainig e o'n "Ghreig uamharaich ro ghairg," ach cha thuigte bho 'ainm gu'n robh e bho'n Roimh no bho'n Ghreig. Tha ainm Gaidhlig aige, agus 's e 's coltaiche gu'm bu Ghaidheal e a b'urrainn Gaidhlig

na h-Eirionn a' labhairt. Ach air an lamh eile, ma's fìor an seanachaidh agus am bard tha eachdraidh Chuchulain aithnichte o bhreith gu bhas. B'e Cuchulain an "sonn deas," leis am bu taitneach "sgeul na h-aimsir a dh' fhalbh." Tha ainm ag tachairt oirnn gu tric ann an sean sgeulachdan na h-Eirionn. Tha e coltach gu'n robh tuille a's aon ainm air agus gu'n do lean an t-ainm "Cuchulain" ris bho ghnìomh gaisge a rinn e 'n uair a bha e 'n a bhalachan og. Tha Mr. Mac-Illeathain ag ath-aithris sgeul air a phuing so, bho *Leabhar na h Uidhre*. Tha ainm an leabhair so ag ciallachadh, *Leabhar na Mairt Odhair*, a chionn gu'n robh e air a chomhdach le craicinn Mairt Odhair. Mar a tha an sgeul a' dol, b'e ceud ainm Chuchulain, "Setanta." Bha gobhain iomraideach aig sliabh Cuilinn d'am b' ainm Culand, a thainig gus an luchairt aig Eamhain a' thoirt cuireadh do'n rìgh, Conor Mac Nessa agus Curaidhean na Craoibhe Ruaidhe gu feisd. Bha Setanta aig an luchairt aig an am agus fhuair esan cuireadh mar an ceudna, ach 'n uair a' dh'fhalbh a chuideachd, dh' fhan e 'n an deigh gu crìoch a chur air cluiche chamanachd ris an robh e maille ri chompanaich. Anns an fheasgair lean e cach agus bha e fadalach mu'n d'rainig e gu taigh Chulaind. 'N uair e dh' fheuch e ri dol a staigh, bha e air a bhacadh le cu mor a chum an gobhain gu bh'i dìon a thealaich re na h-oidhche. Leuma' bheisd fhiathaich air gu grad agus thoisich i air a reubadh, ach bha an gille beag tapaidh agus bhual e air a chu gu gaisgeach. Rinn an t-sabaid mor fhuaim air chors' gu'n cuala na h-aoidh ean a bh'aig an fheisd e. Ghrad dh'eirich an gobhain o'n bhord 's fheoraich e an robh aon sam bith do 'n chuideachd air fhagail air dheireadh, ma bha, gu'n rachadh

e gu cruaidh leis, oir ars' esan chad' thainig duine riamb thun an taigh m'oidhche gun a bhi air a reubadh leis a chu. An sin chuimhnich an righ mar a gheall Setanta a leantuinn agus air ball ruith Fearghus Mac Roigh agus feadhain eile do na h-aoidhean am mach gu 'shaoradh: ach 'n uair a rainig iad an t-aite chunnaic iad an sar-ghaisgeach og a' seasamb os-cionn colainn a choin a bha 'cheana marbh. Thog Fearghus an gille, gu h-auibhneach, air a ghuailibh, ghiulan e do'n talla e anns an robh a chuir m' s chuir e air an urlar e am fianuis an righ agus na cuideachd, a ghabh ris le mor shubhachas. Air do Chuland a chuimhneachadh gu'n robh a dheagh chu, dileas, marbh, thuit e air caoidh call a choin, a bha cho feunail dha a' dhion a thaighean 'sa threudan. Sheas Setanta suas agus thuirt e gu'm faigheadh esan air a shon culain do'n aon seorsa ris a chu a bha marbh ma bha aon ri fhaotainn ann an Eirinn, eadar Tonn Tuath 's an airde tuath agus Tonn Chliona 's an taobh deas; agus thairg e mar an ceudna curam a ghabhail do'n taigh m' oidhche gus am fasadh an culan mor guleoir airson na h-obair. Bha Cathad, druidh an righ, a'n lathair agus dh' iarr e gu'm biodh ainm a ghille air atharrachadh o Setanta gu "Cu-Chulaind,"—an cu aig Culand, agus thuirt e gu'm biodh am balach iomraideach fo'n ainm ur troimh nan ginealaichean ri teachd 's gu'm biodh ainm agus adheagh-chliu beo gucriochant-saoghail am measg dhaoine na h-Eirionn agus na h-Alba. Bho so lean an t-ainm "Cuchulain" ris.

Anns na h-ama sud bha am facal "Cu" ag ciallachadh "righ," agus tha cuid do'n bheachd gur e briogh an ainm "Cu-chulain," righ Sliabh Chuilinn, oir bha Cuchulain 'n a righ gun teagamh sam bith.

A rithist, anns an duan "Na Cinn," tha e air a radh gu'm b'e Cuchulain dalt Chonaill Chearnaich, ach ann an duan eile, "Suiridh Eimhir" 's e Conall a bu dhalta do Chuchulain. Phos Cuchulain Eimhir nighean Fhorgall Seolta, mac peathar do Theathra righ nam Formorianaich. Fathast, ann an duan eile, "Cuchulain 'n a Charbad" tha Cuchulain air ainmeachadh mar mhac Sheimh-suailti, mhic Aodh, mhic Agh, mhic Aodh. Ann an Suiridh Eimhir tha am bard a toirt cunntas air spors nan gaisgeach:—Bha ceannaird-carbad nan Uladh ag cluich aig luchairt Eamhuin. Bha iad ag cur chleasan leis an t-sleagh, a chlaidheamh, agus ag deanadh gnìomh na h-ubhal. Bha ann an sin:—Conall Cearnach, Fearghus mac Roigh, Loghaire, Celtchar, Dubhthach, Cuchulain mac Seimh-suailti, agus Scel an sgeulaiche iomraideach. Thug Cuchulain barr orra uile anns na cleasan agus na gnìomharan treun a rinn na laoiach agus bha goal aig na maighdeanan air airson luthmhoireachd a laimh, luathas a ghearra leim, mìlseachd a chainnt, agus airson ailleachd a ghnùis.

NA CINN.

Tha e air a chreidsinn le daoine foghlumte ar la-ne gu'm buin an duan so do'n chuairt-uine is aosmhoire do sheann eachdraidh na h-Eirionn air am bheil aithris ann an litreachas na duthcha sin. Tha an duanaiche ag cur air eachdraidh mar a rinn Conall Cearnach dìoghaltas air naimhdean Chuchulain, a chuire gu bas. Tha e coltach gu'n robh moran sluaigh mu bhas an laoiach, oir 'n uair a chuala Conall mar a thachair bhoidich e fein agus caraid eile gu'n cuireadh iad na ceudan gu bas; gu'n "lìonadh iad gad cho fad 's a bha 'san duthaich do chinn mac Rìgh a dhioladh eiric Chuchulain," agus mar a bha

Conall g'am marbhadh bha a charaid "g'an cur air a ghad." Anns an leabhar "Dan Gaisge" leis na braithrean Mic Chaluim, tha iomradh air bas Chuchulain mar so: "An uair a chaidh Cuchulain a leon, thuirt e ris a ghill' a bh'aige, dol gu Conall, is innseadh dha gu'n do thog a dhalta taigh ur. Dh'fheoraich Conall dheth, Ciod an airde, am fad agus an leud a bha 's an taigh? Thuirt an gille, 'n uair a laidheadh e, gu'm biodh a shron ri druim an taighe agus cul a chinn ris an urlar; 's an uair a shineadh se e fein, gu'm biodh a chasan aig ceann iochdrach, 'sa cheann aig ceann uachdrach an taighe; oir chuir Conall boidean air fein neach sam bith a bheireadh sgeul bais Chuchulain d' a ionnsuidh gu'm marbhadh e an neach sin. 'N uair a chuala Conall an sgeul so, thuirt e gu 'robh a dhalta marbh; ach chuir an teachdaire fhianuis air fein, nach esan a thug sgeul a bhais dha. Tha an duan ri fhaotainn ann an caochladh leabhraichean agus co-chruinneachaidh do sheann sgeulachdan agus bhardachd air atharrachadh ann an cuid do nithean beaga, ach a co-chordadh air fad ann am brigh. Is ann bho Leabhar na h-Uidhre a thug Mr. MacIlleathain an Duan agus tha e'toiseachadh mar so:—

EIMHIR.

"A Chonaill, cha sealbh na Cinn—
Deimhin leam gur dheargas t-airm;—
Na cinn do chitheam air a ghad,
Sloinntear leat na fir fo 'm faoibh."

CONALL.

"A nighean Fhorghaill nan each—
A Eimhir oig nam brigh binn;
'S ann an eirig chon nan cleas,
Thugas leam a nios na cinn."

Tha Conall ag innseadh do Eimhir, banntrach Chuchulain, mar a ghabh e dioghaltas air luchd marbhaidh a ceile agus ag freagairt nan ceistean a tha i ag cur air nu ainmean nan daoine d'am buineadh na cinn a thug e d' a h-ionnsuidh air a ghad. Ceann an deigh ceann dh' ainmich e dhi gus an do sgithich i do'n sgeul agus dh' fhaighnich i :—

“ A Chonaill mhoir, mugh an sgeul—
Creud a thuit, le d' laimh, gun lochd,
Do 'n t-sluagh eagnuidhthe a bheil 'n sin,
'An dioghaltas cinn a' chon ? ”

• Fhreagair Conall :—

“ Deichnear is seachd fichead ceud—
Deiream pein is aireamh sloigh—
Do thuit leamsa druim air dhruim,
Do nimh mo chuileg cunnla, rag.”

Ach cha do leighis an dioghaltas so creuchd-cridhe Eimhir agus dh' iarr i bas 'us adhlac ri taobh a Choin :

“ A Chonaill tog mi 's an fheart,”—
Tog mo leachd os leachd a' chon
Os d'a chumhadh rachainn eug,—
Cuir mo bheul ri beul a' chon.”

“ Is mi Eimhir a' s caoine dealbh—
Ni faighinn searbh dhioltadh dhomh,
Do dheur no chan 'eil mo speis,—
Truagh m' fhuireach air eis a Chon.”

Mar so tha an duan ag criochnachadh, a leigeil ris dhuinn nach eil riarachadh ri fhaotainn ann an dioghaltas, air cho coimhlionta 's am faod e a bhith. Bha e na chleachdadh aig na Gaidheil, eadhon ri linn Chuchulain, gu 'm biodh oidean a' togail dhaltan. B' e Conall oide Chuchulain a reir cuid do na duain agus sheas e le fìor dhilseachd ri thaobh ann an cunart agus dhiole a bhas, mar a chunnaic sinn ann an “ Duan nan Ceann,” ged

a chosd sin dha beatha a bhrathrean ceile fein ; agus
chi sinn gu'n do sheas Cuchulain cuis Chonaill 'n uair a
bha esan ann an amhghar, fo gheimhlibh Chonlaoich a
mharbh Cuchulain le cleas na Gatha-bhuilg.

CONLAOCH.

Is ainmic ann am bardachd na h-Eirionn a tha sgeul
cho dubhach, goirt, air aithris 's a tha ann an Duan
Chonlaoich. Tha na ceud fhacail, leis am bheil an duan
ag toiseachadh, ag toirt rabhaidh air nadur an sgeoil. 'S
iad so na briathran :—

“ Do chuala mi fad o shean,
Sgeul do bhoineas ri cumha
Is trath dh 'a h-aithris gu trom
Ga ta e mar ainnis oirnn.”

Tha Cuchulain a' tighinn 'n ar fianuis 's an duan so aon
uair eile ; agus ann an da rathad nach eil a chum cliu
an laoch. A reir saobh-eachdraidh, thogadh Cuchulain
ann an Dun Scathaich 's an Eilean Sgiathanach far an
robh taigh foghlum airson cleasan arm. B'e ainm na
mna-teagaisg Scathach agus bha i iomraideach air
feadh Bhreatuinn 'n a linn. A'n so fo theagasg
Scathaich tha e coltach gu'n d'ionnsaich Cuchulain an
lann a chleachdadh agus an sgiath oibreachadh mus
deach e gu Eirinn. Ann an “Suiridh Eimhir” tha e
air innseadh gu'n robh Cuchulain agus Aoise ag cluiche
air euchdan-gaisge agus ag cur chatha. Bhrist Aoise
claidheamh Chuchulain na bhloighdean gus nach robh
e ni b'fhaide na dhorn. A chum a h-aire a thoirt uaithe
fhein, ghlaodh e gu'n robh fear-carbad Aoise, a da each
agus a carbad air tuiteam sìos 's a ghleann 's gu'n do
chailleadh iad. Sheall Aoise suas, agus ghabh Cuchulain
an cothram gus a glacadh. Rug e air a da bhroilleach

agus thilg e thar a ghuallain i, agus ghiulain e i air falbh g' a chuid daoine. An sin leig e air an talamh i agus chuir e a chladheamh ruiste thairis oirre. Ghlaodh ise "Beatha airson beatha, a Chuchulain." "Mo thri dhurachdan domh" ars' esan. "Bithidh iad dhuit mar 'thig iad bho t-anail," fhreagair ise. Dh' iarr Cuchulain gu'n d'thugadh i urras do Scathach gu'm biodh sith eat-orra ; gu'n rachadh i leis an oidhche sin g' a thaigh ; agus gu 'm beireadh i mac dha. B' ann mar sin a thachair. An deigh sin dh' innis Aoise gu'n robh i torrach agus gu'm beireadh i mac. "An ceann seachd bliadhna bho 'n la so cuiridh mi gu Eirinn e" ars' ise, "agus fag thusa ainm air a shon." Thug Cuchulain fainne oir di airson an leinibh agus thuirt e rithe an gille a chur d'a ionnsuidh ann an Eirinn 'n uair a fhreagradh an fhainne a mheoir, agus gu'm b'e Conlaoch an t-ainm a bheireadh i air, 's nach innseadh e ainm, no aite-comhnuidh, no ni' sam bith mu thimchioll fein do neach sam bith ; nach rachadh e am mach a rathad duine sam bith, 's nach diultadh e comhrag a thoirt do dhuine sam bith. Thill Cuchulainn an sin d' a dhuthaich fein. Ann an co-chruinneachadh Mhic Chaluim, tha e air a radh gu'n robh aig Cuchulain leannan ann an Albainn do 'm b' ainm Aoise agus gu'n robh mac aige rithe. Gheall e gu'm pilleadh e d' a h-ionnsuidh 'n uair a gheibheadh e a bhi 'n a Ard cheannfeadhna air armailte na h-Eirionn, agus an sin gu 'm posadh e i. Chuir i Conlaoch gu Dun-Scathaich, an t-aite a b' ainmeile 's an am sin airson foghlum a thoirt seachad do threunlaoich anns gach cluich rioghail adheanadh feumail iad ann an latha a bhlair." Bha Conlaoch air fhoghlum anns gach lu-chleas a b' fhiosrach d' a mhathair air an robh eolas aig Cuchulain ach aon chleas d' am b' ainm

an gath-bolg. 'Nuair a thainig Conlaoch gu aois chuir a mhathair e gu Eirinn, 's chuir i fo bhoidean e nach inn-seadh e co e fein, 's gu'n d'thugadh e athair ceangailte leis d 'a h-ionnsuidh-se. Bha fios aice gu'm biodh coimhstri dheuchainneach ann 's gu marbhadh Cuchulain a mhac leis a ghath-bbolg. B'e so a dioghaltas air Cuchulain airson gu'n d'rinn e a mealladh- B'uamhasach an dioghaltas e ; agus thachair mar a dhealbh i.

Chaidh Conlaoch gu Eirinn. Bha laoich Chlanna Rughruidh air urlar Chaigeimh Uladh, fo Chonchobhar agus Chonall Cearnach. 'N uair a bha iad cruinn air an fhaiche thainig Conlaoch orra, "borb 'n a fhraoch":—

" An curaidh crodha Conlaoch ;
A dh' fhiosnadh m'ar claraibh grinn,
O Dhun-Sgathaich gu h-Eirinn."

No mar a tha leabhar Mhic-Chaluim ag radh:—

" Gu'n d' thainig oirne borb laoch,
An curaidh calma Conlaoch,
Bearta trenna ghnathaicheadh leis
O Dhun-sgathaich gu h-Eirinn."

Thug e faireachadh do na laoich le 'bhi:—

" Buailleadh beum sgeith air an fhaich,"

agus cha 'n fhaca an righ riamh a leithid ann an coig-coigeamh Eirinn. B'e Conall a thainig am mach a thoirt coinneamh do'n choigreach og. Bha 'n strith cruaidh, ach cha do mhair i fada agus a chum ioghnadh na bha 'g amharc orra, cheangail an t-oganach Conall. Ach cha do stad e aig sin. Aon an deigh aon, mar a thigeadh gaisgich Chlann Rughruidh air an adhairt, bha Conlaoch g'an ceangal gus am robh ceudnar aige fo gheimhlibh. Chuir Conchobhar teachdaire an sin gu Cuchulain ag iarraidh furtachd. Tha am bard ag deanadh iomraidh air mar "Ard-righ eagnaigh Uladh." Aig an am bha

e aig “seann dun ceilidh nan Gaidheal,” “Dun-dealgain ghrianach, ghloin.” An uair a chual’ e mar a bha dh-imich e gu Conchobhar, ach tha e coltach gu’n d’rinn e dail, oir thilg Conchobhar air gu’n robh e mall ann a bhi tighinn,—

“As Conall suireach nan steud meara,
A’n cuibhreach, a’s ceuda d’ar sluagh.”

Cha robh Cuchulain ro-thogarrach dol a shabaid ris a ghaisgeach a b’urrainn Conall a cheangal. Bha Conall mi-fhaighidinneach ’s e ’n sas agus ghuidh e air Cuchulain cabhag a dheanadh. Ars’ e fein :—

“Na smaoinich gun dol ’n a aghaidh,
A rìgh nan gorm-lann graineil !
A lamh chruaidh gun laige ri neach,
Smuainich air t-oide a’s e’n cuibhreach.”

Ghluais so Cuchulain agus thainig e ’m fagus agus dh’ fheoraich e

“Fios t’ airm ? Co do dhuthchas ?”

Fhreagair Conlaoch gu’n robh e fo gheasan gun a sgeula innseadh do neach sam bith, ach na’m bitheadh e saor bho bhoidean, nach robh duine ann an Eirinn do’n innseadh e ni bu luaithe na do Chuchulain. B’e ’n cleachdadh “sgeul innseadh mar charaid” no cath a chur, agus o nach b’ urrainn do Chonlaoch a bheulfhosgladh a chionn nam boidean a chuir a mhathair air cha robh ann da ach a chomhrag. Chaidh an strìth gu cruaidh agus fhuair Cuchulain fa-dheireadh gaisgeach a bha cleasanta, tapaidh ann an innleachd catha. ’N uair a chunnaic e nach rachadh aige air buaidh fhaotainn air a’n doigh sam bith eile chleachd Cuchulain an gath-bholg agus lotadh a mhac gus a bhas, oir bha Cuchulain garg ann an comhrag. Bha cleas a ghath-bhuilg ioma-lubach

agus duilich a chleachdadh. Aig am Chuchulain bha e air a ghnathachadh le gaisgich 'n uair a bhiodh iad ann an teannteachd a cogadh le saighdean. Bha Cuchulain air a lionadh le mor speis do'n ghiullau a ghiulain e fein cho treun agus air dha a bhi air a lot gu bas dh'fheor-aich e dheth a rithist sgeul a dhaimhean 's a dhuthcha.

“T' arm a's do shloinneadh gu lom :

Na teirig a dh' fholchainn oirnn.”

Fhreagair Conlaoch mar so agus chaidh a h-uile facal do'n sgeul ghoirt gu cridhe Chuchulain ni bu ghuiniche na ged bu gath-nimhe as a bholg e :

“Is mi Conlaoch mac a' Choin,

Oighre dligheach Dhun-dealgain :—

Is mi'n run dh'fhagas am broinn,

As tu aig Sgathaich ga t' fhoghlum.”

Dh'innis e mar a chuir a mhathair e gu Dun-Sgathaich 's gu Dun-tairbhe a dh'fhoghlum chleas agus gaisge agus gu'n d'ionnsaich e uile chleasan nan oil-thaighean sin ach an gath-bholg amhain. Chum a mhathair an t-eolas so uaithe air chor 's gu'n tuiteadh e le laimh athar agus is e so guidhe dheireannach Chonlaoich

“Thoir mo mhallachd gu m' mhathair,

O's i chairich mi fo gheasaibh ;

'Sa chuir an lathair m'fhuluig,—

A Chuchulain—b'ann le d'chleasaibh.”

Chunnaic Cuchulain an fhainne a dh' fhag e aig Aoise bliadhnachan roimhe sin agus chreid e an sgeul agus thog e caoidh air son a mhic. “ Dh'iath umam ceud cumha ” ars esan, 's e caoidh bas aon mhic le a laimh fein. Eadhon aig an am chraidhteach so bha inntinn cholgarr a Chuchulain a' dol an deigh strith 's a bhlar. Bha da ni ag cur broin air,—gu'n do mharbh e a mhac fein gun

fhios dha ; agus nach b'urrainn d'a mhac, air dha 'bhi marbh, cuideachadh leis an aghaidh a naimhdean. Is iad sin an da smaoin leis am bheil an duan ag crìochnachadh anns na briathran so :

“ Na mairinns' a's Conlaoch slan,
Ag iomairt air chleasa an comhlan ;
Chuireamaid cath formadach, treun,
Air fearaibh Alba agus Eireann.”

Sin agaibh cunntas goirid air Cuchulain, mar a tha e air a dhioghlum bho leabhar Mhr. Mhic Illeathain, 's bho sheann sgeulachdan nan Gaidheal.

Facal, a nis, mu Churaidhean na Craoibhe Ruaidhe. B' i a' Chraobh Ruadh ainm aon do na taighean a bha fo thearmunn luchairt Eamhuin. Bha na Curaidhean a comhnuidh 's an taigh so mar a bhitheas saighdearan 'n ar la-ne ann an daingneachd. Bha an cliu air a sheinn leis na baird agus air a labhairt ann an oraidean nan seanachaidh. Bha iad air am moladh le ard 'us iosal mar laoi ch thapaiddh, threun, aiscionnach agus chumhachdach ann an cath, chiuin, agus mhallda ann an sith. Bha iad air an ionnsachadh 'n an gairm aig taigh na Craoibhe Ruaidhe agus choisinn iad an cliu le'n treunadas. Tha ainm an taighe air a chuimhneachadh fathast anns an fhacal *Creeveroe*, ainm clachain faisg air Armagh.

DEIRDRI.

Tha sgeula Dheirdri air a chur ri cheile le Mr. Mac Illeathain bho sgrìobhaidhean Mhic an Leisdeir agus an Ollaimh urramaich, Doctair Irvine a bh'ann an Dun-Challuinn. Bha an sgeula ro-chumanta aon uair 's a Ghaidhealtachd agus bha iomadh samhladh dheth air a' sgrìobhadh. A nis, is docha nach 'eil neach beo is urrainn innseadh. Ann an Leabhar na Feinne, tha Iain Og Ile

ag aithris gu'm b'urrainn do chuid do mhuinntir Mhuile an sgeul a ghabhail anns a bhliadhna 1870, agus gu'n do sgriobh an sar-Ghaidheal, Mr. A. Carmicheil e bho aithris seann duine ann am Barradh, d'am b' ainm Mac Neill, 's a bhliadhna 1871. Ach tha na seann daoine aig an robh na h-ursgeulan 's na duain a bhuineas do na linntinn cein, a' falbh, gus nach 'eil moran diubh air am fagail. Tha leabhraichean, a nis, a gabhail aite an t-seanachaidh, agus sgriobhaidhean aite na cuimhne. An aite na teangaidh bheo, na gnuis laiste agus na impidheachd a tha 'n comas a' ghuth a' bhrosnachadh ann an iuntinn daoine, feumaidh sinn cur suas leis an duilleig mharbh air am bheil na sgeulachdan clo-bhuailte.

Tha roimh-radh goirid air duan Dheirdri a tha Mr. Mac Illeathain ag tionndadh gu Gaidhlig Albanach an la'n diugh air an doigh so:—Air bhith do rìgh Eireann, Conchar, a' dol a phosadh ban-rìgh d' am b' ainm Deirdri, agus ag ullachadh air son na bainnse, mharbh iad laogh og. Bha sneachd air ur-chur 'n a laidhe air a ghrunnd 's an am. Dhoirt iad fuil an laogh a muigh air an t-sneachda agus laidh fitheach air an fhuil. Bha Deirdri a' sealltuinn a mach air uinneig aig an am. Chunnaic i 'm fitheach ag ol na fola, agus thuirt i ris an rìgh:—"Nach bu mhaiseach an duine aig am bitheadh a chneas cho geal ris an t-sneachda, a ghruaidh cho dearg ris an fhuil, agus fholt cho dubh ris an fhitheach." Fhreagair an rìgh, ag radh gu'n robh clann peathar aige-san, agus gu'n robh a h-aon diubh air an robh gach buaidh a dh' ainmich i. Thubhairt Deirdri ris an rìgh, a rithist. nach cuireadh i cos 'n a leabaidh gus am faiceadh i an duine sin. Air an aobhar sin chuir an rìgh fios air. Thainig e fein agus a dha

bhrathair. B'e an ainmeanan Naois, Aille and Ardan. Air do Dheirdri Naois fhaicinn lionadh i le gaol dha, ionnas gu'n d'fhalbh i leis, agus dh' fhag i an righ. Dh' fhalbh Naois agus a dha bhrathair air luing, agus sheol iad gus an deachaidh iad air tir aig Beinn Aird. Agus bha giolla beag 'n an cuideachd d' am b' ainm an Gille Dubh, a bha na chomh-dhalta dhaibh, agus a' feitheamh orra :

Bho so tha an duan a' fosgladh.

Dh' fhag na braithrean Deirdri agus an Gille Dubh a'm Beinn Aird (ann an Earra-Ghaidheal, a reir beachd chuid) agus dh' fhalbh iad air turus gu duthaich Mhic Rosnaich, "ceann fear Fail " An sin, thoisich an Gille Dubh air gaol a dheanadh ri Deirdri. Dh' fhiach e ri 'cosnadh le nithean maith airson a buird. Tha e coltach nach robh baird nan amana sud oscionn a bhi buaireadh ghruagaichean le pailteas de stòras ni 's mo na tha baird ar latha fein. Tha eadhon an sar bhard Douncha Ban, a' cluiche air teudan a chridhe mar so :—

" 'S e'm fath mu'n biodh tu talach orm,
Gur ro-bheag leat mo stòras ;

* * * * *

'S nis nam faighinn mar rium thu,
Cha leanainn air an t-seol sin ;
Dheanainn aiteach fearainn,
A's crodh-bainne chur mu chro dhuit ;
Mharbhainn iasg na mara dhuit,
'S am fiadh 's a bhealach cheothar,
Le gunna caol nach mearachdaich,
'S a mhealladh fear na croice."

Cha robh an Gille Dubh, dh' fhaoidte, cho briathrach, fil-eanta, achcha 'n'eil teagamh nach d'rinn maise Dheirdri a dhu-loggadh le gaol, agus rinn e "dur shuiridh" rithe

Thoisich e gu foil. “Bu chuibhte orm a 's ort bhith cuid-eachd,” ach air dha a bhi air a dhiultadh gu grad, dh' fhas e dian 'na thagradh agus gheall e nach biodh uir-easbhaidh oirre do reamhrachd na duthcha :—

“Gheibheadh thusa, Dheirdri ghuanach
Bhuamsa air mhaduinn a maireach,—
Gheibheadh tu bainne 'chruidh chraobhaich
Agus maorach a Innis-aonaich.

“Gheibheadh tu muinealan mhuc,
Mar sin agus sruthaga sheann-tuire ;
Gheibheadh tu braoideach as bo,—
'S a laoi gh mhin na fuilinn a'n so.”

Ach cha bhiodh Deirdri air a mealladh bho a gradh le geallaidhean no le geur-ghuidhe a Ghille-Dhuibh. B'e 'freagairt :—

“Ged gheibhinn uait caolaich fhiadha,
Agus bradain bhroinne gheala,
B' annsa leam bior-chul-chas
A laimh Naois Mhic Uisneachan.”

“B'e Naois a phogadh mo bheul,—
Mo cheud fhear 's mo cheud leannan ;
B'e Aille leigeadh mo dheoch,
'S b' e Ardan a chaireadh m' adhart.”

Chaidh Deirdri gu mullach beinne a bha faisg air a taigh-comhnuidh agus sheall i thairis air a chuan airson bata chlann Uisneachan. Chunnaic i iad air an lear. Bha Ard 'us Aille air an stiuir agus Naois 'g an cuid-eachadh. Dh' earalaich i an Gille Dubh gun smid a' radh ris na braithrean mu dheighinn a ghaoil air an do labhair e rithe-se air eagal gu'm marbhadh iad e gun chionnt, 's nach creideadh iad gu'n robh ise neo-chionntach. Thainig Clann Uisneachan air tir agus dh'fheor-aich Deirdri dhiubh ciod a chum cho fada iad air falbh bhuaiphe-se. Dh' innis iad d'i sgeul an turuis. Bha iad

air an glacadh le Mac Rosnaich an rìgh “ceann fear Fail,” agus air an cur fo gheimhlibh. Bha duil aig Deirdri nach robh gaisgich air an t-saoghal cho cumhachdach ri Naois, Ardan 'us Aille, agus cha do thaitinn an naigheachd so rithe. A reir gnaths an linn sud bha armachd air a cumail suas maraon do na prìomh bheusan agus b'e miann gach duine og a bhi ard-aigheach, cruadalach, agus coimhionta ann an gnìomharan-gaisge. Bha na h-amana buaireasach, doirbh, agus bu tric, gun teagamh, a bhiodh neart 'dolthar ceart, ach bha riaghailt a cheartais a reir is mar a bha i air a tuigsinn, air a dìon gu dìleas agus gu bheòil. Bha lagh onair air aideachadh leis gach duine agus b'fhearr le neach tuiteam 's an strìth na gu'm biodh e fo mhi-chliu. Ma bha cogaidhean agus euchdan-fola cumanta, bha mar an ceudna a bharail gu'n robh onair neo-thruaillidh ni bu luachmhoire na beatha. Cha robh beatha duine cho fiachail ann an suilean nan daoine treuna sud, 's a bha an doigh anns an giulaineadh neach e fein 's a mhachair agus anns a bhlàr. 'N ar latha-ne tha e furasda 'bhi dìteadh nan cleachdaidhean fuilteach a bh' aig ar cein-sinnsearan, agus, da-rìreadh, bu choir duinn meas ard a chur air gnathas-siobhalta an linn 's am bheil sinn beo ; ach 'n uair a smuainicheas sinn gu'n robh iadsan a' cleachdadh le dìlseachd nam modhana, 's nam beusan a b' aithne dhaibh gun solus an t-soisgeil 's gun eolas air slighe a b' fhearr, cìod am fios nach ann bu choir duinn a bhi toirt faineas an t-sail a tha 'n ar suilean fein mus toisich sinn air a bhi spionadh an smuirnein as an suileansan. Tha freagairt Dheirdri a' toirt soluis duinn air na beachdan a bh' aig na seann laòich air seasamhachd ann an cath :—

“C’ aite an robh ’ur n-airm ghaige,
 ’S ’ur lamhan tapaidh fuileach ;
 N’ uair a dh’ fhuillling sibh—sibh fein slan—
 Do Mhac Rosnaich ’bhi ’g ur dìongmhail ?”

’N uair bhrìst Cuchulain sgiath a Ghairbh ’s e thuirt
 Mac Stairn,—

“ . . . aon cheum teichidh, ’n oir na ’n iar,
 Cha tug mi riamh ’s mi ’m’ bheatha.”

Agus tha Ossian MacFhinn ard-fhilidh nan Gaidheal
 ag radh :—

“Theich bhur daoine fein gu narach,
 Cha bhi ’n ainm am feasd ’s na danaibh,
 Oigh cha tig le clar na’n comhail ;
 Na’n teach uaigneach tha iad bronach.”

Bha guth Dheirdri air a thogail, mar gu’m b’ eadh, ann
 am feirg riu airson gu’n do leig iad le Mac Rosnaich an
 glacadh ’s iad beo. Labhair i mar a rinn i, ged ’bha teas
 ghaol oirre airson Naois agus ged ’bha iad air falbh
 bhuaipe la agus bliadhna. Bu mhor an tamailt gu’n do
 cheannsaicheadh iad ; na’n robh iad air am marbhadh
 ann an comhraig, rachadh corranach a sheinn os an cionn
 agus thogadh na baird carraig-chuimhne thairis orra ann
 an duain a bhiodh iomraideach re nan linntean, ach cha
 robh ach eas-urram agus tair ann a bhi air an claidh le
 namhaid.

Fhreagair na braithrean Deirdri gu ciuin, ag gabhail
 an leithsgeil :—

“Cadail gu’n d’ rinn sinn ’n ar long,—
 An triuir bhrathre druim ri druim ;
 M’ am d’ fhairich sinn beud na feall,
 Dh’ iath na se-long-deug umain.”

Thugaibh fainear mar a chronaich i iad. Nach d’ innis
 mi dhuibh, ars’ ise,—

“Nach bu lamh air bhlonaga ban,
 ’S nach bu shurd air cogadh cadail.”

Cha b'ann air sgath an tlachd a fhuair iad o chadal, 's iad air deorachd, a ghabh iad priobadh, fhreagair iad, agus chaidh iad air an agbairt le sgeul an cruadail. Chuir-eadh iad ann an uamha shalach fo'n talamh "far an tigeadh fodhainn an saile, tri naoi uairean gach aon la." Ach bha nighean mhaiseach, throcaireach aig an rìgh agus tha e coltach gu'n d' rinn sgeimh Naois a cridhe a bhuanachadh, oir ghabh i truaghas diu agus thug i dhaibh seicheachan a bh' aig a h-athair, gu 'bhi 'g an dion bho' n uisge. B'e Tiormhail ainm na h-inghein. Chuir a h-athair fios oirre agus dh' innis e dhith gu'n do thairg rìgh Eirinn lan a luinge "do dh' or s do dh' innsridh, 's do dh' ionmhas" 'n an cuireadh e na coigrich am mach air cuan na h-Eirionn gu 'bhi air an sgrìos. Tha e coltach gu'm b' e Conchobhar a thug an tairgse so. Cha robh an rìgh cinnteach a uaignidheachd Thior-mhail agus thug e seamadh cruaidh dhi gun an ni innseadh do neach sam bith. "Cha 'n 'eil ruine nam ban maith" ars' e fein, "Innsidh iad 's a chuil na chluinneas iad." Gheall i, gun mhaille, gu'm biodh an tairgse air a cumail an uaigneas, ag radh gu durachdach :

"Cìod an ruine a bhiodh ann
 Nach innseadh tu do t' aon inghean?
 'S an ruine a gheibhinneas uait,
 Gu'n gleidhinn bliadhna, gu dil,
 Fo bhile mo chiche deise;
 'S an ruine gheibhinn bho dhach,
 Athair ghraidhe! gu'n innsinn duitse."

Leis na briathran so air a bilean, dh'fhalbh i do'n uaimh anns an robh mic Uisneachan air an dunadh suas agus dh'innis i dhaibh mu'n cunart agus ghabh i os laimh an cur fa sgaoil. Dh'fhalbh i, agus chaidh i far an robh an ceard Cluanach a' bualadh ord gobha air innein.

Thuir i gu'n do thuit iuchraichean a h-athar thar bord a luinge. Rinn an ceard tri iuchraichean buadhach di agus leo sin dh'fhuasgail i na glasan leis an robh na braithrean air an ceangal. Dh'iarr iad tri claidhmhean, lon air son choig oidhchean, agus solus ceire a chum 's gu'm bu leir daibh 'an aghaidhean fhaicinn. Mar an ceudna, dh'innis i dhaibh mar a dh' fhaodadh iad long a h-athar a ghlacadh bho 'n fhear mhor a bha 'cumail faire oirre. Dh'imich iad gus an traigh, fhuair iad buaidh air sgioba na luinge agus nan rachadh Tiormhail maille riu gheall iad:—

“ As aon bhean cha teid os do cheann
Ach aon bhean s' an tir a'n teid thu.”

Fhreagair i:—

“ —Fanaidh mi bliadhna air do ghaol,
Agus bliadhna eile chion t-ìomraidh ;—
'N ceann na coigeamh na seathamh bliadhna,
Thig 'g a m' iarraidh 'n sin air m' athair,
'S gleidhidh mise do shith dhuit
Bho rìgh an domhain 's bho Chonchobhair.”

Las fearg Dheirdri 'n an aghaidh a chionn gu 'n d' fhad iad Tiormhal 'n an deigh. A thaobh mar a rinn i an teasraiginn cha 'n iarradh ise a bhi thairis air Tiormhail gu brath. Dh' eighnich i iad gu dol air an ais airson Thiormhail agus ghabh iad an turus a ris agus Deirdri maille riu.

Chunnaic Deirdri ann an aisling gu 'n robh na braithrean air an claidh 's air am marbhadh le Conchobhar, 's bha a gnuis dubhach oir bha speis aice do shaobhchrabhadh a cinnich. Ach cha do dhruigh am brudair air inntinn a companaich 'us chaidh iad air an aghairt gu suilbhreach, gun eagal, air an turus. 'N uair a bhris maduinn a cheud la orra bha tiugh cheo a laidh.

air aghaidh a chuain agus air dha eiridh chunnaic iad gu'n robh iad aig dorus ard-righ Eirinn, eadhon Conchobhar an namhaid. Cha robh dol as dhaibh ach a choinneachadh, ged bha naoi ceud deug sluagh leis. Ach rinn iad geur achmhasan airson sith. Dh'iarr iad air a chuimhneachadh, ged a thug iad uaith a bhean gu'n d'rinn iad iomadh baigh eile dha ; gu'n do chuidich iad e ann an teanntachd mara ; gu'n d'thug iad furtachd dha air faiche Dhun-Dealgain ; gu'n d'thug iad d'a ionnsuidh cinn mhac righ na h-Earra-dheise, 'n uair a chuir Murchadh MacBrian na seachd cathaibh a'm Bienn Eadair. Ach cha 'n fhoghnadh na rinn iad air a shon ; shiab an fhoill ann an cuis Dheirdri air falbh na h-uile comain fo'n robh e dhaibh agus, a nis, cha robh ach dioghaltas 'n a chridhe. Las upraid ann an inntinn Dheirdri mar an ceudna, agus bhrosnaich i Naois gu coimhstri. Ars'i fein :—

“Eirich a Naois 'us glac do chladheamh,
A dheagh mhic an righ a 's glan coimhead ;
Creud fa 'm faigheadh a cholann shuairc,
Ach a mhain aon chuairt do'n anam.”


Bu leoir so gu duine ni bu laige na Naois a chur thiuge agus chaidh clann Uisneachan air tir gu cath a chur an aghaidh Chonchobhair, ach ged 'bha 'n strith dian, cruaidh agus lan-gaisge, ciod an cothram a b' urrainn a bhi aig triuir dhaoine an aghaidh feachd Chonchobhair? Thuit iad, mar a tha 'n duan ag aithris,—“Ni 'n d'fhag meangan, meur, na geug dhiubh.” Bha Conchobhar a nis toileach air Deirdri a ghabhail air a h-ais mar mhnaoi, ach cha chuireadh i a cas air tir gus ann faigheadh i a “rogha athchuinge.” Agus b'e a roghainn cead fhaotainn “tri poga meala, a thoir do na tri chorpaiibh

caomha, geala." Fhuair i cead; agus chaidh i far an robh na braithrean, marbh. Air an t-slighe fhuair i sgian bho shaor a bha 'g obair air ramh. agus thug i dha "Aon fhaine buadhach, na h-Eireann." Thog i a caoidh airson Chlann Uisneachan agus ghabh i a beatha a tilgeil na sgeinne's an fhairge a chum 's nach biodh coire air a chur air an t-saor. 'Nuair a chunnaic Conchobhar mara thachair thuig e gu'n robh gaol aig Deirdri air Naois agus nach b' ann an aghaidh a deoin a dh'fhalbh i leis air la na bainnse. Rinn e caoidh airson Clan Uisneachan, mic a pheathar agus leis a sin tha an duan ag crìochnachadh.

FRAOCH MAC-FITHICH.

Le facal mu' n duan so bheir inn ar cunntas air leabhar Mhic-Illeathain gu crìch. Tha sgeul Fhraoich cosmhail ri sgeul Dhiarmaid. A 'n aite Ghrainne, tha Maobh againn 's an duan so, agus a 'n aite Dhiarmaid tha againn Fraoch. Bha craobh chaorainn air an robh dearcán-druidheach. Co air bith a dh'itheadh iad rachadh la 'us bliadhna a chur ri 'bheatha. Ach bha iad air an dìon le beisd nimheach agus b' e 'n dearbhachd ris an do chuireadh Fraoch le Maobh, na dearcán fhaotainn bharr na craoibhe air a son. Rinn e so, ach chosd an gnìomh a bheathadha. 'S e sin cion-fath an duain. Tha 'n sgeula tiamhaidh, mar a tha an roinn mhor do na duain a tha againn mu ghaisge nan Gaidheal.

Ma tharruingeas an cunntas lag-chainnteach so aire Gaidheil Chanada do ghnath-chuimhne ar sinnsearan mar a tha i air a faotainn ann an Duain Ultach Mhic-Illeathain no ann an leabhraichean measail eile, bithidh run fear-sgrìobhaidh nam briathran so air a choimhlionadh agus cha bhi an oidheirp bheag so gun bhrìgh.



AM BARD MACCOLLA.

AM BARD MAG COLLA.

“Mairidh mo chliu anns an dan.”

AM measg nam fineachan Gaidhealach bha na baird ard-inbheach agus ann am mor-mheas. Cha b' e cogadh 'us creach amhain anns an do ghabh na laoiach tlachd; bha iad treun ann an cath ach bha iad suairce, caomh ann an sith. Bha mor speis aca do cheol na clairsiche agus gu sonraichte do dhuain fhonnmhor nam bard. Bha am bard na sheanachaidh, b' esan a chum cunntas air gnìomharan nan laoch, aig fleagh an fhionadh' aithris e an cliu, agus an deigh am bas chairich e an carracuimhne 's an dan.

“An uair bu bheo Treunmhor nan cath,
Is Trathall athair nan treun laoch,
Chuireadh gach cath leo le buaidh
Is bhuannaich iad cliu gach teughboil;
Is mairidh an iomradh 's an *dan*,
Air chuimhn' aig na *baird* an deigh so.”

B'e miann gach triath agus treun-fhear a bhi air a mholadh ann am marbh-rann agus bha dreuchd nam bard, air an aobhar sin, cha b' e amhain deacair, ach ro-urramach.

Anns an linn so cha 'n 'eil tiodhlac air a bhuil-eachadh air duine air am bheil barrachd meas na air

gibht na bardachd. Sios gu laithean ar seanairean, bha coirichean agus sochairean aig na baird nach robh aig muinntir eile. Agus bha cuid do na coirichean sin air an aideachadh gu follaiseach 's na cuirtean lagha. Tha e air aithris gu'n robh duanaire ann an Ceann-Loch-iui ris an abradh iad gu cumanta "Am Bard." Mar bhard bha comas aig' air neach sam bith a mholadh no 'dhi-moladh mara thoilicheadh e, agus rinn e aoir air duin' uasal a bha 'na choimhearsnachd. Ach dh'aicheadh an duin' uasal gu'm bu bhard an rannadair agus tharruinge am bard gu cuirt airson gu'n d'rinne an aoir. 'Nuair a thainig e air beul-thaobh an t-siorraim aig Inbhir-Feothairean, thuirt am breitheamh sin ris, 's e 'g amharc gu cruaidh air, a chum geilt a chur air,—“An tusa Bard Cheann-Loch-iui?” “Gu'm meal mi m'ainm;” fhreagair am bard gu grad, “ghairmeadh mi air m'ainm, 's dh'aidicheadh modhreuchd ann an cuirt lagha do 'n rioghachd, 's a nis, mar bhard cha chionnt dhomh aoir no caineadh a dheanadh.” Tha an sgeul ag radh gu'n robh an siorram ro-thoilichte le geur-sheanachas a bhaird agus gu'n d' thug e cead dha imeachd air falbh gun tuilleadh dragh. Co diu tha'n sgeul so fìor no nach eil tha e a' nochdadh gu'n robh na baird 'n an daonie sonraichte am measg nan Gaidheal eadhon gu laithean ar n-athraichean. Is tearc an aireamh a tha a' fìoridh air an ainm Bard. Ach 'n uair a tha orain duine a' foillseachadh gu bheil spiorad agus buadhan baird aige, tha urram air a chur air agus tha e air ardachadh ann am beachd a mhor-shluaigh. Air aon do na daoine sonraichte sin tha sinn a' n run beagan fhacal a' sgrìobhadh a leigear ris dhuinn

nach do thriall linn nam bard, ach gu bheil A Cheolraidh ag ungadh fhilidhean an diugh mar bu nos.

Do na baird ainmeil d'an d'thugadh aite ann an "Sar Obair nam Bard Gaidhealach" tha Eoghan Mac Colla amhain beo. Bha a chliu cheana a'm beul a luchd-duthcha tri-fichead bliadhna roimhe so, deich bliadhna mus deachaidh leabhar Mhic-Choinnich a chur a mach. Cha 'n e amhain gu'n do mhair a chliu mar bhard re an am fhada so, ach dh'fhas e ni bu shoilleire mar a bha'n uine a' dol seachad. Tha speis mhor aig Gaidheil Chanada do'n fhilidh aosda a tha fathast comasach air A Cheolraidh a thaladh gu "comhradh binn" ann am feasgar a laithean. Is oirdheirc 'tha a ghrian a pilleadh d' a clos le ceumana mairnealach, mall. Gu ma fad' a bhios e mu 'n teid i fodha gu leir eadhon ged a mhaireas na neoil bhuidhe dhealrach fada na deigh! Ciuin, samhach, mar a bha 's mar a tha a bheatha, gun bheud gun bhuaireas, cha 'n 'eil moran is urrainnear innseadh mu dheighinn, gidheadh tha e ro-iomchuidh gu'n bitheamaid ag deanadh iomraidh air eachdraidh agus air obair duine a tha cho airidh air cliu agus meas a luchd duthcha ri Bard Loch Fine.

Na'n tachradh air neach geur-bheachdach a bhi'n lathair aig aon do choinneamhan Comuinn Gaidhlig Toronto, bu dualach dha duine fhaicinn a'n sin, 'na shuidhe air taobh deas fearna cathrach, a'thogadh aire car tamuill. Tha e 'g eisdeachd gu furachar ri briathran an fhir-labhairt, theagamh gu bheil a lamh ri chluais, oir tha 'chlaisneachd a' failneachadh. Duine iosal e, mu choig troidhean agus sea oirleach annan airde, seang ann am pearsa, ach cuimseach, sultmhor 'n a dhreach agus

smiorail, ealamh 'n a ghluasad. A boisgeadh 'n a aghaidh tha a shuillean gorm-ghlas, min, tuigseach ; tha a bhathais ard agus fosgailte agus ann an laithean oige bha fhalt, a tha a nis ciar-ghlas, donn-bhuidhe. Mar eil a "ghruaidh air dhreach an ros," tha ruiteag fathast oirre do'n t-snuadh a tha na chomharradh air surd inntinn agus slainte bodhaig. Tha a bheul laganach a' foill-seachadh mor-sheirc agus cairdeis, s' mar an ceudna gu'm bheil inntinn mhothachail, iriosal aige. Tha a bhilean tana, seasmhach, ach gun chruas no rag-bheartachd ; a shron a' cromadh aig a gob, agus a smig bunaiteach, dìongmhalta. Tha a ghnuis aoidheal, thla, a nochdadh gu soilleir gur duine e a tha suilbheir agus teo-chridheach, geur agus smaointeachail. Seal-laidh tu gun bhuil airson na sula bhreislicheil, throm, bhruadairich a tha air a co-cheangail, gu coitcheann, ann am beachd mhuinntir ris na baird, ach ged nach eil an comharradh so air aogas, 's e fìor bhard a th'againn anns an duine so. 'Na cheithir fichead bhliadhna 's a coig s e so Eoghan Mac-Colla. Ma tharlas dha labhairt air gnothach sam bith a d' fhaodas a bhì fa chomhair na coinneamh, ach cha tric leis sin a dheanadh, cluinnear briathran tarbhach a theid calg-dhireach gu smior na cuise. Cha chanadh tu gu'n robh e deas-bhriathrach, ach theireadh tu gu 'n robh e da rìreadh druidhteach. Tha gach facal air a thaghadh 's air a ro-thaghadh agus tha gach sreath, 's gach earrann d' a chainnt, mar a labhras e i, gun mhearachd agus air leth snasail. Tha'n aois a laidhe gu aotrom air. Tha e cho beothail, sunndach, ri duine og agus a reir a choltas cha shaoilteadh gu'n robh e trì fichead bhliadhna 's a deich. Tha a cheum gramail, sgiobalta,

agus r' a fhaicinn air an t-sraid bhiodh e duilich a chreidsinn gu'n robh e an aois mhor a tha e.

Siu mar a dh' fhaodadh neach Bard Loch Fine fhaicinn air an la 'n diugh ; ma theid sinn air ar n-ais gu laithean oige, gheibh sinn e ri taobh an loch ann an siorramachd Earra-Gh idheil air am bheil e air a shloinneadh. Bha gabhail aig athair 's aig triuir no ceathrar do theaghlachian eile do bhail- do 'm b' ainm a Cheanna-mhor, a bha aig ceann Loch Fine, mu choig mìle bho bhaile Ionar aora, aite-comhnuidh Diuc Earra-Ghaidheil. Ann an so, 'sa bhliadhna 1808 rugadh Eoghan MacColla, an seachdamh leanabh ann an teaghlach 's an robh ochdnar mhac agus nigheanan. Bha athair 'n a dhuine ainmeil airson eolais air orain agus duanagan nan Gaidheal, agus a chomais air an seinn aig na ceilidhean a bha air an cumail gu bichionta 's an am sud airfeadh na Gaidh ealtachd. Thug e foghlum math d' a sheaghlach a' dol cho fada 's a cheadaicheadh a chrannchur dha, agus a bharrachd air a sin ghabh e tlachd ann a bhi 'g inns-eadh dhaibh mu aille 'us mu bhoichead nan gleann 's nan doireachan, 's nam beann a bha mu' n cuairt orra. Tha e coltach gu 'n robh e 'n a dhuine tuigseach, breithneachail, agus gu'n do shealbhaich am bard cuid d'a thalantan uaithe. B'e ainm athar, Dughal Mac-Colla agus b'e ainm a mhathar Mairi Chamaroin,—nighean do Dhomhnull mor a Gharbh-choirre, a mhuinntir Chomhail. Tha e air aithris gu'n robh i caoimhneil thar tombas, iochdmhor, fialaidh ; min-eolach air a Biobull agus curamach mu a theagasgan. Bha i 'na bana-sgeulaiche dheas. Bha meonhair chuimhneachail aice agus b' urrainn d'i seann sgeulachdan aithris agus seann orain a sheinn ni b' fhearr na neach sam bith eile

a b' aithne do'n bhard. B' urrainn d'i oran a dheanadh cuideachd na'm b' eigin e, agus is iomadh aon a rinn i a'n uaigneas, ged nach leigeadh an saidealt lethe aideachadh riu. B' esò an seorsa pharantan bho'n d'thainig e; bha a dhachaidh air ordachadh gu measara, glic. Cha robh seann chleachdaidhean an t-sluaigh air an di-chuimhneachadh, no an gliocas a tha ri fhaotainn ann an sgeulachdan agus ann an sean-fhacail ar n-athraichean: ach bha an t-ait' a b' airde air a thoirt do'n ghliocas sin 'tha feumail airson an t-saoghail so agus a tha math mar an ceudna airson siorruidheachd. 'N uair a rachadh na binn-luinneagan Gaidhlig a sheinn, cha robh dearmad air a dheanadh air sailm Dhaibhidh far an robh air a thasgadh smior a chruithneachd do'n anam. Bha na nithean sin mar reul-iuil do'n bhard 'n uair a bha e mar dhuine og a' cur chatha ri buairidhean an t-saoghail ann am bailtean Shasuinn, 's mar cheann-teaghlaich, a' treorachadh a a chuid cloinne fein 's an t-slighe dhireach, reidh.

'N uair a bha e fathast gle og, bha tart air inntinn an deigh leughadh leabhraichean agus eolas air litreachas agus gnath-chuimhn' a dhuthcha. Bha e fada bho sgoil mhath ach fhuair e foghlum a bha bunachaireach, cho fada 's a chaidh e bho fhear-teagaisg a dh' fhasdaidh athair airson a theaghlaich fein. Sheas so dha gus an d' ionnsuich se e fein mar a dh' fhas e suas. Tha am bard ag innseadh aon ni a bha air a chleachdadh anns na sgoilean 'n a latha-san a bu choir a bhi air aithris 's air a thogail suas a chum a bhi air a dhiteadh leis gach fìor-Ghaidheal, 's b' e sin gu'n robh teagasg agus labhairt na Gaidhlig air an cuir sìos leis am laimh laidir. Aon fhacal Gaidhlig cha'n fhaodadh a chlann

a labhairt. B' e leabhraichean Beurla a bh' aca an toiseach agus ged nach tuigeadh na paisdean smid do'n leusan, bha e air a thoirmeasg dhaibh a cheil a' chuideachadh le 'bhi mineachadh na facail Bheurla leis a Ghaidhlig. Ann an cuid do dh' aitean bha an cleachdadh mi-chiatach so a' dol ni b' fhaide, ag cur bacadh air a chlaun Gaidhlig a' labhairt air an t-slighe do'n sgoil, no a' tighinn dachaidh. Bha luchd-riaghlaidh nan sgoilean do'n bheachd gu'm biodh e ni b' usa Beurla 'theagasg do'n chloinn le 'bhi' cur casgadh gu buileach air a Ghaidhlig; 'n ar latha-ne cha 'n 'eil muinntir cionntach do'n mhearachd dheuchainneach so, agus tha 'Ghaidhlig a' faotainn cothram mar nach d' fhuair i ceithear fichead bliadhna roimhe so.

Bha Mac Colla air a thogail am measg dhaoine aig an robh meas air seann chleachdaidhean nan Gaidheal. Ri laithean oige bha an sluagh fathast deigheil air na cleasan foghainteach bho'n do tharruing an sinnsearan neart agus ealantachd. Bha 'n ceilidh air a gnathachadh mar aon do na nithean a bu thaitniche a bha aca. Ri taobh na cagailt bha 'n sgeulachd air a h-aithris, an orain air an seinn, a phiob-mhor air a seideadh agus car dannsa air a chur le nabaidhean a bha baigheal do chach a cheile 'sa fhuair toilinntinn ann an conaltradh 's ann an caidreachd chairdeil. Is tric a chaidh cunntas a thoirt air a cheilidh, 's cha ruig sinne 'leas a dealbh a tharruing a rithist ann an so. Bha camanachd air a cleachdadh le sean 'us og. Bha speis mhor aig na daoine do'n chluiche so. Cha b' ainmic a chitear corr is ceud fear a strith airson an t-sailidh air an fhaiche agus bha an cliu mar luchd iomain am fad 's am fagus air feadh siorramachd Earra-Ghaidheal. Bha

cluich na pioba agus fìdhlearachd ro-chumanta mu cheann Loch Fine agus cha bhiodh cuideachd, no ceilidh coimhlionta gun phiobaire no gun fhìdhlear. Cha robh eaglais 's an aite ach eaglais steidhte na h-Alba. Cha robh a cuid mbinisteirean ag amharc le gruaim air fearas-chuideachd na ceilidh no air fearachd-ioman nan daoine. Bha so roimh am na' maighstearan-sgoile Gaidhlig a chuir comunn Dhuneideinn a mach gu bhi craobh-sgaoileadh solus a Bhiobuill 's a Ghaidhealtachd agus gu bhi teagasg an t-sluaigh. Shuidhich na daoine coire sin an aghaidhean gu cruaidh an aghaidh nan seann chleachdaidhean a dhìt iad gu tur 's air an do chuir iad comharradh a pheacaidh. Bha iad 'n an daoine treibhdhireach 'n an caitheamh-beatha, cruaidh, neo-luibte 'n am beachd agus eudmhor a thaobh an creideamh. Leotha so thainig atharrachadh air gnaths-beatha moran do 'n t-sluaigh ach bha 'm Bard air fas suas gu bhi 'n a dhuine og mus d' fhuair na beachdan ura greim air an aite. Bha cor an t-sluaigh a'n eatorras, an gabhail thar a cheile. Bha an tuath bheag 'n an deagh oibrichean, dìchiollach agus toigheach air an cuid airgid. Bha na maotr fearainn, mar bu tric, 'n an daoine sìtheil, onarach agus, aig an am 'so, cha d' rainig am fuadach no an cruaidh-chrannchur a bha a' sgiursadh nan croiteirean ann an aitean eile bho'n dachaidhean, gu ceann Loch Fine, ach bha na h-iasgairean air da thaobh an locha gu tric ann an staid eigineach. Bha athair Mhic Colla, mar a bha a choimhearsnaich, 'n a thuathanach agus 'n a iasgair, agus mar an ceudna bha e n' a fheargleiddhidh nan rathadan mora air a chuibhrionn sin do dh' oighreachd an Diuc a bha mu'n cuairt air caisteal Ionaraora. Bha tuille 'sa leoir do dh' obair aig gach

neach do'n teaghlach ri dheanadh agus cho luath 'sa bha Eoghan comasach air buailtean a thuirling, no air caibe a chur, no air ramh a tharruing bha a lamhan an sas. B'oiriche inntinneach, dian a bh' ann nach tionndadh bho ghniomh coltach sam bith a thigeadh ri aghaidh. Aig am an iasgaich b' iomadh uair a bha aige ri cruadal a sheasamh le fuachd agus fliuchadh, a chlaoidheadh daoine a bu treise na esan. Tha cuimhne aige air oidheche araidh air a bhi air a dhusgadh roimh bhristeadh na faire le fuaim na gaoithe. Bha 'm bata air moran uisge a ghabhail a staigh agus bha'n leaba fhraoich air an robh e 'na laidhe ag snamh air a h-ais 's air a h-aghairt air uachdar an uisge. Bha e cho fliuch 's a dheanadh uisge e ach cha robh air a shon ach toiseachadh air taomadh comhla ri cach a bha 's an aon staid ris fein. 'N uair a dh' eirich a ghrian laidh a ghaoth agus thiormaich a chuid aodaich air a cholainn mar a thiormaich na siuil air na croinn, ach cha d'thug an droch fliuchadh uair a thim do thinneas no euslaint air, bha e cho cruadalach, slainteil. Mar so chaidh an uine seachad gus an robh e tri bliadhna thar fhichead 'n uair a dh'fhag an teaghlach taobh Loch Fine airson Chanada. Dh' fhan am bard 'n an deigh, oir bu mhiann leis cuid do na h-orain a rinn e cheana 'chur ri cheile, a chlo-bhualadh 's an cur a mach ann an leabhar. Rinn e so 's a bhliadhna 1836; agus is iomadh leabhar oran a chuir e 'mach bho 'n am sin. Tha e air innseadh gu'n d' rinn e a cheud oran, mar bu dualach do bhard, air cailin og, comh-aois d'a fein, a thalaidh a chridhe maoth as a deigh le a'boidhchead. Cha robh misneachd aig an oigear e fein an luinneag a sheinn. Ghabh e comhairle caraid og aig an robh guth math agus dh'aontaich esan an t-oran

a ghabhail aig ceilidh ann an taigh bantraich a bha comhnuidh faisg air laimh, 's bha Eoghan gu bhi air taobh am muigh an taighe aig eisdeachd ris na thachradh. B' ann mar sin a bha, agus 'n uair a chuala an gille na briathran molaidh a chaidh a labhairt mu'n oran a rinne dh' fhairich e 'n a chridhe gu'm bu bhard e, agus bha e air a lionadh le aoibhneas. Bho sin am machleig e srian leis a Cheolraidh agus mar a chunnaic sin, threoraich ban-dia na bardachd e gu buadhach 's gu tearuinnte uile laithean a bheatha.

Fhuair a cheud leabhar deagh aoidheachd ; cha b'fhada gus an robh an aireamh a chaidh a chlo-bhualadh air a reic uile, agus bha failte 'us furan air an cu r air Mac Colla mar bhard gealltanach, comasach. Le coron molaidh air a cheann agus aium a chaidh roimhe mar theachdaire, ghabh e turus do'n Ghaidhealtachd mu thuath 'sa bhliadhna 1838. Dh' fhosgail saoghal nuadh am mach dha. Bha ailleachd naduir, ri faicinn anns na glinn, na h-aimhnichean, na coilltean, na beanntan, mar nach fac e riamh roimh. Cha'n e gu robh siorramachd a bhreith a dh' easbhaidh air boidhchead, ach chuir na chunnaic e as ur ri meudachd 's ri maise na Gaidhealtachd 'na h-ìomadh dreach. B' fheudar a chruit a chur air ghleus agus ann an Gaidhlig 's ann am Beurla dhealbhe duanagan agus orain nach teid gu luath air di-chuimhne. Bha daoine ainmeil na Gaidhealtachd ro-dheigheil air a bhard og chluiteach fhaicinn agus eolas a chur air agus choinnich e ri moran diubh a nochd cairdeas agus fialachd dha, 's a leag bonn-cairdeis air a shon air an do sheas iad ri 'm beo.

B'e aimn aon diubh sin Doctair Carruthers, fear deasachaidh paipeir-naigheachd ann am baile Ionarnais.

Duine ard-aigheach, foghlumte, ughdar leabhraichean a tha inbheach ann an litreachas na duthcha. B'ann a'm paipeir Charruthers a chuir am Bard a mach an toiseach an duanag a rinn e do dh' amhuinn na Manachain, aon do na luinneagan is dealbh-chainntiche 's is firinniche a thug riamh tuairisgeul air maise 'us greadhnachas naduir. Bha coinneachadh taitneach aig a Bhard agus an Doctair aig an Easa Fhaighearach a dh' fhaodar aithris a 'n so. Air a chuairt troimh 'n Ghaidhealtachd thainig MacColla gu Faighear a dh' fhaicinn an Easa air am bu tric a chual e iomradh mar aon do na seallaidhean a b'oidheirce a'm Breatunn. An deigh dha sealltainn air an easa ghloirmhor bho iomadh aite-seasaidh, shuidh a sios aig bun sgorr craobhach a thilg sgaile urair thairis air. Leag e air smaointeachadh: ghluais a mhac-meamna, agus air clar inntinn bha e 'dealbh na nithean mora a rinneadh 's na seann linntean mu 'n cuairt air an dearbh easa air an robh e a nis ag amharc. Thainig miorbhuillean Chalum Chille, 's a chomhradh ri Rìgh nam Pìocach air an ais dha, agus nagniomharan iongantach a tha fathast air an tasgadh ann an saobh-chrabhadh an t-sluaigh. Thuit e ann an neul-bhoile, gun fhaireachdain no cuimhne aige cia an t-aite 's an robh e. Bha e air a dhusgadh as a shuain aonaranach le fuaim cas-cheumana cabhagach a' tighinn 'na choir, agus mus d' fhuair e cothram eiridh suas, ghlaoidh guth a mach os a chionn,—“Holo ! an ann a'n so a gheibhear leam an t-og-bhard Gaidhealach, air bruaich chunnartaich an easa, agus e 'n a chadal ! Mo naire Mhic-Cholla, cia mar a b' urrainn duit a bhi cho neo-fhaicilleach ?” Bha am Bard air a chur gu h-amhladh car mionaid, ach ghrad chairich se e fein

agus dhearbhb e do' n Doctair choir (oir b'e a bh'ann) nach b' ann 'n a chadal a bha e agus nach robh an cunnart cho mor 's a shaoileadh leis. Cha b' i so a cheud uair a choinnich iad ri cheile 's cha b' i an uair mu dheireadh. B' iomadh comhail agus caoimhneas a thachair eatorra andeigh an am so agus cha robh moran do luchd-speis a bhaired aig an robh barail a b' airde dheth na 'bha aig Doctair Carruthers.

Aig an am so chaidh am Bard gus an Ruidhlig a choimhead air Sine Chaimbeul ris an robh cordadh posaidh aige agus do 'n d' rinn e iomadh aon d'a chuid oran gaoil. Bhuineadh i do Shiorramachd Earra Ghaidheil agus bha i air turus-taghail goirid d'a piuthar a bha posda air duine do Chlann Mhic Caluim a bha 'n a gharadair do Fhrisealach na Ruidhlig, am fear-sgriobhaidh ainmeil. Chaidh am Bard agus Sine gu coinneamh Ghaidhealach an Airde Tuath aig Ionarnais, agus ann am beachd dhaoine a chunnaic iad le cheile, bu choltach a charaid iad, 's cha robh air an larach chruinneachaidh maighdean, co dhiu a b' ard no a b' iosal a h-inbhe, cho maiseach, no cho dreachail ri Sine Chaimbeul. "B' airidh i" ars' am Bard e fein, "air na h-uile facal molaidh a sgriobh mi riamh mu timchioll." Ach cha do phos am Bard agus an ailleag bhoidheach so. Cha b' ann gu 'n d' thainig eatorra ann an gradh, ach dh' eisd iad le cheile ri guth a ghliocais a bha labhairt riu, mar a chi sinn a dh' aithghearr. Bho so a mach cha robh dith air cairdean aig an robh ughdarras 's an rioghachd airson cuisean a Bhaird a chur air an aghairt. Air teistean Mhr. Chaimbeul, Ile, a bha 'n a bhall parlamaid airson Siorramachd Earra-Ghaidheil fhuair Mac-Colla aite fear-sgriobhaidh ann an Taigh Cise Liverpool 's a bhliana

1839. Ghabhe cead 's a bhliadhna sin do aite a bhreith agus cha robh a dhachaidh air Taobh Loch Fine riamh tuilleadh. Cha robh e fada ann an Liverpool gus am fac' e nach biodh e 'n a chomas Sine Chaimbeul a thoirt fo bhannaibh posaidh airson iomadh bliadhna a chionn 's gu'n robh an duais a bha e ag cosnadh ro bheag. B' eudar dha inntinn a dheanadh suas, agus b'e deireadh na cuise gu'n do sgriobh e a' toirt a saorsa do Shine. Chosd se mor-chradh dha ach cha robh atharrachadh air agus le comhairle ghlic an cairdean chaidh an cordadh posaidh a bhristeadh leo a dh'aon aonta. Phos Sine duine d'am b'ainm Mac-Fhearchair, 's an Eilean Dhubh, fear-ceairde, agus thog i teaghlach eireachdail dha. Bliadhnachan an deigh so, mus d'fhag am Bard Breatunn airson Chanada choinnich e fein agus Sine ri cheile, agus ged a bha ise 'na mathair cheathrar chloinne agus esan a nis posda dh'fhoillsich a choinneamh gu'n robh smalan beag do'n t-seann ghaol fathast beo, 's mar sin ghabh iad cead an t-saoghail-sa d' a cheile.

Airfad aon bh' iadhn a deug dh'oibrich Mac-Colla anns an Taigh chis, a' cosnadh ainm dha fein mar oifigeach curamach, dileas agus treibh-dhireach, 'n uair a bhris a shlainte agus b' eudar dha fois a ghabhail re sea miosan. Ghabh e an cothram so gu dol a dh'fhaicinn a luchd-daimh ann an Canada agus dh' aisigeadh a shlainte air a h-ais dhale deadh bhuaidh an turuis. Ann an Canada choinnich e ri Mr. Calum Camaran aon do ard uachdaranan na tire, a ghabh ris gu h-aoidheal agus a cho-eigniche fantainn 's an duthaich. Thairg e aite dha ann an seirbhis shiobhalta na duthcha mar a bha aige ann an Liverpool. Dhuin MacColla ris an tairgse agus thill e air ais airson a theaghlach a dh'fhage ann an Sasunn. Mus do chuire

a chulthaobh ri Alba gu buileach, ghabh esgriob troimh 'n Ghaidhealtachd, a dol a dh' ionnsuidh an taobh tuath 's ghabh e cead deireannach do na glinn, na beanntan 's na srathan, agus do na daoine teo-chridheach, uasal a bha comhnuidh 'nam measg. Chaidh a shuidheachadh gun dail ann an Taigh Cise Bail'-an-Rìgh, Ontario, agus dh' fhan e a'n sin gus a bhliadhna 1880 'n uair a thug e thairis obair a dhreuchd 'n a shean aois, lan do laithean agus do dh' urram. Ann am Bail'-an-Rìgh bha a faisg air teaghlach athar aig an robh fearann ann am baile Seymour air an amhuinn Trent mu choig mìle deug thar fhichead gu tuath air Belleville. Ann an so dh' fhas gineal taighe athar air leth lionmhor agus seachd no ochd bliadhna roimh an am so b' urrainn do'n Bhard coig-fichead 's a coig diubh aireamh, a chuid bu mho dhiubh ann an Canada. Re da-fhichead bliadhna a nis tha ainm Mhic Cholla aithnichte agus air a mheas ro-urramach am measg Ghaidheal us Ghall bho chuan gu cuan 's bho dheas gu tuath ann an America. Aig a dhachaidh ann am Bail'-an-Rìgh bha e 'na cheann-uidhe fialaidh; bha dorus a thaigh fosgailte, agus 'aoidheachd cridheal, d'a luchd eolais 's d'a luchd-duthcha leis am bu mhaith eolas a chur air. Bha gach neach, bho 'n deirceach bhreòite, leis am bu bhuidhe greim-bidh fhaotainn, gus an duine shaoibhir a thigeadh a chum aondo bhaird ainmeil Chanada fhaicinn; bho 'n duine og a'n geall air eolas aig Oil-thaigh Bhail'-an-Rìgh, a bhiodh gu tric aig taobh a chagailt, gu daoine a bha cheana iomraiteach ann an ealdhain dhiongmhalta nan sgoil, di-beathta aig fardach a Bhaird. Do neach aig an robh speis do bhardachd na Gaidhealtachd, no do litreachas Bheurla bhiodh ceilidh ann an taigh Mhic-Cholla ro-thaitneach.

Bha eolas farsuing aige air leabhraichean agus sgriobhaidhean nan ughda r Beurla agus bha deagh bhreith neachadh aige air na beachdan a chuireadh iad an ceill. 'Na chomhradh air cuspairean de' n t-seorsa so bhiodh faobhar geur air a chainnt, agus cha bhiodh sgath air dol an caramh diulanach sam bith le claidheamh ruisgte a theangaidh. Ach ma bha e sgaiteach an aghaidh ni nach b' fhiach, bha e sicer, measail, mu obair anns an robh luach. Bha e 'na sheanachaidh barraichte. Bha min-eolas aige air obair nam bard, agus air eachdraidh am beatha. B' urrainn da sreath an deigh sreath 'us rann an deigh rann a radh do sheann orain nach fhaca suil riamh air taobh duileig leabhair, agus bha fiosrachadh iongantach aige air ainmean dhaoine 'us aitean a tha tachairt ruinn ann an orain Ghaidhlig. Air oidhche gheamhraidh, 'n uair a chruinnicheadh a theaghlach 'us dithis no de triuir luchd-taghail mu'n cuairt air a ghealbh an bu dual do'n t-seanachas tionndadh air na fineachan Gaidhealach, air an eachdraidh, an cleachdaidhean, 's am bardachd. Dh' fhosgladh cridhe a Bhaird agus tharruingeadh e a mach as a storais nithean nuadh agus sean airson toil-inntinn na cuideachd.

B' ann aig am mar so a chitear MacColla aig a neart: ghabhadh tu barail ni b' airde 'a bhuadhan inntinn ri chluinntinn mar so, na 'ghabhadh tu bho a chuid bardachd clo-bhuailte. Bha e 'n a bhall do'n Chomunn Oiseineach, agus rinn e a chuibhrionn fein do'n obair a bha r'a deanadh 's a chomunn. Do'n chomunn so bha 'us tha e 'n a bhard. Tha e an ni ceudna do Chomunn Gaidhlig Thoronto; na bhall urramach do Chomunn Ceilteach Mhontreal, 's do Chomunn Albanach Chicago, 's do chomunn Albanach Dhubusque,

Iowa ; agus tha e 'n a bhall do Chomunn Rìoghail Chanada, a chaidh a chur air bonn leis a Mharcus Lathurnach 'n uair a bha e 'n a ard uachdaran air Canada. Bha Mac Colla posda da uair ; a cheud uair ann an Liverpool, 's a bhliadhna 1845 ri Frausidh Jemima Nic-Iain bho choimhearsnachd Charlisle, air taobh Shasuinn. Rug i triuir chloinne do'n bhard, mac agus dithis nighean. Tha am mac so 'n a mhinisteir ann am mor-roinn Quebec, tua aon do na nigheanan, Fanaidh, marbh agus tha an te eile Mairi posda ann an Newark, N. J., is ise a' bhana-bhairu, agus shealbhaich gibht nach beag bho h-athair. 'S e ainm na dara mna, a tha fatlast beo, Iseabal Nic-Artuir, a mhuinntir an Ros Mhuileach. Thog i dithis mhac, Aonghas agus Domhnull, agus ceathrar nighean, do'n Bhard. Chaochail dithis do na nigheanan 'n an cailleagan beaga ; tha a' chuid eile do'n teaghlach uile beo agus air ceann gnothaichean soirbheasach. Mar a dh' fhas an teaghlach suas chaidh iad a mach bho 'n dachaidh bhlath ann an Bail'-an-Rìgh, cuid diubh gu dachaidhean dhaibh fein 's cuid eile an deigh goireas an t-saoghail ann am bailtean moran nan Staidean. Bha mac agus nighean—Mairi Bhan nan oran--aige ann an New York agus bha iad a sior thagairt air comhnuidh a ghabhail maille riu. Cha bu mhiann leis fearann Breatunnach fhagail, agus gu sonraichte a chairdean 's luchd eolais am measg Ghaidheil Chanada. Ach bha e fas sean ; bha a theaghlach sgapta air feadh na tire, agus gheill e do dh' iarrtus a chuid cloinne a dhol gu New York. Bha an dealachadh bronach agus cha robh duil aig moran d' a luchd eolais gu'm faiceadh iad an seann duine tuille, ach cha b'e sud a bheachd fein mu'n chujs.—“ Bheir mi sgriob g' ur faicinn a'n ceann

biadhna no dha," thuirt e, ged a bha e aig an am thairis air ceitheir fichead bliadhna. Agus cha 'n e amhain gu' n robh e cho math ri fhacal, ach thainig e a ghabhail comhnuidh 'n ar measg-ne aon uair eile Mus deachaidh e gu New York thug Gaidheil Toronto aoidheachd dha aig cuirm ann an Taigh osda a Chruin. Bha cuideachd eireachdail do mhaithibh a bhaile a lathair agus bha oidhche iomraiteach air a caitheamh a' cur urram air an fhillidh aosda. Aig Bail-an-Righ, aig Ottawa, 's aig aitean eile, bha iomadh dearbhadh air a thoirt dha air deagh-run a luchd-duthcha agus dh'fhalbh e le durachd mhath airson beatha fhada, shona a chaith-eadh ann am prìomh-bhaile America. Ach cha do chord gleadhraich nan sraid, an stararaich, 's a chabhag micheillidh ris a Bhard agus thionndaidh e aghaidh ri Canada. Fhuair e furan nach bu bheag air dha tilleadh. Bha na Gaidheil air feadh mor-roinn Ontario ro-thoilichte gu' n robh e am measg eolaich aon uair eile. Bha e mar gu' n robh e air tilleadh dhachaidh. Chuir Comunn Gaidhlig Toronto failte air mar aon diubh fein, agus aig coinneamh do' n chomunn a dh' ionnsuidh a' n robh e air a ghairm chaidh oraid-molaidh a leughadh 'n a chliu, agus a thoirt dha maille ri sporran lan, a chuireadh ri cheile mar chomharradh air deagh-ghean dha fein. Tha e a nis, mar a thuirtear, ri taobh a theal-aich, gu comhfhurtach, toilitichte, ann an Toronto, agus is e guidhegach aon do'n aithne e gu 'm bi e fada air a chaomhnadh d' chairdean s d'a theaghlach.

A tionndadh bho bheatha gu obair, 's eudair moladh nach gann a thoirt dha mar bhard. Cha do chlo-bhuail e moran oran Gaidhlig; cha'n'eil ach mu cheud gu leth taobh-duileig 'n a leabhar; ach cha 'n'eil aon oran bho

thoiseach gu dheireadh air nach 'eil seula fìor bhardachd. Cha 'n 'eil aon diubh a thilgeadh am fear-sgrudaidh a bu gheire a mach as an leabhar. Tha an aireamh beag ach tha an co-chruinneachadh air a thaghadh 's air a rothaghadh, gus, ann am beachd chuid, an robh a ghuitghlanaidh air a cur buileach is cruaidh. Ach ma chaidh cuid do'n chruithneachd a sguabadh air falbh leis a mhol 's ann is tarbhaiche an siol a dh'fhagadh. Sgrìobh agus chlo-bhuail Mac-Colla aireamh mhath do dhain agus orain Bheurla, agus choisinn e moladh ard air an son-san bho leithid do dhaoine ris an Urramach Tormad Mac-Leoid, Huistein Muilleireach bho Chrombairgh, Dr. Mac-Ille Dhuinn, a sgrìobh eachdraidh nam Fìneachan 's nan Reiseamaidean Gaidhealach, am feallsanach urramach sin Mr. Alasdair Stiubhart, "Bun-Lochabair," agus moran daoine ainmeil eile. Cha 'n ann idir mar bhard Gaidhealach amhain, a rinn e ainm d'a fein, oir ged nach sgrìobhadh e sreath ann an cainnt a mhathar riamh rachadh ainm sìos am measg bhard na linn-ne so. Ach ged tha so fìor 's ann mar bhard Gaidhealach a mhaireas a chliu ann an cridheachan a luchd-duthcha agus 's ann mar bhard Gaidhealach a bu mhath leis fein a bhi air a chuimhneachadh.

Chunnaic sinn mar a chuir Mac Colla a cheud oran a rinn e fa chomhair saoghail bhig Chinn Loch Fìne; chi sinn a nis mar a thugadh a bhardachd do'n t-saoghal fharsuing gu leir. Bha e ochd bliadhna thar fhichead a dh'aois 'n uair a chaidh a cheud leabhar a chlo-bhualadh 's a bhliadhna 1836. B'e 'n t-ainm fo'n d'thainige a mach, "Clarsach nam Beann." Bha orain Bheurla agus Ghaidhlig 's an leabhar, mu'n aon aireamh 's an da chanain. Bha co-chruinneachadh Gaidhlig air a chur a mach ann

an 1839, 's a rithist, ann an 1849. Bho 'n amsin chaidh iomadh ath-chlo-bhualadh a dheanadh mar a bha muinntir a' sireadh nan leabhraichean. Dh'fhoillsich a cheud leabhar do'n t-saoghal gu 'm bu bhard e. Mheas breitheamhan comasach gu robh fìor bhard air eiridh 's a Ghaidheal-achd, agus thallan dhearbhadh againn a nis gu'n robh iad ceart, ma 's fhiach beachd a luchd-duthcha dad sam bith. Ann a bhi sealltainn thairis air sgriobhaidhean mu Mhac-Colla, cha do thachair orm ach aon duine a tha co-measgadh achmhasan le chliu ; ach ged a tha an neach so 'factainn coire do'n Bhard ann an ni no dha, tha e ag iochdadh molaiddh dlighich dha mar bhard finealta, grinn. Is e an neach a tha mi'ciallachadh, an t-ollamh foghlumte ann an Lunnainn, Niall Mac-Neill, a sgriobh paipeir mu bhardachd ar linn-ne, a bha air a chlo-bhualadh, ann an leabhar-miosail Gaidhlig, air a chur a mach 's an Oban 1885-86. Tha an t-ollamh ag gearan nach d'thainig am Bard a mach le dian-theachdaireachd d'a luchd-duthcha, g'am brosnachadh an aghaidh an fhoirneart a bha iad a fulang aig laimh nan uachdaran. Bha comhstri gharg 's an eaglais a bha g'a reubadh na mirean ; bha na Gaidheil air am fogradh bhos 'us thall air feadh an t-saoghail, ach a reir Mhr MacNeill cha robh inntinn a Bhaird air a gluasad leis na trioblaidean sin. Bha e gu goireasach air a shuidheachadh ann an Liverpool air teistear dithis uachdaran agus cha robh e nadurra dha a bhi 'togail cath-ghairm air teudan na ceolraidh, a dhuisgeadh misneachd nam fineachan mu thuath. Chaill am bard og co-fhaireachdainn ri glaoth geur an t-sluaigh, cha d'thainig e a mach mar fhear-seinn an doilgheasan, mar a bu chubhaidh do bhard 'n a linn-san ; agus air an aobhar so cha 'n 'eil a

bhardachd freagarach airson cridheachan dhaoine a ghluasad. Is e so gearan an ollaimh MhicNeill. Tha mi meas gu'n d' thug Mr. MacNeill an t-srian d' a bheachdan 's gu'n deachaidh iad an iomrall a chion treoireachaidh. Seallamaid car mionaid air a chuis. 'Sa cheud te, cha 'n 'eil aobharsam bith a bhi creidsinn gu robh MacColla air a dhalladh le beadradh no le fabhar nan uachdaran. Gun teagamh, nochd iomadh aon diubh sin, agus dithis dhiubh gu sonraichte, caoimhneas dha, ach b' ann air sgath a bhardachd—an deigh dha cliu baird a dheagh-chosnadh bho'n t-saoghal; agus ma dh' fharraideas sinn ciod i gne a chaoimhneis, chi sinn nach robh am bard ni b' fhaide a' n comain an dithis uachdaran a bu mho a rinn air a shon, na dh' fhaodadh iomadh oigear gealltanach eile a bhi. B' iad an da dhuin'-uasal, Caimbeulach Ile, agus Aonghas Mac-an-Leisdeir, tighearna Dhunain, a' n tir Chomhail. Mar a thug sinn fainear, bha 'n Caimbeulach 'n a bhall-parlamaid aig an am air Siorramachd Earra-Ghaidheil agus bhiodh a nadurra gu'n gabhadh e suim do dhuine og sam bith 's an t-Siorramachd sin, aig am biodh tiodhlac na bardachd mar a bha aig MacColla. Thug e teistaes math dha do 'n neach a bha air ceann na cise. Bha 'n teisteas so air a neartachadh le Mr. Mac-an-Leisdear aig an robh min eolas agus meas air muinntreach mathar a Bhaird, a bhuineadh do thir Chomhail. Co am ball-parlamaid no an t-uachdaran, an diugh, nach deanadh na h-uiread do dhuine coltach sam bith a b' fhiach an t-saothair, a bhiodh a comhnuidh air oighreachd an aoin, no am measg luchd-taghaidh an aoin eile? Agus an ann a chionn nach do thionndaidh dithis dhaoine, a bha aithneichte airson an caoimhnealachd,

an culthaobh air fear-duthcha dhaibh fein, do bhrìogh gu'm bu bhard Gaidhealach e, a chuirear as a leth nach d'thug e aite 'na bhardachd do chor anniseach an t-sluaigh? Feumar an fhirinn innseadh. 'N uair a bha an t-ollamh a sgrìohhadh nam beachdan so, bha e a'n teas na comhstri a thog na croiteirean airson ath-shuidheachaidh an fhearainn 's a Ghaidhealtachd, agus cha robh inntinn fosgailte do chaoin ghuth gaoith an iar a'seideadh troimh dhoireachan nan gleann; cha'n fhoghnadh ach ceol nan stuadh 'n uair a bhiodh an cuan siar a beucaich air corsaibh creagach Ile. A chum a bhi reidh ri beachd MhicNeill, bu choir do'n Bhard cuspairean a thaghadh airson a chuid oran aig am biodh dlu-cheangal ri cuisean an fhearainn, agus air dhaibh a bhi air an taghadh, bu choir dhaibh a bhi air an laimhseachadh le teas-chorruich a chuireadh criothnachadh air naimhdean an t-sluaigh. Bhiodh so math 'n a aite fein, 'n an gabhadh e deanadh; ach co 'am bard o Ossein gu Mac-Dhunleibhe a thug buaidh le oran air droch-bheairt nan triath? Taghadh am bard e fein cuspair airson oran, cuireadh e neart a bhuadhan air, agus a reir mar a shoirbhicheas leis faigheadh e cliu. Anns a chearn 's an do thogadh MacColla, bha an tuath bheag 's na croiteirean gun mor ghearan an aghaidh nan uachdaran agus cha robh min-sgeul aca air an fhoirneart a bha dol air aghairt ann an aitean eile do 'n duthaich. Ann an Liverpool bha e fada air falbh o chonnspaid na h-Eaglais a bha lionadh inntinn a luchd-duthcha roimh an dealachaidh a' n 1843. Ach, ged is fìor so, bha a chridhe air taobh an t-sluaigh, 's chuir e an ceill a smaointean ann an rannan deas-chainnteach, comasach a tha dearbhadh 's a daingneachadh gu 'r

gearan mi-chothramach, gearan Mhic-Neill. Le briathran sgaiteach lean e Sellars bho Chataibh gu Earra-Ghaidheil, a' taomadh sgeige 'us magaidh air a cheann ann an aoir a tha diteadh fasachadh na tire ; anns an oran arinne e air "Roghadh nan Gaidheal,"--Iain Mac-Mhurachaidh (Murdoch) tha e 'sgiursadh nan uachdaran le scorpionaibh ; anns an oran "Beannachd Dheireannach an Eilthirich Ghaidhealaich," tha e 'cumha suidheachaidh na tire mar so :—

"Tha Gaidheil 'g am fogradh mar cheo bharr do shleibhtean
'S ma lean riut Cinn-fheadhn' 's ann air caoraich a's feidh !

"A Bhreastuinn, 'n am dusgaidh thoirt sgiursadh do d' naimhaidh,
Co b' uire na 'n Gaidheal gu eiridh leat suas ?

An cuimhn' leat na dhoirt iad de'n dearg-fhuil 'n a' bhlaraibh,

'S 'n e nis bhi 'gam fogradh gu brath uait an duais ?

'G am fogradh air sgath, barrachd mail ann am poca

Nan triath air bheag nair 'dh' fhag 'na fasaich tir m' oige !

B'e 'cur eadar mathair 'sa ceud leanabh boidheach,

B'e 'n rusg thoirt bho'n chraoibh, bhi an eigin dol uait.

Cha 'n e amhain gu bheil cridhe a Bhaird 's an aite cheart 's a chuis so ; tha e mar an ceudna a' bualadh le comh-fhulangas do mhuinntir sharaichte gach cinneach fo'n ghrein, agus dh' fhuiling e airson nam beachdan saorsail a shearmonaich e 'na bhardachd, an aghaidh ainneart agus, mar a bha esan a creidsinn, droch riaghladh na duthcha.

Air clar-innsidh leabhair Mhic-Cholla, tha am Bard a roinn obair 'na da earrann. Anns a cheud earrann tha dain do chaochladh seorsa, 's air iomadh cuspair againn ; anns an dara earrann tha e 'toirt dhuinn aireamh thaghta do dh' orain ghaoil. Faodar cumail ris an t-seol-dhealachaidh so anns na briathran a leanas. 'Se a cheud oran a tha 's an leabhar, oran-molaidh do Loch Duich,

meur do'n mbuir, a tha laidhe gu samhach aig bun Chro-Chinntaile. Tha an t-oran so, agus, mar an ceudna, oran a rinn e air Loch Aic a'n Comhal, cho math ri orain eile a rinn e do'n t-seorsa so, a nochdadh comas agus gibhtean a Bhaird mar dhealbhaiche naduir. Tha e air leth ciatach 's na samhlaidhean leis am bheil e a' soillearachadh gach rann. Tha, cuideachd, smointean fallain a' bristeadh troimh nan oran mar bhoisgeadh greine troimh 'n cheo a bhios a' comhdach mullach ard nam beann. Chi sinn air ar son fein, bho na rannan so, an doigh air am bheil e 'g aithris cliu Loch-Duich.

* * * *

Mar naoidhean gu ciuineal 'n a chadal
 An taice uchd dubhach a mhathar,
 'S tric aghaidh na mara 'mach gruamach
 A's tusa 'n ad shuain chadail samhach.
 A bhirlinn a' teicheadh bho 'n doireann
 Cha n-ainmic 'n ad rathad-sa 'stiuireadh
 'S tu tabhairt dhi beatha gle chairdeil
 Gu fasgadh do bhaghana ciuine.
 'S beag ioghna gach beinn tha mu 'n cuairt dhìot
 Bhi sealltainn a nuas ort gle sporsail;
 Cha mhiuic 'chi stuadhan co aluinn
 Iad fein ann an sgathan co oirdheara.
 O! gu bhi trath oidhche 'g an coimhead
 'N an seasamh a 'n rathad nan reula,
 No le uail 'togail suas an cinn or-bhuidh',
 'N uair tha 'ghrian 's an ear rosach ag eiridh.

* * * *

Tha a cheud rann a'n so gu sonraichte briagh.
 Tha 'n loch a laidhe gu ciuin mar naoidhean a'
 cadal aig uchd a mhathar. Tha an cuan, a mach
 thar beul an loch, buaireasach mar is tric a tha

mathair a leinibh, 'n uair a tha trioblaidean agus deuch-
ainnean a crannchuir ag cur dragh air a h-inntinn.
Mar thuir am Bardefein,—“Chabhiodh e furasda tachairt
air loch air bith eile d'a mheudachd fein a's boidhche na
Loch-aice,—an t-aon loch uisge tha ri fhaotainn ann am
fearann Chomhail.” Bu duilich duan ni bu mhillse
fhaotainn, na duan Mhic-Cholla air an loch
iomraideach so:—

Loch mo ghaoil sa thar gach loch
'Se Loch-aic a' bhroilleach chiuin
Air an tric an luidh n' gath-grein
Soillseach mar uchd seimh mo ruin !

Loch nam bruach a's uaine neul—
Loch nam bradan tarr-gheal, trom,—
Ged nach faicear long nan crann
Null no nall ort 'gearradh thonn,

S' leat an eala 's aille com,
'S i neo-throm air d' uchd a snamh,—
Eun a's gile cneas na 'ghrian,
Sneachd nan sliabh, no leannan baird !

* * * *

Loch mo chridhe ! thoir dhomh fein
Oidhche Ceitein ann ad chuairt
A measg faile roid a's fraoich,
'S toirm nan leum-uisge 'n ara chluais,—
Boillsge gealaich air an raon,
Dealt na h-oidhche air gach guc,
'S rionnagan, 'n an siubhal siar,
Le 'n gloir fein 'cur sgiamh air d'uchd,—

* * * *

Ged a dh' fhoghnadh so, a dh' fheuchainn buaidh a
Bhaird air a bhi luadh maise naduir, cha 'n urrainnear
dol seachad air an dan shnasail do Abhainn Ruaile:—

A Ruaile an aigh !
 A Ruaile mo ghraidh,
 Cha 'n ioghna na baird bhi 'g aithris ort ;
 Bho d' bhun gu do cheann
 'S leat maise neo-ghann
 Nach teid re mo linn as m' aithre-se ;
 'S tu fein an sruth tla
 O mhoch-thrath gu trath nan rionnagan,
 Le slat no le mor' ath
 'Toirt cuimhneachan searbh
 Do chuirteir nam meanbh-bhall lannaireach.

 O, abhainn gun steidh !
 'G ad choimhead an de
 Gu'n d'chuir thu gua bhreig, plath-fathar orm,—
 An sud thu a nuas,
 An so thu a suas
 'N ad mhuilleine cuairteag aighearach ;
 An so thu a falbh
 Gu h-athaiseach, balbh ;
 An sud thu, le toirm na gaillinne,
 A' cur na reis chruaidh
 A bheir thu le buaidh,
 Gu fochair nan cuan-shruth salainneach.
 * * * * *
 Sruth-tathaich nan corr—
 'S tric dh' eisd mi 'n a d choir
 Fead sealgair nan eun-chu cuinneineach,
 Maoth-mheilich nan uan,
 Ceol uiseag a's chuach,
 'S guth mhaighdean mu'n bhuaille chumanach
 Ceol eile, 'n ad sgath,
 Cha tearc, ma's fìor dha,
 'N cluais buachaille ban nam mullaichean,—
 Ceol theud bho thorr-sith,
 'S na "daoine" gun dith
 Cruaidh-dhannsa air druim an tullachain !

 Ged 's fhada bho 'n re
 Chaidh dith air na feidh,

'Am monadh do mha'ir-uisg' bhiolairiach
 Ri d' thaobh air a sgiath
 'S tric leonar cearc-liath,
 'S theid peileir a'n cliabh na h-iolaire,
 Cha 'n sinneamh 'n ad bhurn
 Thig deireadh air muirn
 Dubh-dhoran a chuirn le 'mhuirichinn,
 'S an ruadh-bhoc, gun taing
 D' a easgaidean seang,
 Thig tric ann ad Ghleann gu duillichinn.

O ! Gleann nan gorm raon,
 O, Gleann nam ban caoin
 Dh' fhas or-fhaltach, beul-bhinn, ceanalta—
 Mnaidh og nan gruaidh dearg,
 'S nam pearsa gun chearb
 Fhuair urram na h-Alb' gun cheannachadh,—
 Mo bheannachd 'n an deigh !
 B' e 'm bard os cionn ceud
 A mholadh mar 's coir am bannal ud :
 Ged 'chaitheadh e bliadhn'
 A' leantuinn a mhiann
 An deicheamh de'n sgiamh cha chanadh leis.

Chunnaic sinn gu robh am Bard gu tric, ann an laithean
 oige ag iasgach an sgádain. B'e ainm a bhata's am biodh
 e ri sin "Mairi Chreag-a'-Gharaidh" agus do n iurach
 so rinne duanag ghrinn de'm bheil na rannan so 'n an
 eisimpleir math:—

* * * *
 Ri am ruith nan reisean,
 Mach 's a chomh-stri gheur thu
 Mar gu'm faicte faoileann,
 'Snamhadh caoil 'measg thunnag.

Coma co'm fear uaibhreach
 Bheireadh dhiot am fuaradh,
 Bu leat falach-cuain air
 Aig ceann shuas do thuruis.

'Nuair thig am an iasgaich,
Co ach thusa 'chiad aon
Do roinn fein ag iarraidh
Ceart cho dian ri sulair.

Cha bu tusa mhaldag
Thilleadh mar a dh' fhaig thu ;
S' ann a chleachd mo Mhairi,
Liontan lan o'n bhuinne.

Tha measgadh do mhire 's do mhagadh anns an duan
air "Coilich-Dhunain Loch-Ruaile," far bheil am Bard
ag aithris mar a chaidh Tailleir agus Greusaiche a dh'
iasgach sgadan, gun eolas aca air bata no lion a laimh-
seachadh :—

Ciod an stath dhomh bhi 'g innseadh
Mar a theab iad a lionadh,
Mar a ghreas iad gu tir leath'
'S mar a thill iad ri 'm fuaigheal ?
Ho ! na maraichean cuiseal, etc.

'S a bhliadhna 1832, 'n uair a bha 'n Fhraing a' bagradh
dol a chogadh ri Breatunn, chaidh Feachd-duthcha a
thogail anns am b' fheudar do aireamh shonraichte do
dhaoine oga na duthcha gabhail. Ach bha cuid do ghill-
ean cho gealtach 's gu'n d' fhuair iad teisteanais o na doc-
tairean nach robh iad 'n an slainte 's nach b urrainn
daibh gabhail 's an arm. Bhrosnaich so fearg a Bhaird
agus sgiurs e iad anns an oran "Laoich-Taobh-na
Griosaich" :—

'Si so bliadhna nam bachdach 's fearr astar na cach
'S i so bliadhna nan stacach bheir feairt air na 's aill,
Bliadhna laoch nan euchd tapaiddh 'n am itheadh a chail,
Ach tairg dhoibh an gunna, 's theid guileag an aird !

Bliadhna laoch na meis bhrochain,—fir sgairteil gu leoir
'N am rusgadh nan cnap no 'cur core ann am feoil—
Na 'm b' fhirinn an deicheamh de'n leth-sgeulan broin,
B' fhaoin eucailean Lasarus lamh ri'n cuid leon.

A' leantuinne so tha oran do na laoich a dh' eirich aig
gairm an cuthcha :

'N uair tha'n Fhraing a' bagradh bhuillean,
'S mithich bhi cur suas na culaidh
'S tric chuir sgath air al nam muilleag,
'S a dh' fhag Breatunn ceannsail,
Buidh leis an fheile phreasach, etc.

Mar dhearbhadh gu robh cridhe maoth, cho math ri
suil gheur aige, tha againn duanagan do'n "Uiseig"
agus do'n "Lon Dubh" :

* * *

Till, m' eun centach,
Till, mu'n d' theid thu
Far nach faod mi
Tuille d' eisdeachd,
'S mu 'm fag treubhan
Binn nan speura
Air bheag gleusaidh
'N cruitein fein a dh' fhuoghlum bh' uait !
Feuch nis, gu d' chuach
'S an lag ud shuas
Thu tigh'n le luath's
Na dreige, nuas !
'S math thoill do dhuan
Bho d' leannan suairc'
Blath-fhailte 's cluaineas sholasach.

Agus do'n "Lon Dubh" :—

A loin-duibh, a loin duibh, is gle bheag tha thu'm feum
Air bhi teicheadh uam fein le do cheol :—
B'e 'n sealgair gun umhail a chuireadh 'n ad dheigh
An luaidh leis am faodadh do leon.

A loin-duibh, a loin-duibh, 's leat-sa 'n diugh thar gach eun
An ribheid a 's fearr thig ri m' fhonn ;
S dearbh leam nach e idir an uireasbhnidh fhaoin
Dh' fhag d' oran cho dolasach, trom.

* * * *

A loin-duibh, 'n e gu'n d' fhuair an druid buaidh ort ri ceol
 Aobhar uaigneach a' bhronn tha 'n ad chrìos ?
 No 'n d' fhuair thu an nead 's an robh d' iseinean og
 Air a chreachadh le garlach gun iochd ?

A loin-duibh, a loin-duibh, an d'thug clamhan an t-sleibh,
 No 'n speireag bhuait d' aon-leannan graidh,
 'G ad fhagail an diugh air an doigh so a' caoidh,
 Gle dhiamhain, a caomh-chomunn blath ?

A loin-duibh, ma 's fìor sud, tha mi duilich do d' thaobh,
 Le co-fhaireachdainn chaomh, mar is dual
 Do neach tha, 'n ad chor, 'faicinn ceart a chor fein :—
 Eisd, 'us innsidh mi aobhar mo ghruaim.

A loin-duibh, 's dearbh gu'r cuimhne leat ribhinn mo ghaoil,
 An cailin a b' aobhaiche snuadh.
 'S is tric a dh' eisd comhla rium oran bho d' bheul,
 Ann an coill' Bhaite-'n-t-saoir a' n sud shuas.

A loin-duibh, mar dhriuchd Maighe fo bhath-shuil na grein'
 Bho'n talamh rinn m' eudail grad-thriall ;
 Bha h-iomhaigh cho neamhaidh 's nach ioghnadh leam fein
 Na h-aiuglibh bhi 'n deigh air mo chiall.

A loin-duibh, a loin-duibh nis a'n coille nam blath—
 Leig leam a bhi lamh riut a' caoidh :
 Cha n-ann do na h-uile eun dh' innsinn-se fath
 Trom osnaidhean craiteach mo chridh !

Ach stadam mo bhron : 's olc mo choir air bhi 'caoidh,
 'Cur milleadh air aoibhneas mo ghraidh ;
 B' fhearr sealltainn gu foil air an doigh anns am faod
 Mi bhi fathasd 'n a caoin-chaidreamh blath.

Tha gradh a Bhaird air Tìr nam Beann air fhoillseachadh
 's an oran a chuir e a'm beul an Eilthirich Sgiathan-
 aich a'n Tìr Chein :—

O, air son seachdainn de fheachd na Feinne
 Gu crathadh cruaidh thoirt do'n chuanal bhreunail,
 Tha, air sgath siol circ'-liath 's na h-eilde,
 A' creach 's a' cradh sliochd nan sar-laoch treun ud !

Na 'm biodh tu tighinn uair eile 'Thearlaich,
 Feadh ioma gleann san robh suinn gun aireamh
 A rachadh uallach gu buaidh no bas leat
 'S e 'm fiadh 's a chaor' bhiodh amhain 'cur failt' ort.

O, gu ma luath thig an uair a chiotar
 Do thriathan sanntach a'n cuing nach caomh leo,
 Sliochd dhaoine coir air gach laimh 'g ad lionadh,
 A's tim nam bairlinn gu brach air di-chuimhn'!

A' tighinn gus na h-Orain Ghaoil, tha saoihbreas de bhardachd againn air leannanachd, agus air ciuin-smaointean a chridhe. Cha cheadaich uine no aite dhuinn eisimpleirean a thoirt a'n so, ach tha iomadh oran 'n am measg is airidh air cliu, agus tha cuid diubh a tha ann am beul an t-sluaigh anns gach cearn do'n t-saoghal far am bheil Gaidheil ra'm faotainn. Mar sgriobhadair oran ghaoil tha Mac-Colla a foillseachadh breithneachaidh agus buadhan an fhior-bhaird. Tha a chuid oran stuama, beusach, gun aon fhacal a bheir rughadh gu gruaidh an aon a's modhaile beachd, ach cha 'n 'eil cion neart no doimhneachd faireachdainn orra. Thaspionnadh agus grinneas cainntannta nach eil tric ri'm faotainn ann an orain ghaoil an la an diugh.

A ghabhail air a cheile, tha obair Mhic Cholla airidh air na chaidh a radh a'n so agus le daoine eile as a leth. Ma's e crìoch araidh na bardachd taitneas agus toil-inntinn a chomh-phairteachadh do 'n duine, tha an comharradh sin gu follaiseach air obair Mhic-Cholla. Tha am Bard a's sealtainn air obair a Chruithfhir le ard-urram agus tha e tarruing deabhl a chuspair le dilseachd do'n fhirinn, a's ann an doigh a tha ro-thaitneach do'n chluais. Tha min-eolas aige air teudan a chridhe agus tha e gleusadh a ghuth a reir nan smaointean a tha gluasad a cho-chreutairean; tha e a' deanadh gair-

deachais leo-san a tha aoibhneach agus broin leo-san a ta ri bron. Mar so tha facal freagarrach aige air gach steigh, agus tha elabhairt ann an seanachas, eagnaidh, ceart. Thug sinn fainear cheana, gu bheil na h-orain Bheurla a rinn e ion-mholta, 's gu 'n do choisinn iad dha aite am measg bhard ainmeil ar linn. Tha aige, a thuilleadh air so, aireamh ghasda do dh'orain air riaghladh agus uachdaranachd dhuthchana, nach deachaidh riamh a' n clo. Tha cuid diubh cumhachdach ann an seanachas agus geur ann an beachd, agus ma chi iad solus la, cha toir iad dad bho 'n chliu sin a tha MacColla a nis a mealtainn ann an lan tomhas.



AN SIORRAM MAG-EALAIR.

B'ann air la grianach, samhraidh a chuir mi eolas
antoiseach air an t-Siorram Mac-Ealair. Thachair
dhomh bhi air mullach an t-sleibhe a tha'g eiridh air
taobh cùl baile Hamilton, Ontario, ag amharc air an t-seall-
adhoirdheirc a tha ri fhaotainn do 'n duthaich mu 'neuaire.
'N a sheasamh dluth orm bha duine sultmhor, coltach, a
bha, a reir coslais, a geur bheachdachadh air soithichibh
seolaidh a bha dol 's a tighinn air a bhagh f'ar comhair.
Bha cruth 'us coslas a Ghaidheil air o bhonn a choisge gu
mullach a chinn. Bha e slinneanach, ard, 'n a phearsa,
cuimte 'n a dhreach; duine gramal, laidir, aig an robh
spionnadh mor ann an laithean oige: agus bha a ghnuis
chaoimhneal, dhuthchasach ro thaitneach ri faicinn.
Bha, mar gu 'm biodh, co-chordadh eadar inntinn an t-
Siorraim agus an t-seimheachd a bha 'n a laidhe air
aghaidh bhoidheach naduir. Bhiodh e dualach do neach
a bhi air a thaladh a dh' ionnsuidh duine cho suilbhir,
agus gun mor mhaillle, bha sinn a' conaltradh ri cheile.
Bha e follaiseach gu 'm b' e duine e aig an robh gradh
mor do Chanada. "Bhiodh e duilich dhuit," thuirt e,
"sealladh cho briagh ri so fhaicinn ann an aite sam bith
eile fo 'n ghrein: cha 'n 'eil mi 'n duil gu'm faiceadh tu a
lethid air feadh na Gaidhealtachd fein. Is i so gu



AN SIORRAM MACEALAIR.

cinnteach lios Ontario. Tha am baile soirbheachail ; na marsantan ag deanadh storais, 'n an doigh fhoighidinn-each fein ; agus cha 'n 'eil raon uaine cho fad 's a chi an t-suil, nach eil torach le teachd-an-tir ; tha an sluagh sona, sealbhach, agus gu fortanach, tha moran diubh bho thir an fhraoich 's a mhurain, ar luchd-duthcha fein." Agus b'ann mar sin a bha. B' iomadh marsanta 'us tuathanach Gaidhealach a sholair dachaidh chomhfhurtail ann am baile Hamilton agus 'na choimhearsnachd. Aig an ceann tha an Siorram e fein. Tha a cheann 's a chridhe aig seirbhis a luchd-duthcha " na h-uile la a chi 's nach fhaic," 's cha bhiodh coinneamh Ghaidhealach faisg no'mfagus coimhionta as aonais. Re a bheatha fhada nochd e ann an iomadh doigh, a reir na cothraman sonraichte a bh'aige, gu'm bu charaid daingean e do na Gaidheil, agus tha e an diugh a' mealtainn earbsa agus meas a luchd-duthcha.

Ged a tha Siorram Mac-Ealair 'na Ghaidheal do na Gaidheil, a' labhairt Gaidhlig ghlan, phuncail, 's a faotainn tlachd a chridhe ann an cleachdaidhean 's ann an cliu a shinnsre, gidheadh cha b' ann a'n Tir nam Beann" a fhuair e eolas air seanachas agus gnaths nan Gaidheal. Rugadh e, ann an siorramachd Earra-Ghaidheil, ach cha robh e ach fichead mios a dh'aois 'n uair a chaidh a mhuinntir air imrich gu Canada. B'e ainm athar, Padruig Mac-Ealair. Rugadh e 's a bhliadhna 1784, ann an Ionaraora. 'N uair bha e 'n a ghille og, bha e ri ciobaireachd air na bailtean caorach fagus do aite 'breith. B' e an deis a chleachd e, am feileadh beag 's am breacan, le curachd Ghlinne Garaidh. Le bhata 's le chu bha e 'n a dhiulanach coltach, agus cha b'fhada gus an do leon e cridhe maoth

Fhionaghala Nic-an-Aba, callin sheimh, shuairce a bhuineadh do'n Eilean Ileach. Air dhoibh posadh ghabh Padruig Mac-Ealair, mar ghille fearainn, aig Col. Iain Mac-an-Tuarnair, air baile "Mam" ann an Gleannsiora, mu thri mile o chaisteal Ionaraoraidh. B' anna'n so, air an trileamh la do'n dara mios (An Gearran,) 'sa bhliadhna 1816, a rugadh an Siorram. Thugadh Gilleasbuig, mar ainm air. Tha e coltach gu robh bean a Choirnileir 'n a bana-mhaighstir smachdail, spreigeach. Cha b' ainmic idir do'n luchd-obair a bhi air an cronachadh 's air an caineadh le a teangaidh gheur, fhrionasach, agus cha robh an crannchur air a bhaile an comhnuidh ro-shocaireach. Bha Mac-Ealair a treabhadh, air latha Earraich 's a bhliadhna 1817, agus thainig caraid far an robh e legnothach araid a chum e beagan mhineidean a bruidhinn ris. Chunnaic a bhana-mhaigstir e'na sheasamh air an raon agus fhuair i coire mhor dha airson a bhi diomhain, ged nach robh an uine ach goirid. Ghluais so inntinn Phadruig, agus an aite dol air aghairt leis an treabhadh, leig e as na h-eich agus chuir e 'san stabull iad. Chaidh e dhachaidh agus thuirt e ri bhean "Ma tha aite fo'n ghrein anns an urrainn domh a bhi saor o chuing thaireil an dubh-sheirbhhis, theid mi 'n sin." "Theid sinn comhladh," fhreagair a bhean: agus ann am beagan uine bha tri teaghlaichean, anns an robh naoinear pearsa, air an turus gu Canada. Ghabh iad comhnuidh ann an Aldborough aig ceann an iar Ontario far an do shoirbhich iad gu ro mhaith, 's far a bheil aireamh mhath do'n gineal gus an la'n diugh.

Bhuineadh am fearann air an do shuidhich iad, do Choirnilear Talbot a fhuair coirichean air slios farsuing dheth o'n chrun. Bha gach tuathanas air a chomharr-

achadh am mach le luchd-tomhais agus bha da cheud acair 's gach aon diubh. Ach cha d' fhuair an luchd-aitich, ach leth-cheud acair gach neach ; chumadh ceud-gu-leth le Col. Talbot mar dhuais airson a bhi suidheachadh an fhearainn ! Bha aireamh bheag do Ghaidheil, 'us Gall no dha, ann an Aldborough 'n uair a rainig cuid-eachd Mhic Ealair. Thug iad aoidheachd bhath do'n luchd-turuis agus gach cuideachadh a bha 'n an comas airson dachaidhean a thogail 's an fhasach. Is tric tha cuimhne an t-Siorraim dol air a h-ais a dh' ionnsuidh nan laithean sud, 'n uair a bha athair 's a choimhearsnaich a gearradh sìos na coille dhomhail, 's a ruamhradh, 's a glanadh an fhearainn fhiadhaich a chum gu a bhi g'a thoirt fo chuing do'n duine. Bha iad 'nan daoine treun sgairteil, a chuireadh an aghaidh ri cruadal, 's nach tugadh geill fhad 's bu bheo iad. Agus bha na mnathan de'n smior cheudna. Cha bu bhoirionnaich lag-chridheach, no lag-dhruimeach iadsan. B'e taghadh ar duthcha iad. Is abhaist do'n t-Siorram a bhi 'g innseadh naigheachd mu chailin a thachair air aig Quebec, mar eisimpleir do'n mhuinntir a rinn tir bheartach de'nduthaich so. 'N uair a bha Parlamaid Chanada na suidhe aig Quebec 's na bliadhnaibh 1861-62-68-64, b'abhaist do'n t-Siorram, a bha aig an amsin 'na bhall do'n pharlamaid, agus do Mhr. Alasdair Mac-Coinnich a bhi dol a choinneachadh nam bata-smuid o Glaschu agus a bh toirt seolaidhean 'us comhairle do luchd-duthcha sam bith a dh'fhaodadh tachairt riu. La do na laithean, thainig boirionnach og, tapaidh o'n luing, gun bhrogan oirre. Dh'fheoraich iad an robh brogan aice, 's fhreagair i nach robh ; gu'n do sguabadh iad o bhord a luinge ; ach ars' ise, "ma gheibh mi obair cha 'n

fhad a bhios mi 'cosnadh feadhain uire." Bha na daoine cho toilichte le misneachd agus tur na cailin, 's gu'n do thairg iad brogan a cheannach d'i 'nan rachadh i le gu marsanta. Sheall i gu geur orra, 's ma dheireadh chaidh i comhladh riu gu buth greusaich, a bha air taobh tuath na h-aimhne. Dh' iarr iad air an duine a bha frithealadh 'sa bhuth, brogan cho math 's a bh'aige a thoirt d'i. "Ciod e 'n seorsa tha dhith ort?" dh'fheoraich an duine. "Tha ars' ise, "deagh phaidhir le guiseadan annta." Cha do thuig an duine i agus dh' fheoraich e a rithist. Fhuair e an fhreagairt cheudna agus a barail nach mor a b' fhiach greusaich a bha cho aineolach. Ach fhuair i na brogan agus chunnaic an luchd-parlamaid i air a turus gu coilltean Ontario far an seasadh a h-inntinn chalma, neo-sgathach ni b' fhearr d' i na 'n t-or.

'S a bhliadhna 1821, 'n uair a bha an Siorram eadar coig 'us sea bliadhna a dh' aois chaidh a chur do'n sgoil, a bha mu mhile o thaigh athar. Is minic a bha deagh fhoghlum ri fhaotainn ann an taigh-sgoil suarach, ach cha robh aon chuid foghlum no comhfhurtachd a b' fhiach dad anns an taigh-sgoil do'n deach Mac-Ealair. Cha robh ach aon seomar s' an taigh. Ann an so bha 'n clann a cruinneachadh 's a gheamhradh. 'S an aite cheudna bha an leaba dh' s' am biodh am maighstir-sgoil a cadal re na h-oidheche, innealan cocaireachd, soithichean, agus nithean eile a bhiodh feumail ann an taigh-comhnuidh. Ann an aite de'n t-seorsa so, cha robh e comasach smachd a chumail air na balaich, no an ionnsachadh anns na priomh-theagasgan a bha air an cur orra. Cha robh ach leughadh, sgriobhadh agus beagan cunntais air an teagasg. Cha robh maighstir

sgoil 's a chearnaidh sud do'n duthaich a b' urrainn *grammar* a theagasg roimh 1830. Anns an sgoil so dh' fhan Gilleasbuig gus an robh e faisg air ochd bliadhna. Mharbhadh am Maighstir-Sgoil (do'm b' ainm Calum Robastan,) le craoibh a thuit air agus dhuineadh an sgoil. Chaidh Gilleasbuig gu sgoil eile do'n aon seorsa, re da no tri bhliadhnachan ach cha d' fhuair e moran feum asda. An sin thainig fear-teagaisg o Albainn a bha 'n a mhaighstir air a dhreuchd agus a shaothraich re tri gheamhraidhean aig Aldborough. Rinn Gilleasbuig gu math fo theagaisg an duine so, agus fhuair e air aghairt gu luath anns na cuspairean a bha air an teagaisg dha. An deigh so chaidh e gu Sgoil *Grammar* Dhr. Whitelaw, aig Niagara far an do choisinn e cliu mar sgoilear. Bho Niagara chaidh e gu Geneva, New York, gu sgoil a bha ainmeil aig an am sin. Ann an 1836 reic athair an seann aite air an do shuidhich e ann an Aldborough agns cheannaich e coig ceud acair ri taobh amhainn Thames aig Raleigh ann am siorra machd Chent, tri mile o bhaile Chatham. Air an aite so dh' oibrich Gilleasbuig gus a bhliadhna 1849—re thri bliadhn' deug—agus an sin tboisich e ri gnothach marsanta fiodha, ni anns an do shoirbhich leis gu mor. 'N uair a dh' eirich Uilleam L. Mac-Coinnich 's a bhliadhna 1837, an aghaidh droch riaghladh na tire, bha Mac-Ealair 'na dhuine og, sgairteal agus chaidh e a mach le cuideachd do dhaoine air taobh a chruin, ach cha robh e fein no a chuideachd d'am buineadh e air an gairm gu blar 's cha 'n fhac e leus dearg a chogaidh a bha air a lasadh aig an am.

Ged nach d' fhuair Mac-Ealair cothram air a ghaisge a nochdadh's a bhlar chogaidh, bha cothram, do'n d' rinn

e deagh bhuil, aige gu bhi saothrachadh airson a dhuthcha, ann an slighibh na sith. 'Sa bhliadhna 1841, thainig e a mach air taobh Ioseph Wood a bha seasamh airson na parlamaid ann an siorramachd Chent. "Bha e 'na dhuine cho onarach 'sa chunnaic mi riamh," thuirt Mac-Ealair, mu dheighinn, bliadhnachan an deigh so, "ach bha e gu tur gun fheum." Bha an strith eadar. Mr. Wood agus Mr. E. B. Harrison 'agus bha i ro dhian. Chaidh Mac-Ealair air feadh an t-sluaigh bho cheann gu ceann do'n t-siorramachd agus rinn e obair mhor. La nodha roimh la an taghaidh thainig an Ridre Alan Mac-an-Aba a dh' ionnsuidh Cent agus sheas e an aghaidh an dithis eile. Chaidh moran do 'n luchd-taghaidh tharais d'a thaobh agus shaoil luchd-cuideachaidh Mhr. Wood, gu'n rachadh an la 'n an aghaidh. Ach cha b'ann mar sin a thachair. Bha ughdarras Mhic-Ealair cho mor am measg nan Gaidheal, a bha a nis air fas lionmhor, 's gu'n dosheas iad leis mar aon duine. Chaidh Mr Wood a thaghadh agus thug an duthaich air fad moladh do Mhac-Ealair mar an duine thar gach neache eile a thug an ni gus a chrìoch so. 'Nuair a bha ainm, mar so, ann am beul an t-sluaigh, bha e air a thaghadh, 's a bhliadh na cheudna, 'na bhall do bhuidhinn riaghlaidh siorramachd Chent, agus re coig bliadhna deug chum e an t-aite sin, a'cosnadh cliu mar fhear riaghlaidh glic, earbsach agus comasach. Cha robh dleasannas fear-riaghlaidh siorramachd, furasda 's na laithibh sud. Ann an duthaich uir, a tha ri fosgladh suas 's ri suidheachadh, tha gnothaichean ni's cudthrom- aiche, agus ni's duiliche an cumail air doigh, na tha iad gu coitcheann ann an seann duthchana, far am bheil laghana air an steidheachadh, agus dleas-

annas gach cuirt a's buidheann-riaghlaidh air a chomharrachadh a mach gu puncaill, eagnaigh, air chor 's nach 'eil e furasda do dhuine aig am bheil plagh sam bith mearachd a dheanadh. Re deich bliadhna bha Mac-Ealair ann am Parlamaid Chanada, bho 1857 gu 1867, 'n uair a thugadh a steach mor-roinnean na duthcha fo aon bhonn riaghlaidh. An deigh sin shuidh e ann am Parlamaid Ontario gu 1875, a bhliadhna 's an 'd fhuair e gu bhi 'n a Shiorram air siorramachd Wentworth anns a bheil baile Hamilton air a shuidh eachadh. Anns a pharlamaid, aig Quebec agus Toronto, dh' eirich e gu inbhe ard. Bha a bhuadhan soilleir agus comharraichte. Bha e cumhachdach ann an labhairt, air beulthaobh sluaigh na tire agus fa chomhair maithibh na parlamaid. Bha a bheachdan geur, a chainnt sgaiteach ann an conspaid, agus druiteach ann an comhairle ; bha e deas-bhriathrach, eallamh, agus b' urrainn d'a oraid tharbhach a dheanadh gun mhor ullachadh, air cuspair sam bith a dh' fhaodadh tighinn fa chomhair taigh na parlamaid. Bha a bheachdan farsuing, fialaidh, a ghnath air taobh an t-sluaigh. Bha e 'na thur neirt dhaibhsan a bha air ceann na buidhne a bha tagradh saorsa do'n t-sluaigh. Chuidich e le uile neart Seorus Mac Ille Dhuinn, Alasdair Mac Coinnich agus na daoine ainmeil eile a bha a saothrachadh air taobh a cheartais. Bha e air leth feumail air feadh na duthcha. Bha earbsa aig an t-sluaigh n' a onair agus 'n a threibhdhireas agus chuireadh iad an dochas ann, 'n uair nach eisdeadh iad ri guth nam fear meallaidh. Is iomadh sgeul iongantach a tha air aithris mu obair Mhic-Ealair anns na h-ama sud. Cha chuireadh stoirm a gheamhraidh sgath air turus a

ghabhail troimh na h-aitean a b' fhiathaiche do'n duthaich. Bha e anabarrach laidir, 's 'n uair a bhitheadh an rathad ro gharbh airson dhamh no eich, rachadh e air a chois troimh choilltean 'us bhogaichean gu crìch a thuruis. Am measg nan Gaidheal bha e 'na fhear-stiuiridh ann an cuisean na duthcha. An taobh air am bitheadh Mac-Ealair, bhitheadh an aireamh bu mho dhiubh, oir b' ann diubh fein e, agus bha iad proiseal as. Chuir a chomh-oibrichean iomadh dleasannas cruaidh mu choinneamh. B' esan a tharruing a mach Mr. Eideard Blake a tha a nis 'n a bhall do pharlamaid Bhreatuinn. Agus b' esan a fhuair aite airson Mr. Mowat, 'n uair a leig Mr. Blake sìos a chomann ann an Ontario gu bhi dol air ceann nan *Liberals* ann an Ottawa. Bha e 'n a mhinistear do' n chrùn re iomadh bliadhna agus bha a lamh ri faicinn air aireamh mhor do laghana na tìre. B' e so gu sonraichte a chuis, anns na laghana a tha riaghladh nan gnòthaichean a bhuineas do bhailtean agus shiorramachdan. Bha eolas mor aige air cor an t-sluaigh agus thug e gu buil iomadh lagh airson an crannchur a leasachadh. Bha e, mar an ceudna, treubhach ann a bhi toirt sochairean na *railway* do dh' aitean a bha fad as bho bhailtean mora, ach anns an robh moran sluaigh a comhnuidh.

Anns a bhliadhna 1875, mar a thug sinn fainear, chaidh a dheanadh 'n a shiorram air Wentworth, dreuchd a tha e a' leantuinn gus an la an diugh. Ach cha robh an cogadh fathast seachad agus cha d' fhuair e thairis air an upraid a tha mar is trice a' cur dragh air luchd-dreuchd na tìre. Cha b' fhada a bha e 'n a shiorram gus an fac e gu robh an


luchd-lagha a creachadh araon nan siorram agus an t-sluaigh, le 'bhi togail cise mi-laghail diubh. Chuir e a chuis so fa chomhair an luchd-riaghlaidh agus an deigh strith chruidh nach 'eil gu buileach thairis fathast, chaidh leasachadh a dheanadh a tha' a' cur dìon air a mhuinntir a theid gu cuirt, bho chrogan gionach an luchd-lagha ach cha deachaidh ceartas a dheanadh fathast do na siorraman.

Ach 's ann mar Ghaidheal, am measg a luchd-duthcha, a tha 'n Siorram Mac-Ealair aig a neart. Tha gradh aige do Chanada mar bu dual do neach a rinn na h-uiread air a son, ach tha a chridhe a plogartaich le teas-ghradh do Thir nam Beann. Tha e min-eolach air eachdraidh na duthcha sin anns an d'araicheadh athraichean. Tha e cuimhneachail air a luchd-cinnidh, agus cha 'n 'eil ni sam bith cho taitneach leis ri bhi cosnadh an deagh-ghean 's an run. Tha e 'na dhuine fialaidh agus is tric a lamh 'na phoca d'a luchd an uireasbhuidh. Tha e 'na bhall urramach agus 'na ard cheann-iuil do Chomunn Gaidhlig Thoronto, 's an ni ceudna do Chomunn Hamilton. Aig na coinneamhan bliadhnail, tha e daonan comhla riu g' am misneachadh, 's g' an comhairleachadh a bhicumail suas cliu an sinnsre. Cha 'n 'eil moran d' a lethid air am fagail 'n ar measg, ach ged a tha an aois a laidhe air, 's a chiabhagan liath air tanachadh, 's e durachd agus dochas Gaidheil Chanada gu 'm bi e fada air a chaomhnadh gu bhi mealtainn solas agus toil-inntinn am measg a chairdean 's a luchd eolais.

DAIBHIDH SPEINSE

“ Do smaointeannean glise,
Le misnich 's le ceill,
Do thuigse ghlan, gheur,
'S deagh thuiteamas beoil.”

MA tha aon neach thar neach eile ann an Canada is airidh air an ainm, Caraid nan Gaidheal, a rinn eadh iomraiteach le Tormoid Mac Leoid, ar lean gur e esan mu'm bheil an t-iomradh goirid so air asgriobhadh. Tha na ceudan d' ar luchd-duthcha 's an tìr so, air an do bhuilich e mor chaoimhneas agus d' an d' thug e furtachd ri am an eigin. Sheas e air an taobh le dilseachd fir-cinnidh, agus tha ainm air a chuimhneachadh le urram, am measg mhuinntir a tha a nis beannaichte le cuibhrionn maith do theachd an tìr, do 'n d' thug e combairle agus cuideachadh 'n uair a bha iad 'n an coigrich 's an tìr, 's am poca fallamh. A bhi deanadh maith, gu sonraichte d'a luchd-duthcha, bu mhiann leis riann, agus mar a thuirt an sean-fhacal ; “ far am bi 'n toil, bithidh 'n gnìomh.” B'i sin a chuis, ann an tomas araidh, d'a thaobh-san. Bhuilich a chrannchur 's a shuidheachadh cothraman air nach bu ghann, agus chuir e iad gus a bhuil a b'fhearr a b'urrainn d'a. Ag amharc air ais da-fhichead bliadhna 'us corr, anns an duthaich so, b'urrainn d'a naigheachd innseadh air na rinn na Gaidh-



DAIBHIDH SPEINSE.

eil a chum na coilltean a reiteachadh agus an tìr fhosgadh suas, a bhiodh eibhinn ri cluinntinn, oir tha e min-eolach air na h-aitean anns an do shuidhich iad, air dhoibh Canada a ruigsinn, bho thoiseach gu meadhon na ceud bliadhna so, cuid diubh gun sgillinn ruadh 'n an sporran, 's gun dad 'n an cridhe ach gamhlas 'us mirun do na daoine cruaidh-chridheach leis an robh iad air am fogradh gun iochd, thar a chuan. Cha robh caraid a thachair orra air an taobh so do'n fhairge a b'fheumaille dhoibh na esan, a thagair an cuis 's a sheas air an ceann 'n uair nach robh comas aca moran a dheanadh air an son fein.

Rugadh Daibhidh Speinse anns an Eilean Ileach, dluth air baile Thorra, far an d'araicheadh e. Tha dluth air an trì fichead bliadhna 's a deich o'n chunnaic e solus la an toiseach, agus tha da-fhichead 's a sea bliadhna o'n dh'fhag e laimhbrig Ghrianaig airson Chanada. 'N uair a bha e gle og chaidh e gu sgoil an Urramaich Alastair Grand a tha a nis ann an siorramachd Bhruis, an deigh sin do sgoil Bheul-an-ath far an robh Mr. Seumas Ros 'n a mhaighstir-sgoil. Fo theagasg-san fhuair e air aghairt gu ro-mhaith, ag toirt dearbhadh gu moch gu robh buadhan inntinn thar a choitchiontas aige. Bho Bheul-an-ath chaidh e gu sgoile Bhowmore, aon sgoil cho ainmeil 's a bha'n Gaidhealtachd na h-Alba, a mach o na sgoiltean arda a bha 's na bailtean mora. B' e Iain Tailleir a bha 'n a mhaighstir sgoil. Bha e 'n a dheagh fhear-teagaisg, gu h-araid 'sna canainean Ladainn 'us Greugais, us ann am Beurla. B' e athair do Chalum C. Tailleir, ard fhear-teagaisg ann an Talla Dia-dhaireachd na h-Eaglais steidhte ann an Duneideann. Chuir an Tailleirach combarradh a theagaisg air iomaigh

giullan beo-inntinneach a rinn ainm d' a fein ann an curs' a bheatha. B' ann diu Tomas Pattison a dh' fhag ainm nach searg am fad 's a bhitheas meas air orain nan Gaidheal. Bha e frithealadh a'n sgoil aig an aon am ri Daibhidh Speinse. Bha Mr. Domhnall Mac-Na-Ceard-adh dol do sgoil Bhowmore aig an am cheudna. An t-eolas agus an cairdeas a chuir na gillean air a cheile fo sparraibh taighe Iain Taillear chum iad suas gu dluth, blath-chridheach, gus an la andiugh. Thainig Mr. Mac-na-Ceardadh do Chanada agus bha e fein agus Mr Speinse 'n an coimhearsnaich 's 'n an co-luchd-oibriche, re iomadh bliadhna. 'N uair a dh' fhag e sgoil an Taill-ea-raich, bha e air a ghrunndachadh gu daingeann ann am foghlum. Bha eolas math aige air na canainean, air eachdraidh, 's air litreachas an t-seann saoghail; air ealain aireamh, 's air na cuspairibh eile air am bughnath le oileanaich oga, bhreithneachail, a bhi fiosrach. Ach cha d' thug e thairis a bhi 'togail foghlum cinn 'n uair a dh' fhag e an sgoil, agus faodar a radh nach d' thug e thairis cleachdadh an oileanaich gus an la 'n diugh. Dh' ol e am fìor-uisge bho thobar an eolais, agus, mar is dual, an aite 'bhi air a shasachadh, dh' fhas iotadh ni bu mho, a tagradh tuille, 's a rithist tuille, do'n bheodheoch cheudna. Bha e fortanach eolas fhaotainn air Eachann Mac-Illeathain a bha 'n a mhaighstir sgoil aig Baile-Ghrannnd. Mar a thug sinn fainear ann an ait' eile; b' esan aon do na daoine a bu treise buadhan 's a bu gheire iuntinn 's a Ghaidhealtachd, agus bha e roimhe so air a thaladh gu seann chanain agus litreachas nan Gaidheal, raon anns an do bhunaich e a leithid do chliu 'n a dheigh sin. Cha 'n 'eil teagamh nach robh buaidh mhor aig buadhan Mhic-Illeathain

air inntinn Speinse, 's nach d' fhuair e uaithe-se moran do'n durachd, 's do na beachdan soilleir, airson am bheil e comharraichte a thaobh gnath-chuimhne agus canain nan Gaidheal. B' aithne dha, mar an ceudna, Mr Nial Mac Ailpein, ughdair an fhoclair Gaidhlig, agus diulan-aich eile, a ghluasadh 'aighe an deigh eolas air eachdraidh agus gnaths a luchd-duthcha. B' ann mar so a bha e air uidheamachadh 'n uair a dh'fhag e "Ile an fheoir" airson Grianraig, 'n a ghille og, tapaidh, deas gu ait' a ghabhail ann an iomain dhian na beatha, gu bhi seasamh no tuiteam air ceann a dhleasannais. Agus sheas e.

Bha ochdnar pearsa ann an teaghlach athar, triuir nigheanan agus coighear ghillean. Thainig iad uile do Chanada ach dithis dhiubh agus shuidhich iad ann an ceann an iar mor-roinn Ontario. Rinn Daibhidh, mu'm bheil na briathran so air an sgrìobhadh, comhnuidh ann an siorramachd Pheel far an d' fhan e car uine ghoirid, a' dol an deigh sin do shiorramachdan Ghrey agus Wellington. Chaidh dithis d' a bhraithrean gu siorramachd Bhruis, aon do na h-aitean 's an duthaich ur a bha air an suidheachadh ach beag air fad leis na Gaidheil. Dh' fhosgail Daibhidh Speinse buth agus chur e air aghairt marsantachd, ni anns an do shoirbhich leis re iomadh bliadhna. Bha e am measg nan Gaidheal, agus rinne fein agusiadsan moran air son a cheile ann an iomadh doigh. Bha cuid dhiubh gun chomas air leughadh no sgrìobhadh ann am Beurla, gun eolas air doighean naduthcha, no air na caochlaidh seorsa obair anns am b' urrainn daibh tasdan a chosnadh. Anns an t-suidheachaidh so bha Mr. Speinse air a ghairm gu iomadh seorsa seirbhis a dheanadh airson a luchd duthcha agus rinn e na b'urr-

ainn d'a gu suilbhireach, toilichte, gun duil ri duais no paigheadh. Ach, mar a thubhairt sinn, fhuair e meas agus earbsa an t-sluaigh, agus bha inntinn solasach le eolas gu robh e deanadh feum d' a chomhchreutairean. Bha a lamh ansas a'n iomadh dleasannas folaiseach. Chaidh a thaghadh 'n a bhall do bhuidheann riaghlaidh nan sgoil, 's mar bu dual do neach aig a robh gradh do dh' fhoghlum, mar a bh' aige-san, bha e 'na mheadhon air sgoilean a shuidheachadh agus air maighstirean-sgoil fhasdadh, a bha comasach 'n an dreuchd agus ro-fhreagarrach air ceann na cloinne. Bha e, mar an ceudna, dichollach a' cuideachadh na h-eaglais 'n a deagh obair ; agus chuir e air chois coinneamhan airson leasachaidh eolas am measg an t-sluaigh.

Bha beachdan dìongmhalta aige air ceistean a bhuineadh do riaghladh na duthcha, agus sheas e a mach air taobh an t-sluaigh, an aghaidh daorsa na seann riaghlaidh. Bha ceistean mora ri 'm fuasgladh, oir cha robh Canada ach air stairsnich na saorsa a tha i a nis a mealtainn. Bha Mr. Speinse cumhachdach ann an labhairt ; sgaiteach, druidhteach le pheann, agus rinn e obair mhor leis an da innleachd sin. Ann an comhstri chruaidh do'n t-seorsa so bhiodh e iongantach na'n d'thigeadh e 'mach gun naimhdean a dheanadh, ach bha a choladarcho modhail, 'sa ghiulancho suairce, 's nach b' urrainnear facal a labhairt 'n a aghaidh, 's an aite naimhdean, bu tric a rinn e cairdean dhiubhsan a bha de chaochladh beachd ris fein.

Bha a ghnothaichean g' a tharruing gu tric gu Baile Toronto agus thug e a theaghlach a' n sin 's a bhliadhna 1871. Bha e ainmeil mar dhuine comasach, foghlumte, agus air dha comhnuidh a ghabhail 's a bhaile mhor,

thairgeadh dh'aite mar fhear-deasachaidh paipeir-naigheachd a bha air a chur a mach le aon do na h-eaglaisibh mora. Fhuair e uine gu so a dheanadh, ach cha robh e air fhagail fada ris an t-saothair thaitneach so. Bha paipeir-naigheachd eile air a chlo-bhualadh ann an Toronto aig an am a bha ni bu mho a reir a bheachd, ach nach robh a soirbheachadh fo stiùireadh a luchd-seilbh. Bha an aire air a tarruing do dh' obair Mhr. Speinse agus cho-dhun iad gu 'm b' esan an duine air an son. Chuir iad an curam 'na laimh, agus a thaobh 's gu 'm bu phaipeir Albanach a bh'ann, cha b'urrainn e an diultadh. Thainig atharrachadh mor air a phaipeir gu h-aithghearr. Bha e soilleir gu robh an duine ceart air an stiùir, agus sheas cuisean mar sin gus an d' thugadh am paipeir thairis. Cha b'fhada gus an d'iarr Mr. Mowat, ard fhear-riaghlaidh Ontario, air greim a ghabhail air aon do na oifigean a bu chudthromaiche 's an duthaich. Chaidh a shuidheachadh 's an oifig so agus tha e fathast a saothrachadh innte. S' e aon d'adhleasannasan a bhi coimhid thairis air na gnothaichean a tha 'g eiridh eadar an luchd riaghlaidh agus a mhuinntir a tha tighinn astaigh a dh'aiteachadh na duthcha. Anns na cuisean so tha gnothaichean aige ri dheanadh gu tric ri moran d' a luchd-duthcha fein, agus cothram air an cuideachadh, 's air an seoladh do na h-aitean anns am fearr a shoirbhicheadh leo. Cha robh neach riamh diubh do nach do sheas e mar dheagh charaid.

Ann an Toronto bha buidheann do Ghaidheil a bha laiste le gradh do'n duthaich 's do na h-uile ni a bhuineadh d'i; daoine mar bha Padruig Mac-Griogair, Iain mac-a Phearsoin, Uilleam l. Mac Coinnich, Iain Caimbeul,

Iain Catanach Mac Ille Mhaoil, Domhnull Mac Eobhain 'us feadhain eile de'n aon inntinn. Chaidh comunn Gaidhlig a chur air chois anns an robh Mr. Speinse 's na daoine a dh' ainmicheadh 'n an seanairean. B' e iarrtas a chomuinn gu' m biodh Mr. Speinse 'n a cheann suidhe, ach sheas e gu taobh air rath Mr. Padruig MacGriogair a bha air an aobhair sin air a thaghadh. An deigh bas a Ghaidheil ainmeil, fhoghluinte, sin, rinneadh Mr. Speinse 'n a cheann-suidhe agus re thri bliadhna cha do leigeadh leis andreuchd so thoirt suas. Bho cheann ceithir bliadhna chaidh a chur 's an dreuchd cheudna a rithist agus bha e re da bhliadhna eile air ceann a chomuin. Tha e mar an ceudna 'n a bhall urramach do chomunn Ceilteach Mhontreal, agus do bhuidheanan eile de luchd duthcha a tha ann an co-bhonn airson aobhairean cliuiteach a neartachadh 's a chumail suas. Faodar a radh gun sgath gu'r e aon do na daoine is comasaiche gu Gaidhlig a labhairt 's a sgrìobhadh, a th' againn ann an Canada. Cha 'n e amhain gu bheil foghlum ard aige agus eolas farsuing air canain 's air litreachas nan Gaidheal, ach tha comas sonraichte aige air an eolas so a leigeil ris d' a cho-chreutairean. Tha e 'na aobhair broin do mhoran aig am bheil eolas air an stòras saoi bhir a tha aige do sheann orain, do shean-fhacail, do sgeulachdan aosda, 's do eachdraidh-beul na Gaidhealtachd, agus a tha fiosrach air na giblean sgrìobhaidh a tha e 'sealbhachadh, nach do ghabh e cothram air cuid de oileanachd a chraobh-sgaoileadh am measg a luchd-duthcha ann an leabhar. Chaidh moran bho laimh a chlo-bhualadh 's na paipseirean-naigheachd, air cuspairean Gaidhealach, ach tha e

comasach air obair ni's fearr na rinn e fathast a dheanadh, agus cha 'n 'eil ar dochas fann gu'm faicear toradh a shaothair am measg ughdairean eile, ann an leabhar uaithe fein.

Bha e posda air bean-usal shubhailcach d' am b' ainm, Standing, a mhuinntir Bhrampton, a chaochail bho cheann tri bliadhna deug. Dh' fhag i triuir chloinne, dithis nighean agus mac. Chaochail an nighean a b' oige, agus a nis tha an teaghlach air a ghearradh sios gu dithis. Tha am mac 'n a ghille gealltanach, geur, a chaidh 'ghairm gu dreuchd fir-lagha air a bhliadhna 's a chaidh. Tha Mr. Speinse tri fichead bliadhna 'sa h-ochd a dh' aois. Tha a neart 's a bhuadhan gun fhailneachadh sam bith agus a reir barail duine tha iomadh bliadhna fhada roimhe, mu' n teid a ghairm gu cuaimhnais na bheatha nach teirig gu brath.



DOMHNUL CATANACH

“ 'Us theid bhur n-eachdraidh glan gun bheud
Air feadh gach linn a thig 'n 'ur deigh.”

AR leam gur ainmic atha saothair a'tighinn gu laimh fir sgrìobhaidh, a tha ni 's taitniche na bhi cur ri cheile cunntas air beatha deagh dhuine; a bhi lean-tuinn a shaothair ceum air cheum, a bhi rannsachadh cionfatha dhoighean, 's a bhi breithneachadh na buadhan inntinn a bha air an cleachdadh leis. Is e, da rìreadh, fìor shochair a bhi ri leithid so do shaothair; cha 'n e amhain gu bheil an obair math innte fein, ach 's e 's buaidh dh' i 'bhi 'foillseachadh iomadh smuain agus feart a bu choir inntinn an fhir mhothaichidh a lionadh le deigh air nithibh ard-chuiseach na beatha so agus na beatha shiorruidh.

A'meas Ghaidheal Ghlinne Garaidh bha iomadh duine a bha ainmeil airson a dhiadhachd 's a dheagh bheus, agus b'ann diubh so a bha Domhnul Catanach, aon do dhaoine iomraiteach Chanada, a bha aithnichte air feadh na tìre air fad, ged b'e Gleann a Garadh a b' aite comhnaidh dha. Mar a tha ainm a nochdadh, b'ann do mhuinntir Bhaideanaich a bha e, agus rugadh e a'n sin air a bhliadhna 1799. Thainig e o shliochd a bha cruadalach, calma, aig an robh tapachd ann an cuisean an t-saoghail agus roinn mhath a shoirbheachadh anna. Bhuineadh e do Chatanaich Bhaideanaich. B'e athair



DOMHNULL CATANACH.

Iain Catanach a bha iomadh bliadhna air ceann treudan chaorach Mhr. Mitchell ann am Baideanach. Bha e 'na sheanachaidh barraichte, 's 'n a dhuine air an ro mor mheas am measg an t-sluaigh. Chaochail e ann an Canada aig aois ceithir fichead bliadhna 's a ceithir. Fhuair a theaghlachan deagharach agus foghlum math ann an aon do sgoiltean na sgìreachd. Air do Dhomhnall fas suas gu bhi 'n a dhuine og, chaidh e gu Sasunn a chosnadh aran laitheil, mar bu tric le daoine oga na Gaidhealtachd a'dheanadh eadhon aig an am sin. B'ann an uair a bha e a'n sin a thainig teaghlach athar gu Canada agus lean e iad air a bhliadhna 1826. Bha Gleann a Garadh air ur aiteachadh agus bha an roinn mhor deth fo choille gun rathadan morà, gun drochaid-ean agus gun moran do na goireasan a tha a nis aig doras gach tuathanach air fad na siorramachd. Ach bha an sluagh bho'n Ghaidhealtachd. Bha iad turail, toigheach air an cuid, agus iarrtanach gu bbi deanadh a ni a b' fhearr a b' urrainn daibh do'n crannchur, dir-each an t-seorsa air an tric le cuibhealan fhortain tionndadh le soirbheas. Cnaidh beagan uine seachad mus do ghabh Domhnall Catanach ris an duthaich, ach cha do leig e uine sam bith thairis gun oidheirp fhoghainteach a dheanadh a chum dachaidh a bhuinnig dha fein. Cha robh an gnothaich soirbh; cha b' ionnan na h-amanan sud 's an la'n diugh, 'n uair a tha 'n duthaich air a lìonadh o cheann gu ceann le goireas do'n fhear-taghail co dhiu is e fearann a tha dhith air, no dreuchd do sheorsa sam bith eile. 'N uair a thainig Domhnall Catanach do Ghleann a Garadh, cha robh an sluagh ach tearc agus bha obair choimheach ri 'n aghaidh. Is gann is urrainn duinne a mhothachadh na ghabh iad fos laimh a

dheanadh. Bha a choille domhal, tiugh, ri gearradh sìos leis na tuaghan, craobh an deigh craoibh, na muillionan diubh; bha i a'n sin air a losgadh eadar gheug 'us chrann, oir cha robh doigh air moran d'i a reic; bha 'n siol air a chur air feadh nan stoc agus barr air a thogail as an luaithre, gun treabhadh no ruamhradh. Bliadhna an 'deigh bliadhna bha so dol air aghairt, na h-uile bliadhna a' faicinn tuille fearainn air a reiteachadh, nan taighean comhnaidh air an leasachadh, agus nan saibhlean air an uidheamachadh gu goireasach. Bha so uile a' cosd uine, saothair, agus neart an duine, 's ma thugadh an talamh fo smachd, b' ann, mar bu trice, aig pris a bha tuille is daor air a shon. Na saoilèamaid gu robh duthaich fhìlailidh, shaoibhir, a fèitheamh air na Gaidheil a thainig an toiseach gu Canada. B' ann le fallas an gruaidh 's le neart am bodhaig a rinn iad tìr thorbhairteach d'i, ag giùlan uallach trom ri teas an t-samhraidh agus ri fuachd guineach a gheamhraidh, gus an d' fhas iad nam mnathan 's nan daoine breoite, eucaileach, an spionadh 's an neart gu tur air an sgrios. Tha e, air uairibh air a chumail a mach, le muinntir aineolach, gu bheil na Gaidheil neo-sgoineal, leisg, 's gu'r e sin aobhar am bochdainn 'n an tìr fein. Cha b' urrainn freagairt ni bu dhearhta a bhi air a toirt do 'n bheachd mearachdach so na raointean farsuing Chanada, air an do bhuilich na Gaidheil saothair a bha da rìreadh miorbhuilleach. Agus cha 'n 'eil e mi-iomchuidh gu'm bitheadh an ni so air a thoirt fainear anns a chuntas so, a tha mu dhuine a rinn tuille 's a choir fein am measg a luchd-duthcha, ann a bhi fosgladh suas na tìre.

B' ann air marsantachd a chaidh inntinn Dhomhnuil!

Chatanaich an toiseach, agus dh' fhosgail e buth aig clachan Mullinn an t-Sagairt, is ea nis baile Alexandria. Fhuair e misneachd 's a ghairm so bho a bhrathair, Coirnileir Aonghas, a bha 'na fhear tomhais air talamh a chruin. Chaidh leis gu maith, agus bha e ann an uine ghoirid air a mheas 'n a dhuine earbsach, agus 'n a dheagh fhear-gnothaich. Ceithir bliadhna an deigh dha tighinn do'n duthaich rinneadh breitheamh deth ann an inbhe bailidh. Bu lionmhor dleasannas a bha aige ri choimhlionadh 's an dreuchd so; thug iad breith ann an cuiseana bhiodh aig eirigh o'n t-seann chreideadh ann am buidseachd air crodh 'us eich; bhiodh gearan eadar coimhearsnaich mu nitheanbeaga nach b' fhiach an t-saothair, agus bhiodh am Bailidh air fheuchainn gu goirt ann a bhi cumail na sithe. Bha cridhe blath us ceann glic aig a Chatanach, 's bha e 'n a dhuine tuigseach a 'n ceann obair dhoirbh mar a bha co-cheangailte ris an dreuchd.

Phos e, 's a bbiadhna 1832. boirionnach d'am b' ainm Ceit Nic-Dhomhnuill, bantrach Dhonnachaidh Mhic Ille-Mhaoil, aig an robh triuir chloinne ri ceud fhear,— dithis nighean agus gille, d' am b' ainm Iain, a tha a nis air ceana Comuinn Gaidhlig Thoronto, duine cho suairce, seimh, 's a dh' araicheadh riamh aig uchd na deagh mhathar, 's cho gradhach, maoth-chridheach 's a chunncas riamh le suil. Rinn am Bard Mac Colla oran air, anns am bheil e gu ro-fhirinneach ag radh:

“Ged 's fada 'n cein bho Thir an Fhraoich

An tir 's an deachaidh d'arachadh,

'S gle ainmic aig an tigh no'n taobh so

Aon le leth do ghradh-sa dhi.

Tha dearbh nach faoin air sud 'n ad ghaol

Air a' cainnt aosda, shar-mhaiseach—
 A' Ghaidhlig mhilis thig bho d'bhilibh
 Binn mar ghuth na clarsaiche.

“O, fhir a's uaisle cridhe 's beus !
 Gun taing de d' aogas saighdeireil
 Cha mhiuic gheibhear fear cho lan
 De chneasdachd, baigh a's caoi huealas.
 Na fhuair mi fein de d'chomunn ciuin
 Bi 'dh fad' am shuil mar oighearachd leam,
 'S mo dhuil ri tuille d'heath gun dail
 A' toirt, mar 's coir dha, aoibhneas dhomh.

Goirid an deigh dha posadh chaidh Domhnul Catanach bho Mhuillionn an t-Sagairt gu fearann a cheannaich e ann an sgìreachd Chenyon. Thug e mar ainm air an aite “Lagan,” an deigh aite a bhreith ann am Baid eanach uachdrach. Ann an so rinn e comhnaidh re leth-cheud bliadhna a foillseachadh gu saoi-bhàir na comasan 's na grasan a shealbhaich e, mar a bha 'fhear-cinnidh 's a cho-ainm ag deanadh, dluth air an am so, aig Sliabh Bhaideanach, 's an t-seann duthaich. Bha e ri tuathanas, 's ri ceannachd a dh' iomadh seorsa ; bha e air ceann a Phost Office, 'n a fhear-ionad airson cuideachd no dha do luchd-coingheil airgid, 'n a fhear-ionad air fearann a chruin, 'na bhall do chomhairle na sgìreachd, 's do na comuinn a bha 'cur air an aghairt tuathanachais agus aiteachd na siorramachd. Bha e mar an ceudna 'n a bhreitheamh ann an cuirt a Bhailidh far an robh iomadh cuis chruaidh ri 'm fuasgladh. Thionail e an sluagh mu thimchioll agus le 'bhi toirt obair do chuid 'us cuideachadh do chuid eile, cha b' fhada gus an robh iad fein agus esan a buinnig roinn chuimseach do'n ailgheas a bha ri fhaotainn 's an tìr. Mar bu tric bhiodh aireamh do na

Frangaich bho Chuebec 'n a sheirbhis. Bha e baigheal riu agus thuinnich na h-uiread diubh 's an aite. Mar sin, cha b' ainmic a bhi cluinntinn muinntir og' an aite de'n da chinneach, a labhairt gu fileanta ann an Gaidhlig am Beurla, 's am Frangais. Mar so bhunaich e ann an oibre math.

Chunnaic e gu robh an aite a dh'easbhuidh meadhonan nan gras; bha na ministeirean gann agus cha robh e furasda do' n aireamh bheag a bh'ann dol troimh 'n duthaich a chion rathadan. Rinn e na b' urrainn d'a airson so a leasachadh, agus an run sin a dheanadh, dh' fhosgail e sgoiltean sabaid ann an caochladh aitean, a' neartachadh lamhan an luchd-teagaisg 's g'am misneachadh le 'ghnuis 's le mhaoin. Bha e fein a' teagasg an t-sluaigh anns na sgriobtuiribh agus b'iomadh lasabaid achaidh seachad gun aoradh follaiseach ach coinneamhan Dhomhnuill Chatanaich, a bha air am frithealadh le sluagh do gach creideamh, papanach 'us protestanach, ni a bha air a cheadachadh gu saor leis na sagartan agus an Easbuig. Bha e eudmhor, dichìollach a' n ceann na h-oibre so, agus bha a shaothair air a h-aid-eachadh gu soilleir leis an Tighearna. Is iomadh neach a dh' araicheadh ann an Gleann a Garadh, a tha a nis fad' air falbh ann an ionadan iomallach an t-saoghail, a tha tionndadh an inntinn air a h-ais gu sgoil-shabaid Dhomhnuill Chatanaich, 's a tha taingeil airson nan sochairean a shealbh-aich iad a'n sin ann an laithean an oige.

Mus d' thainig e do Chanada, cha chuala e dad an aghaidh a bhi 'g ol dibhe laidir a'm measarrachd. Ann an Canada bha "Luchd na Stuaimeachd" ag obair gu ùrachdach. Cha robh teagamh nach b' iad ol agus

struidheas an da ni bu mhilltiche 's an tir, agus cha b' fhada gus am robh an Catanach a mach air taobh na Stuaimeachd. Bha e 'n a dheagh fhear labhairt a'n Gaidhlig 's a'm Beurla agus shaothraich e le uile neart ag earalachadh an aghaidh na h-uile modh do dh' anameasarrachd. Co-cheangailte ris an obair so, bha eud airson foghlum do 'n oigridh. Rinn e seirbhis nach bi air a di-chuimhneachadh gu h-aithghearr 's a chuis so, agus bha 'n toillinntinn aige a bhi faicinn na cloinne ag eiridh suas le foghlum a bha seasamh gu math dhaibh 'n an gnothaichean laitheil. Bha e a reir naduir gu'm biodh a leithid so do dhuine 'n a sheanair anns an Eaglais, 's gu'm biodh e inbheach am measg luchd-aideachaidh a chreidimh. 'N uair a thainig an Eaglais "A mach," air "bliadhn' an dealachaidh," 1843, mhothaich e gu'm b' e a dhleasannas an seann taigh aoraidh fhagail 's a chrannchur a thilgeadh maille riusan a bha seasamh air taobh na saorsa. Bha obair mhor air a deanadh ann an Canada. Bha na h-aitreibh, airgid na righeachd, agus na sochairean timeil eile air an cumail leis an Eaglais Steidhte mar bha iad air an cumail ann an Albainn, 's cha robh an Eaglais Shaor a sealbhachadh a bheag ach saor-thabhartais a luchd-cuideachaidh. As a so bha eaglaisean ri 'n togail 'us ministeirean ri mpaigheadh, 's bha dilseachd an t-sluaigh air a feuchainn gu trom. Ach sheas daoine Ghlinne-Garaidh gu treun ri aghaidh an dleasannais agus bha Domhnall Catanach mar righ air an ceann. B' ann d' a ionnsuidh a bh' abhaist do na ministeirean a chuireadh gu Canada bho Albainn, a chum an eaglais a shocrachadh, a bhi tighinn. Bhiodh e g' an coinneachadh aig Montreal, g' an treoir-eachadh troimh 'n duthaich, a gairm choinneamhan

air an son, 's g' an comhairleachadh anns na cuisean a bha aca ri 'n cur air doigh. Aig a thaigh ann an Lagan thug e aoidheachd do Dhr. MacLachlainn, Dhuneidinn, nach mairean, do Dhr. Somerville, Ghlaschu, nach mairean, do 'n urramach Alasdair Friseal, Chnuic-a-mhuire, taobh Inbhirnis, nach mairean, 's do mhoran eile do sheirbhisich urramach an Tighearna a bha ainmeil 'n an linn, 's a thainig do'n duthaich so a los cuisean na h-Eaglais. Bha a thaigh na cheann-uidhe do'n fhear-turus a bha air toir math a dheanadh, 's na bhuillsgean bho 'n deachaidh cumhachd a mach air feadh na tire. Bhiodh e lom-lan aig am a chomanachaidh, ach cha robh e riamh cho lan 's nach b' urrainn e tuille a ghabhail a steach. Bha fear-an-taighe cumhachdach ann an dian urnuigh; bu tearc a leithid a' guidhe aig cathair grais. Bha a bhuil air. Bha e air a neartachadh 'n a dhleasannas agus bha e air a dhaingneachadh ann an obair a laimh. Bha e ro-fheumail ann an cuirtibh na h-Eaglais, 's a chleire, agus anns an Ard Sheanadh. Bha a ghuth air a chluinntinn le taitneas anns na h-eir-eachdan sin, agus b' ainmic a thuit a chomhairle air cluaisibh bodhar, mi-toileach.

'S fheudar a nis tionndadh g'a theaghleach gradhach am measg an robh e ri fhaicinn air a mhodh a b' fhearr. Chaochail a cheud bhean, a fagail as a deigh dithis chloinne a rugadh do'n Chatanach, agus Iain og Mac-Ille-Mhaoil, leanabh a ceud posaidh, mar a thugadh fain-ea cheana. B' iad ainmean an dithis, Alasdair I, nach mairean bha 'n a fhear-lagha ainmeil ann an Toronto, 's na cheann-suidhe air comuun St. Andrews, 'sa bhaile sin; agus Ceit, a phos an t-Urramach Huistein Caim-beul nach mairean, a bha ann an Cornwall, On-

tario, agus ann an Cannington, Ontario. 'S a bhliadhna 1839, phos Mr. Catanach an dara uair. Anns an ni so, bha lamh an Fhreasdail caoimhneil, a bha coimhead thairis air, ri faicinn gu follaiseach. Bu dhuine e do 'n d' thugadh obair araidh ri deanadh, agus a nis fhuair e bean, a bha, mar gu'm biodh i air a togail suas, 's air a h-ullachadh gu sonraichte, air son suidheachdainn a theaghlaich 'us oibre. Cha b' urrainnear, le ceartas, sgriobhadh mu obair Dhomhnuill Chatanaich, gun iomradh a thoirt oirre-se a bha 'na bana-companach ghradhach, dhileas, dha, re aireamh mhor do bhliadhnaibh, 's a chuidich e le neart cridhe 'us inntinn, a bha neo-chumanta iomlan ann an eireachdas 'us ann an tuigse Thainig i o theaghlach ion-mholta. "Faodaidh freumhan cam a bhi aig faillean direach," ars' an sean-fhacal, ach cha 'n e amhain gu robh Bean a Chatanaich direach, ach bha 'n stoc bho 'n d' thainig i, 's na freumhan, mar an ceudna, direach, gun char gun mheang; 's chaidh cuid do na freumhan gu bun teaghlachian a bha araon uasal agus iomraiteach 's a Ghaidhealtachd. B' i s h-ainm Fionaghala, nighean Iain Mhic-Coinnich, aon do dhaoine ainmeil Ghlinne Garaidh. Rugadh e aig Brahan, ann an siorramachd Rois agus dh'araicheadh e le braithrean a mhathar ann an Inbhirnis, d'am b'ainm Dubhghlas, 's a bha 'n an luchd-deilbh aitreibh. Dh'ionnsaicheadh e 'san dreuchd so, agus bha e 'n a oibriche sgiobalta, deas, na mhaighstir air a dhreuchd. Phos e nighean Sheumais Mhic-Dhomhnuill, Fhlodigaraidh, mac do dh' Alasdair Mac-Dhomhnuill Chingsburgh, agus brathair do dh' Alan Mac-Dhomhnuill a phos Fionaghala Nic-Dhomhuill, ban-treoraiche a Phrionnsa. B'i Fionaghala Nic-Dhomhnuill, air an

aobhar sin, bean brathar a h-athar agus piuthar-chsile seanair bean Dhomhnuill Chatanaich, mu'm bheilear a sgrìobhadh.

Bha teaghlach eireachdail, tapaidh, aig Iain Mac-Coinnich agus aig Anna Dhombhullach. Chaidh iad a mach air taobh a chruin, ri am trioblaidean Mhic-Coinnich air a bhliadhna 1837. Bha an athair na Chaipitean air buidheann Mhilitia agus bha na mic 'n an oifigich ann an inbhe ni b' isle. 'Se aon diubh Seumas R. Mac-Coinnich, duine cho cliuiteach 's cho measail 's gheibhear a'n taobh stigh ceithir oisnibh na siorramachd. Tha e treun ann an gnothaichean na h-Eaglais agus 'n a fhoirfeach soilleir airtaobhna firinn. Tha naigheachd beag air innseadh a tha a nochdadh beachd cuid de na daoine air, mar fhear-aideachaidh. Tha e air innseadh gu' n deach duine araidh a dh' ionnsaidh a mhinistear airson, ordugh a bhaistidh d'a leanabh. Am measg nan ceisdean a chuir am ministear air bha an te so: "Co iad na tri pearsa tha 's an Diadhachd?" B i 'n fhreagairt a fhuair e;—"Si-péin, Murachadh Mac-Ille-Mhaoil, agus Seumas!"—b'e sin Seumas R. Mac-Coinnich. B' airidh bean Dhomhnuill Chatanaich air dilsean cho cliuiteach rìusan a dh' ainmicheadh. 'N a dachaidh aig Lagan bha i 'n a mathair do'n chlànn a dh' fhagadh gun mhathair,—“is blath anail na mathar”—'na cul-taice d'a fear-posda, 'na deagh bhana-charaid do'n fheumach 'sna bean taighe aoidheal, fhialaidh, mor-chridheach, nach do leig a h-aon riamh seachad air a dorus, a bha feumach, gun a riarachadh, 's nach d' fhailnich riamh ann a bhi toirt toillinntinn d'a cairdean 's d' a luchd-daimh a bhiodh a' tional aig taobh a cagailt. Bha i n' a deagh bhan-sgeulaiche, 's bha buadhan-conaltraidh

eireachdal aice a bha thar tomhas ann an geiread, 's ann an deisealachd. Bha sean-fhacail a duthcha aice air barr a meoirean, bha i min-eolach air orain nam bard, bha i ionnsaichte 's na sgriobtuiribh, agus bha a cuimhne cho math, 's gu robh e furasda dhi briathran ughdair, no rann, a ghabhail gun mhearachd. Bhiodh e diulich toil-inntinn bu mho fhaotainn na oidhche a chur seachad 'n a teaghlach. Fear-an-taighe, coir, seimh agus aigeannach; bean-an-taighe, suilbhir, aoidheal agus tlachdmhor; an teaghlach, modhail, stuama agus eireachdail 'n an giulan — a' toirt gu cuimhne an dealbh a tharruing am bard,—
 “Solas banail nan daoine bh' ann.”

Bha ceathrar chloinne aca, Seonaid Fionaghala, a tha posda ri Mr. A. W. Ros, M.P., Mairearad, posda ri Mr. Calum Mac-Illeathain, marsanta, ann a Bhancouver, B.C. Anna, posda ri Mr. Perry nach mairean, agus Mairi J.D., nach mairean, a bha posda ri Mr. Panton, fear-teagaisg ann an oil-thaigh Guelph, Ont. Tha gne an fhior-Ghaidheal ri faicinn annta uile. Tha an gaol air Gaidhealtachd na h-Alba cho laidir 's ged a b'i aite am breith. Mar eisimpleir air so, tha e air innseadh gu'n d' fhuair bean Mhr. Ros earrann fearainn, bho cheann ghoirid, ann an airde'n iar na duthcha. Thloch mor uisge 's an fhearann agus thug i Loch-Earrachd mar ainm air, an deigh an Loch ann am Baideanach, air na bruachan do'm b' abhaist d'a h-athar a bhi gu tric, 'n uair a bha e 'na ghille og 's a Ghaidhealtachd. Tha'n sean-fhacal ag radh: “Tagh do bhean mar a's math leat do chlann.” Tha an seanachas fior mu'n teaghlach so. Tha fiamh-inntinn nam parantan air a chloinn: tha beannachd an deagh-mhathar g'an leantainn gus an dara ginealach.

Chunnaic sinn mar a bha iad so a caitheamh am beatha ann am Gleann a Garadh, a ghnath a deanadh math 's a sgaoileadh maitheas mu'n cuairt daibh. Dh'fhag aon an deigh aon an dachaidh bhlath, aig Lagan, airson dachaidhean daibh fein, gus an robh a charaid a faireachdainn aonarach, agus bhrosnaich an teaghlach iad a dhol gu Winnipeg, far an robh an aireamh bu mhodiubh fein a combhnaidh aig an am. B'ann mar sin a thachair gu'n d'fhag iad Lagan an aigh an deigh a bhi ann mu leth cheud bliadhna. . Bha'n dealachadh eadar iad fein agus muinntir an aite ro bhronach. Bha seann chairdean agus choimbhearsnaich a faireachdainn gu'n robh iad a call cinn-teaghlach a bha 'cur urram air an siorramachd. Lean iad an dithis gu ruig toiseach an turuis air an rathad iarrainn agus cha robh iomadh suiltioram 'n uair a chaidh carbad na toit as an t-sealladh. Cha robh e air a chaomhnadh fada ann a' Winnipeg. An ceann naoi mìosan an deigh dha Lagan fhagail, bha e air a thoirt air falbh le tinneas aithghearr air Bealltainn 1883, air dha bhi ceithir fichead bliadhna 's a ceithir a dh'aois. Dh' a uhlacadh e am measg a shluaigh fein ann an Gleann-Garadh. Tha a bhean chaomh fathasd maille ruinn, ag combhnaidh ann an Toronto maille ri cloinn ceud bhean Mhr. Catanach, —Iain C. Mac-Ille Mhaoil agus Ceit Chatanach, banntrach Mhr. Chaimbeil, —do'n robh i 'n a mathair cho gaolach 's ged a bhuineadh iad dhi fein; 's air an laimh eile tha i cho measal 'n an suilean 's ged a b' iad a sliochd do thaobh na feola. An gradh a bhuilich i orra 'n uair a bha iad maoth, tha iad a nis a nochdadh air ais dhi 'n a seann aois, 's i call neart a cuirp, ged a tha a h-inntinn lughmhor, mar bu dual.

Ged nach d' thugadh a Ghaidhealtachd do Chanada

ach an aon teaghlach so, bu mhor na fiachan fo'm biodh an tir so do'n Ghaidhealtachd. Ach 'n uair a smuainicheas sinn air na dachaidhean a bha 's a tha air feadh na duthcha, anns am bheil smior nan Gaidheal, muinntir a's airidh a bhi air an coimeas ri teaghlach Dhomhnuill Chatanaich, mothaichidh sinn ciod a rinn Tir nam Beann 'san Fhraoich airson ar tir. Tha e coltach gu'm b' i so toil an Fhreasdail, gu'm biodh seann duthchana na Roinn-Eorpa a tabhairt do na daoine a b' fhearr a bh' aca, mar thiodhlac do'n duthaich uir so, gu bhi g' a socrachadh a reir rian ceart. Tha cuid a saolsinn nach eil sochair a tha duthaich ur a tairgseadh, a's urrainnear a choimeas ri sochair an t-soisgeil aig an dachaidhean 's a Ghaidhealtachd; theagamh gu bheil am beachd so ann an tomhas fìor, ach cha 'n urrainn neach sam bith an cunnta s so a leughadh gun 'bhi toirt fainear gu'm faodadh Domhnall Catanach a bhi re laithean a bheatha ann am Baideanach, fo theagasg shoisgeulach na ministeirean diadhaidh a fhrithheil 's a chearn sin, gidheadh gun chothram a bhi aige air an fhichead-amh cuid de 'n t-seirbhis a rinn e ann an aobhar an Tighearna ann an Canada, a dheanadh.





ALASDAIR FRISEAL.

GEILIDH ANN AN CANADA

(Mar gu'm biodh i air a cumail air oidhche na seana Challuinne, ann an taigh Uilleam Chabarfeigh.)

A CHUIDEACHD: Teaghlach an taighe; Caraid no dha; Am Piobaire Ruadh; agus ceathrar luchd-taghail,—Niall Sgoileir, am Fear-teagaisg; Alasdair Druim a-chnuic, Lachlann an t-Srath agus Gilleasbuig an Saor.

Bha 'n t-suipeir thairis, agus dh' eirich Fear an Taighe a chur cuaiche na sith mu' n cuairt air a chuideachd. Mo theaghlach gradhach, 's mo chairdean, thuirt e, tha da dheoch-slaiente air am bheil urram air a chur s' an taigh so, bho bhliadhna gu bliadhna 'n uair a thig oidhche na Culluinne mu'n cuairt. Is iad sin, a Bhan-righ a tha riaghladh thairis oirnn, agns an Tir 's am bheil sinn a comhnaidh. Olamaid do'n Chrun 's d' ar Duthaich. Shin e a 'ghlainne do'n Phìobaire Ruadh, a' tha suas ri ceud bliadhna dh' aois, 's aig an robh beagan do bhuaidh na faidhdearachd, agus chaidh i mu'n cuairt, bho neach gu neach, gus an do fhrithealadh na bha timchioll air a bhord.

Mo Chairdean. arsa Fear-an-taighe, tha mi 'cur failte na Blaidhn' uir oirbh uile. Is taitneach leamsa a bhi cumail suas nan doighean a chunnaic mi aig m' athair 's aig mo sheanair Leanamaid riutha fhad 's a

bhitheas sinn beo. Bha iad 'n an daoine suairce, glic, a chaidh romhainn. Bha fiosrachadh air iomadh ni aca nach eil againn-ne. Bha iad geur, min-chuiseach anns na nithean a bhuineadh do' n crannchur, 'us toigheach 's na nithean a bhuineadh do'n cliu. Bha iad 'n an daoine mor-chridheach, fiailaidh, agus aig na cuirmibh bhliadhnail—an Nollaig 's a Bhliadhn' ur—bhiodh sonas 'us sugradh a' cur gairdeachais air an cridhe. Bha iad 's a mhor chuid 'n an daoine simplidh, neo-lochdach, a bha 'sealitaínn airson duaise nan ionracan, air taobh thrll crìochan na beatha so. Gu ma fada 'mhaireas an cliu, 's an cleachdaidhean ann an tìr morh Chanada !

Bu mhath leinn uile na 'n d' thugadh am Pìobaire coir dhuinn sgail air a phiob.

AM PÌOBAIRE RUADH: 'N a dheagh am. Cha 'n eil tachas a'm bonnaibh cas na h-ograidh fathast, gu bhi air an urlar. Thoirleadh Sine oran dhuinn.

FEAR-AN-TAIGHE: Tha mi 'faicinn Maighstir Nìall air a bhiod gu sgialachd a thoirt dhuinn, agus an deigh sin, bheir Sine ghaolach luinneag dhuinn. Cha'n'eil dol as dhuibh a Niall.

NIALL SGOILEIR: Ma ta, a charaid chaoimh, ma dh' fheumas mi sgialachd a ghabhail, ceadaidhibh dhomh gu' m bi i goirid.

'N uair a thainig ar n-athraichean do Chanada an toiseach, tha fios agaibh nach robh a bheag dhiubh ann an suidheachadh goireasach, ach ged nach robh, bha iad tiorail, misneachail, agus, a chumail suas an cridhe, chleachd iad na seann doighean a bh' aca 's a Ghaidhealtachd. Is cuimhne leam a bhi 'cluinnntinn m' athar ag iunseadh mu' n doigh chridheil air am b' abhaist do 'n t-seann Challuinne a bhi air a cumail. Bhiodh na daoine

ag cruinneachadh gu cuirm, bhiodh na sgialachdan, na h-orain, agus an dannsa dol mu'n cuairt agus rachadh iad dachaidh ri solus na gealaiche, moch 's a mhadainn. Mar thuirt MacLeoid :—

“ Ann an dubhlach gharbh a gheamhraidh,
 Cha b'e am bu ghainn' ar spors ;
 Greis air sugradh, greis air dannsa,
 Greis air canntaireachd a's ceol :
 Bhiodh gach seanair aosmhor liath,
 'G innse sgialachdan gun gho,
 Air gach gaisgeach fearail, greannmhor,
 Bha 's a ghleann 'n uair 'bha iad og.”

Air oidhche Calluinn' araidh, mu dha fhichead bliadhne roimhe so, bha cruinneachadh de 'n t seorsa so ann an siorramachd Bhruis, ri taobh Locha Huron. Bha grunn ghillean oga agus chailinn a lathair, agus bha sugradh nach bu bheag air a chuideachd. Ri am dol dhachaidh chaidh buidheann do na gillean seachad air taigh beag a bha ri taobh an rathaid, aite-comhnaidh seana bhoirionnach air an robh am “frith-ainm,” “Cuarag.” B' aon do na seann bhoirionnaich i aig nach robh dilsean no luchd-daimh 's an tìr so, ach a bha tighinn beo air toirbheartas an luchd-duthcha. Bha min choirce 'us chruithneachd, buntata, 'us measan eile, pailt 's an duthaich, agus do na nithean sin, cha bhiodh uireasbhaidh air na caillean.

Cha bhiodh cuirm am measg nan coimhearsnach aig nach biodh Cuarag ; bha i 'na deagh bhan-sgialaiche, agus b'urrainn d'i fonn a chur air seann oran luaidh cho math ris an dara tea. Cha robh i aig a chruinneachadh araidh air a bheil mi a' deanadh aithris, agus bu mhor iongantais na cuideachd nach robh i a lathair. Shaoil cuid gu'n robh i tinn, oir 'n am beachd cha chum-

adh ni eile air faibh i; bha cuid do'n bheachd gu'n robh i ann an eigin, oir bha'n geamhradh cruaidh air a bhliadhna sin; 's mar sin bha cor Chuaraig air a cnuasachadh.

'N uair a rainig na balaich taigh na cailliche, chunnaic iad craobh no dha a leag a ghaoth, 'n an laidhe faisg air a bhothan. Shaoil iad gu 'n d' thugadh iad tiodhlac gun-fhios dhi agus chaidh aon diubh air ais airson tuadh no dha, bho 'n taigh as an d' thainig iad. Ann am beagan uine bha connadh gu leoir air a ghearradh, 's air a spealtadh airson teine iomadh la, agus an deigh beagan fala-dha, 'us stairirich mu'n uineig, a chur feagal air Cuaraig thug na gillean dhachaidh orra. 'N uair a thainig solus latha, chunnaic Cuaraig a chruach chonnaidh, ach cha robh fios aice co a nochd an caoimhneas dhi. Cha b'fhada gus a robh i aig taigh a coimhearsnaich far a robh cuirm na Calluinne air an oidhche roimhe, agus b'ann aice bha 'n naigheachd. Bha 'n teaghlach ag gabhail an trath-maidne, car anmoch an deigh cairis na h-oidhche, agus shuidh Cuaraig gu bidh comhla riu.

"Ciod a thainig ort an raoir a Chuaraig, nach robh thu comhla ruinn ag cumail na Calluinne?" dh' fheoraich Fear-an-Taighe. Thug so an cothram labhairt dhi airson an robh i gu mi-fhoighidinneach a feitheamh.

"Tha mi taingeil a bhi beo," fhreagair i; "'s ann agam fhin a bha'n oidhche dheth. Bha sibhse gu suilbhir g'ar riarachadh fein le biadh 'us deoch, 'us fearas-chuideachd; bha mise a cruaidh-ghleachd ris an anacair, a bhochdainn, 's an Donas! Cha 'n 'eil sibh g'am chreidsinn? Mata innsidh midhuibh mar a thachair. Bha 'n oidhche a bagradh stoirm, agus cha robh ach bioran maide no dha air taobh staigh an doruis, airson an teine. Laidh feagal orm gu'n toisicheadh cur us cathadh

's gu'm bithinn air mo dhruideadh suas leis an t-sneachd. Chaidh mi air mo ghluinean ri taobh na teallaich a dheanadh urnuigh, 's thuit mi 'n am chadal. Cha'n fhios dhomh cia fad a bha mi mar sin ; ach dhuisgeadh mi le fuaim thuamach, a chuir clisgeadh orm bho chas gu ceann. Chuala mi guth mi-nadarra a'gladhaich 'A Sheonaid Nic-Cuarra, thig a mach !' Bha mi ionnan a's marbh leis an fheagal. 'Thug mi suil air an uineig bho'n d'thainig an guth, ach mu thug, mo chreach 's mo leireadh, co 'bha sin ach am fear a's miosa, le suilean 'n a cheann mar eibhlean teine. Bha aon diubh lasrach, dearg, 's an t-aon eile lasrach, uaine,—mar gu 'm biodh e cam 'na fhradhrac. Bha adhaircean soillseach air, 's na h-uile uair a ghluais-eadh e a cheann shaoileadh tu gu'm b'e an dealan-de a bhiodh a cluiche. Leig mi sgriach bais asam, a'tarruing seun beannaichte na Trianaid mu'n cuairt orm, agus air ball, chaidh Satan as an t-sealladh 'n a lasair theine. Cha robh fois dhomh-sa fad na h-oidhche. Ma rinn mi urnuigh dhurachdach riamh b'ann an raoir. Bha fadal orm airson solus an latha, agus dh' fhosgail mi 'n dorus mus robh ceo bho thaigh sam bith mu'n cuairt. Ach air m' fhirinn 's air m' fhacal ! Ciod a chunnaic mi fa chomhair mo shuilean ach cruach mhor chonnaidh a chuireas seachad an geamhradh dhomh. Dh' fhosgladh mo shuilean. B' e run an droch spioraid a thighinn eadar mi 's an urnuigh, ach cha 'n e amhain gu'n d' fhuadaicheadh air falbh eile buaidh a chreideamh, ach bho laimh an Fhreasdail uile-bheannaichte sin a tha coimhid thairis air Cuaraig, thainig freagairt do'm urnuigh anns a chruaich chonnaidh."

FEAR-AN-TAIGHE—Bitheadh creideamh Chuaraig anns

an Fhreasdal, neo-bhriste, is E gun teagamh a tha 'cur caoimhneis agus smaointean fial ann an cridheachan dhaoine. Mu'n Fhear a's miosa, 's ann a'm bruidhear dubhach na h-oidhche a chnnaic i e; agus mu'n chonnadh, gu ma fada 'nochdas gillean oga, sunndach, leithid a chaoimhneis do dh' fheumaich bhochda na tire. Mile taing dhuibh, a Mhaighstir; 's math da rìreadh an sgialachd a thug sibh thugainn a nochd. Cuiribh teine ris an tombaca, a nis, 's bheir Sine oran duinn.

Ghabh Sine an t-oran " Bruthaichean Ghlinn Braoin," a chuideachd a' togail an fhuinn.

FEAR AN TAIGHE: Sin aon do dh' orain mhilis Uilleim Rois, sar bhard gaol na Gaidhealtachd. Tha da fhonn air an oran, a h-aon air achleachdadh ann an siorramachd Rois, far an d'araicheadh am bard; agus an t-aon eile ann an Earra-Ghaidheal. 'S e 'm fear tuathach a's blaisde leam fein. 'Bheil dad agad-sa, Alasdair, a bheir thu dhuinn? Tha fios agad air riaghailt na ceilidh; 's fheudar do gach fear 'us te rud-eigin a dheanadh a chum solas na cuideachd, ma 's e oran no naigheachd, a bhios ann.

ALASDAIR DHRUIM-A-CHNUIC: Bho'n thacnatandona 'a cur dragh orm, cha dana leam fonn a thogail, ach feuchaidh mi ri naigheachd gle ghoirid innseadh dhuibh. Mar math uam, cha mhath thugam i, 's mar toir i gaire gus an aodann tha mi 'g earbsa nach toir i diar bho 'n t-suil. Ach gus am faigh mi cothram air mo chuimhne a tharruing ri cheile, nach faod srann air a phiob a bhi againn?

Chluich am Piobaire Ruadh port Chabarfeigh, agus thoisich Alasdair.

ALASDAIR: Air taobh an ear do thir-chaol siorramachd

Bhruistha rugha creagach, geur, a seasamh ard thar garbhlaicha chladaich, ris an abrar "Creag an Spioraid." 'Nuair a bhiodh gaoth fhuar, ghuineach, a gheamhraidh a' seideadh le oian thiamhaidh, b' abhaist do mhathraichean Chinn-an-Leoghainn 'bhi g'innseadh d'an clann, gu'n robh a Mhaighdeann Innseannach a mach, agus b' abhaist do luchd falbh na h-oidhche aithris le uamhas, mar a chunnaic iad og bhean sgiamhach 'n a seasamh air barr na creige, a falt fada, or-bhuidh, a' sroladh 's an stoirm. Bha an seanachas so ag eiridh bho sheann bheul-aithris a bh'aig na h-Innseanaich a bha aon uair a sealbhachadh na tire.

A reir na h-eachdraidh, bha da threubh Innseanach 's a chearn ud eadar an robh strith agus cogadh fuilteach. Aig ceannard a h-aon diubh bha nighean og, mhaiseach, a bha mar chlach a shul, 's air an robh gaol aig an treubh uile. Thugadh Eala-bhan mar ainm oirre. Bha fuil gharg a seorsa a bruchdadh 'n a cuislibh, agus an aghaidh combairle agus aithn' a h-athar lean i an treubh air luirg a chath. Bha blar air a chur, anns an robh treubh na h-ighiunn, d'am b' ainm na Hurons, buadhach. Ghlac iad Luathas, oighre og na Peutans, an treubh eile, agus cheanghail iad e eadar lamhan agus chasan gus am faigheadh iad cothram air bas amhgharach a dhioladh dha. Chunniac Eala-bhan an t-oganach, —cha robh ann ach giullan—agus thuit i ann an teasghaol air. Bha fios aice air 'n a bha 's an dan da agus le innleachd sheolta thug i ma seach gu'n d' fhuair e as. A'n sinn rinn e ni mi-chneasda. mi-nadarra, nach robh teisteil d'a cheann no d'a chridhe. Bhrath e an treubh aige fein d'an naimhdean, a' saoil sinn gu'n coisneadh sin fabhar agus lamh na h-ighiunn dha bho na Hurons.

Ach ged a ghabh na Hurons cothram do'n fhoill, cha deach leo 's a chath an uair so, agus b' fheudar dha teicheadh bho 'chuideachd fein airson a bheatha. Thug e air gu treubh a leannain a' n dochas gu'n gabhadh iad ris, 's gu'n deanadh iad a dhion bho 'chairdean. Ach bha e air mhealladh. Bha inntinn nan Innseannach bruideil agus truailte gu leoir, ach cha bhiodh dad aca ri dheanadh ri neach a dhearbhadh e fein a bhi cho cealgach, mi-dhileas s' a bha Luathas. Chaidh e fein agus Eala-bhan a sgaradh o cheile agus threoraich an ceann-cinnuidh e gu sgorr ard ri taobh an Loch. Air a bhinnein labhair aon do sheanairean na treibhe mallachd os a chionn, agus thilg iad e leis a chreig, a dh' fhaotainn bais s' an doigh so air son a mhi-dhilseachd d' a threubh. Ach 'n uair a bha so dol air aghairt, cha d' thug iad fainear gu robh Eala-bhan ag amharc orra troimh'n doire dhomhail, a suilean bagarach a loisgeadh le nimh-theine. Cha luaithe a bha fear-a-cridhe thar na creige na thug i sgàl oillteil aisde a chuir clisgeadh air a chridhe 'bu chalma bha'n sin. Le aon leum bha i air oir na creige agus ag tionndadh air a h-athair, thuirt i, "An lamh a dhochann mo ghradh, lot i mo chridhe gu bas, 's cha bhi fois aig mo spiorad tursach, gus am bi iarmad mo threubh gu tur air a ghearradh as." Agus leis a sin, leum i bharr na creige mus b' urrainn na h-Innseanaich ghealtach greim a dheanadh oirre. B' e so bonn na beil-aithris, agus b' e samhladh Eala-bhain, n' am b' fhior, a bha ri fhaicinn air binnein na creige, a tha a nis a dol fo'n ainm "Creag an Spioraid."

FEAR-AN-TAIGHE: Tha sinn 'n ur comain airson an naigheachd chiataich so. Tha iomadh sgeula, neonach air innseadh mu na h-Innseanaich, 's tha sinn ag earbsa

gu'n cluinnsinn tuille dhiubh mu'n teid a bhliadhna so seachad.

SINE: Nach eil Gilleasbuig dol a thoirt oran duinn ?

LACHLANN AN T-SRATH: Bi modhail a Shine; tha do shuil a' cur Ghilleasbuig air bhreislich, an gille coir.

FEAR-AN-TAIGHE: Sin agad a Shine! Ach gheibh sinn sgeula Sithche Ghlinne-Cuaich, o Ghilleasbuig an Saor.

GILLEASBUIG: 'S fheudar strìochdadh, a's suil chorrach Shine orm. Ma ta, so agaibh an sgialachd, cho math 's a's cuimhne leami. Bha e 'n a chleachdadh aig na tailleirean, roimhe so, a bhi dol bho thaigh gu taigh, a' dh obair. Rachadh fios a chur orra gu taigh agus dh' fhanadh iada'n singus am biodhanobair crìochnaichte. Chuir Fear Ghlinne-Cuaich fios air taillear a bha 'comhnaidh faisg air, a thighinn g'a thaigh a dheanadh deiseidha. Chaidh e ann. Bha e ro mhath air cluiche na tromp. 'S an fheasgair an deigh dha bhi troimh obair latha, bhiodh e cluiche dhaibh, 's bha iad ro-thollichte leis an taillear. Bha leanabh aig Fear Ghlinne-Cuaich, a bha bliadhn' thar fhichead a dh' aois, 's cha b' urrainn da bruidhin no coiseachd a dheanadh. Bhiodh e 'la 's a dh' oidhche 'n a shineadh ann an creathaill aig ceann an t-seomair, 's cha b' urrainnear gu leoir bidh a chumail ris; bhiodh e 'g itheadh gun sguir. Dh' fheumadh an searbhanta an spain a chumail ri bheul, a choinn nach robh lughs 'n a laimh fein gu sin a dheanadh. Na'm fagadh i e leis fein, cha bhiodh sith 's an taigh, a los a ghlaodhaich. Bha an taillear 's an searbhanta 'n an suidhe air oidhche araidh leotha fhein. 'us thug an taillear lamh air an trompa mar a b' abhaist dha. Ghairmeadh an

searbhanta a mach agus 'n uair a bha i as an t-sealladh sheall an leanabh air an taillear agus rinn e lachan mor gaire, a cheud ghaire a chualatar riamh uaithe. Dh' innis an searbhanta do Fhear Ghlinne-Cuaich gu'n robh an leanabh toilichte le ceol an tailleir, 'us dh' fhasdadh an taillear airson mios a chum an leanabh a ghiollachd 'us ceol a chumail ris. Bha 'n taillear a suidhe suas g'a fhaire na h-uile h-oidhche, 's bha 'n searbhanta g'a ghleidheadh re an latha. Air an treas oidhche thoisich an leanabh air cronan a chumail ris a cheol, 's bha e gaireachdaich gu h-anabarrach. Shaoil Fear Ghlinne-Cuaich gu robh buaidh ann an ceol an tailleir a bha iongantach. Bha an leanabh a fas ni bu daine agus air an ath oidhche thainig e a mach as a chreathaill 's thoisich e air sraidearachd ri ceol na trompa. Thuirt e ris an taillear gu'n deanadh e duine beartach dheth mar innseadh e do neach sam bith an ni a bha e dol a dh' innseadh dha mu thimchioll fein. An sin dh'innis e do'n taillear gu robh mac dligheach Fhir Ghlinne-Cuaich air falbh aig na Sithchean ann an Beinn-Eadargain agus gu'n do chuir na Sithchean esan 'na aite a chum deuchainn mhor a chur air Fear Ghlinne-Cuaich. An deigh dha dannsadh greis, chaidh e air ais do'n chreathaill. An ath oidhche, 'n uair a thainig e a mach as a chreathaill, dh' fhas e cho mor 's gu'n robh a cheann a ruigsinn an lobhta, 's bha an taillear a gabhail feagail as. Shuidh e sios aig a bhord a bh' aig an taillear 's ghabh e roinn do'n t-suipeir a bh' air. Dh' eirich e a dhannsa, agus dh' fhas e aighearach, 's thoisich e air seinn :—

“'S fhada bh' uam fhin mullach Beinn Eadargain,
'S fhada bh' uam fhin beallach a Mhoraghain ;

Cul na mullaichean, 's beul na monaidhean,
'S gur fada bh'uam fhin beallach a Mhoraghain."

Chaidh e a' n sin air ais do'n chreathaill. La' r na mhaireach, smuainich an taillear gu'm bu choir dha innseadh, mar a thachair, do Fhear Ghlinne-Cuaich, s' gu'm faigheadh e a mhac air ais. Chomhairlich e gu'n rachadh Fear Ghlinne-Cuaich am folach air cul na leaba, ann an ceann an tinnich, agus mar a chitheadh e an Sithche air a chois, 'bhi deas g'a thilgeadh a mach air an uinneig, a bha gu bhi air a fagail leth-fhosgailte air son an aobhair. B' ann marsin a bha. 'N uair a thainig an oidhche, 's 'n uair a ghabh an Sithche a leoir do'n bhiadh 's do 'n deoch, 'chaidh a chur air bord an tailleir, 's gu h-araid do' n deoch, rinn e danasadh mar a b' abhaist, a fas ni bu mho, 's ni bu mho, na h-uile car, gus am b' fheudar dha a cheann a chromadh fo'n lobhta. Mar a bha e gudol air ais do'n chreathaill, nochd Fear Ghlinne-Cuaich e fein, le claidheamh ruisgte aige 'n a laimh. Thug an Sithche aon leum as a mach troimh 'n uinneig. An deigh dha faotainn a mach, rinn e guidhe do'n taillear 's do Fhear Ghlinne-Cuaich, a bha fuathsach sgreamhail. Dh'eisd iad ris a ghuidhe agus a'n sin bhagair Fear Ghlinne-Cuaich gu'n cuireadh e teine ris an tom mar bitheadh a mhac air a thoirt suas an ceann ceithir uairean fichead. Aig ceann na tim sin thainig an t-oigbredhachaidh, agus bha gairdeachas mor air a dheanadh, 's rinneadh cuirm a mhair bliadhna 'us la.

Sin agaibh sgeula Sithche Ghlinne-Cuaich mar a chuala mi i anns an Eilean Thiristeach. Tha i gle shean agus tha i air a h-innseadh air caochladh doigh ann an caochladh aitean.

FEAR-AN-TAIGHE: Chuir Teachdaire Gaidhealach Thormoid Mhic-Leoid, agus eolas ar la-ne, as do na beachdan neonach a bh' aig ar n-athraichean mu Shithchean, 's mu bhuidsichean; a' s math gu'n do chuir; ach tha mi de'n bheachd gu bheil faoineis ni 's measa a' n ceann moran do'n mhuinntir oga 'a nis 'na saobh-chra'bhadh ar sinnsearan. An toir thu oran duinn, a Chiorstaidh?

Sheinn Ciorstaidh, "Fhir a Bhata," na doigh thaitneach fein, 's ghairmeadh air Lachlann an t-Srath airson sgialachd.

LACHLANN-AN-T-SRATH: Bha sibh a' bruidhinn ma na buidsichean, s' bha Gilleasbuig ag innseadh ma na taillearan. Anns an eilean bheag 's and' rugadh mise, eilean Beinn a Bhaoghal, bha e 'n a chleachdadh aig cuid do na taillearan a bhi 'g obair bho thaigh gu taigh, mar a b' abhaist dhuinn a bhi 'g radh "A'dochann a chait." Innsidh mi sgialachd bheag air aon diubh sin. Bha e ann an taigh ag obair agus bha boirrionnach faisg air an taigh sin, aig an robh an droch shuil. Is e sin, b' urrain di am bainne a thoirt bho'n chrodh, an t-im bho chrannachan nam banarach, a neart bho'n ainmhidh, 's a shlahte bhoen duine. Thainig i staigh aon mhadainn do'n taigh far an robh an taillear ag obair, a dh' iraraidh eibhleig theine. Bha'n taillear ag obair gu dian, a fuaitheal aig aon cheann do'n taigh, 's bha bean-an-taighe, ag deanadh ime, aig a cheann eile. Cha robh ach aon seomar mor 's an taigh le aite teine 'sa mheadhon. Thug i eibhleag as an teine us dh' fhalbh i. Cho luath 's a bha i air taobh a muigh an doruis dh' eirich an taillear, 's chaidh e gus an teine. Thog e an clobha s' chuir e eibhleag theine 's an t-soitheach uisge, a bha 'na sheasamh

aig taobh a bhalla. Bha bean-an-taighe gearan nach robh im a'tighinn, 'n uair a thainig am boirrionnach air a h-ais airson eibhleig eile. Thuirt i nach b'urrainn d'i an teine a lasadh, nach robh fhios aice ciod bha cearr air. Dh' fhalbh i leis an dara eibhleag, 's eirich an taillear 's chuir e eibhleag eile 's an t-soitheach uisge. Thainig a bhean air a h-ais an treas uair. Cha b'urrainn d'i an teine a bheothachadh, 's cha robh fios aice ciod a dheanadh i. Cha d' thuirt an taillear diog, ach 'n uair a dh' fhalbh i leis an trieamh eibhleag, dh' eirich e 's chuir e an treas eibhleag 's an t-soitheach uisge. "Ciod a tha thu deanadh mar sin?" dh' fheoraich bean an-taighe. "Seall," fhreagair an taillear, "d e mar tha an t-im a tighinn air aghairt." Dh'fhosgail a bhean am muidhe; bha'm bainne air bristeadh ach cha ro coltas ime ri fhaicinn. "Thig leam a'n so," ars' esan, 'us thanig i gus an teine. A'n sin, far an do chuir an talliear na h-eibhleagan, bha tri mill do'n im. "S e-boirrionnach olc a tha'n sud" ars' an taillear, "Tha n' droch shuil aice. Thainig i an'so a ghoid an ime agus thug i leatha e 's na h-eibhleagan teine, ach thainig e air ais le bhi 'cur nan eibhleagan eile 's an t-soitheach uisge. Ma thig i air a h-ais a rithist, ach tha mi creidsinn nach d'thig, cuiridh mi combarradh na croise air a bathais leis a chlobha, air a dheanadh dearg-theth, 's cha chuir i dragh air creutair tuille fhad 's is beo i."

FEAR-AN-TAIGHE: 'S math a gheibhear sibh a Lachlainn. Faodaidh sinn a nis an t-urlar a reiteachadh, 's ma sheideas am Piobaire suas an ceol, dannsaidh na h-ighneagan agus am Maighstir-Sgoil 'us Gilleasbuig-an-Saor, an "Ruidhle-Thullachan" dhuinn, mus fas an oidheche ni 's anmuiche.

(Bha Ruidhle-Thullachan air a dannsa a reir iarrtais Fear-an-taighe, 's an deigh sin chaidh deoch an doruis mu'n cuairt 's ghabh an luchd taghail an cead.)

FEASGAR SABAID 'SA GHÀIDHEALTAGHD.

Fhuair sinn dachaidh bho'n eaglais mu cheithir uairean an deigh meadhon latha, agus bha diathad bhlasda, riarachail, deas air ar son. Cha robh an teaghlach beartach, ach ni mo bha iad eisimeileach; le dich-ioll agus deagh fhearas-taighe, bha iad ag cosnadh beo-shlainte chuimsich, mheasarra, 's mar robh iad stroghai 'n an caitheamh-beatha, cha robh iad uireasbhach 'n an crannchur. Ach b' e 'n cleachadh, agus cleachdadh na duthcha d'am buinneadh iad, ullachadh araid a dheanadh fa-chomhair na sabaid, agus bhiodh araon na trusgain a b'fhearr a bh' aca air an caitheamh, agus am biadh's an t-annian a b'fhearr a bha 'n an comas, air an cur air a bhord aig am na diathaid. Air an latha araid so, shuidh an teaghlach sìos gu bidh, gu modhail, ordail, mar bu ghnath, an clann bheaga le 'a lamhan paisgte, 's an suilean duinte; an fheadhainn mhora le'n cinn cromta, a' feitheamh gu foistinneach air a bheannachd. Bha 'n comhradh aig a bhord freagarrach do'n la 's do'n am, stolda, gun bhi ro-sholuinte. Cha robh na h-igheanan ag innseadh do chach a 'cheile ciod na srolagan riomhach a bha am ban-choimhearsnaich a caitheamh; ni mo thuirt Anna ri Mairi gu robh boireid ur air ceann Pheig-

idh Bhrice. Cha robh guth air gnothaichean na seachdainn, no air sgeulachdan faoine an t-saoghail. Bha e soilleir gu robh urram air a chuir air La an Tighearna leis an teaghlach so. Chaidh, gun teagamh, aon do na balaich oga faisg air bruaich na h-eucoir, 'n uair a thuirt e ri bhrathair, gu robh Ipidh Chrubach agus Alaidh Ruadh 'n an cadal re na searmoin, agus gu'n do thuit bocsa snaoisein a Chamaranaich Mhoir air an urlar, eadar dha shuidheachan, ach ghlac suil a mhathar e mus deachaidh e ni b' fhaide, agus shiolaidh e sios gu samhach ri dhinneir. Chrom fear-an-taighe a cheann gu seimheil, eisimeileach, a thoirt buidheachais airson maitheis De agus toirbheartais an fhreasdail a dh' ullaich dhaibh teachd-an-tir; agus an deigh dha so a dheanadh, chord iad air co a dh' fhanadh aig an taigh, re an fheasgair a ghabhail aig an spreidh.

Mu sheachd uairean thoisich a choinneamh, ann an taigh Huistein Mhoir, a bha lan gu ruig an dorus. Thainig an sluagh 'n am badanan bho gach taobh gu taigh na coinnimh. Bu chiatach a bhi g' am faicinn ag cruinneachadh. Bha na frith-rathadan, air an robh iad ag imeachd gu mall, a' dol troimh achaidhean arbhair 's an dias; ri taobh raointean bhuntata a bha dearsadh le barr-a-gug na sil luathraich. Bha am feasgar ciuin, meath-bhlath, mu dheireadh an t-samhraidh. Bha fionnarachd na camhanaich ag urachadh 's ag aiseag an suigh 's an snuaidh agus am boltraich cubhraidh do na luisreagan, 's do na ditheinean-fiadhaich a bha air am fasgadh tioram le teas ard mheadhoin latha.

Ach ma bha 'n sealladh a muigh, a leigeil ris, mar a bha e ag deanadh, maise naduir agus mor-mhaitheis Iehobha,—ma bha 'n sealladh aluinn, so, lan-inntinneach

bu mho gu mor na sin a bha druigheachd na suaimhneis naomh a bha 'n a laidhe air a choinnimh. Agus ni robh na coilltean uaine, na raointean arbhair bhuidhe-ghorm, leth-abaich, maoth-mheilich nan uan oga, ceol binn eun nam preas, agus cubhr'achd an adhair shamhraidh, 'n an ullachadh neo-iomchuidh do 'n anam a bha 'sireadh fardaich iriosail an aoraidh, a chum cliu a thoirt do Chruithfhear na cruinne, 's a chum ainm a ghloireachadh airson toirbheartais a fhreasdail agus mor thiodhlaicean a ghrais. Mu 'n cuairt air a cheann-teine (an seomar far am b' abhaist do'n cheilidh bheadarraich a bhi rioghachadh, agus air an aobhar sin, mar bu trice, an seomar bu mho's an taigh) bha daoine 'us muathan, sean 'us og, n' an suidhe. Cha robh diog no gluasad a' bristeadh samhchair na cuideachd; bha iad 'n an sluagh soluimte; stuama 'n an giulan, durachdach 'n an inn-tinn. Bha e soilleir gu'm bu mhuinntir iad aig an robh creideamh anns na firinnibh mora a bhuineas do' n Dia-dhachd, agus a shocraich an caitheamh-beatha a reir an creidimh.

Anns a chearnaidh do'n Ghaidhealtachd mu bheil mi 'deanadh aithris, bha a choinneamh shabaid fheasgair, re iomadh bliadhna fhada, air a bonn. Bha i sean ri linn ar seanairean agus cha 'n eil mor theagamh nach deachaidh a suidheachadh leis na ministeirean ainmeil a bha 's an Taobh Tuath, dluth air da cheud bliadhna roimhe so. Bha na sgìreachdan air an roinn am measg nan eildeirean a reir aireamh nan teaghlachan agus an astair bho chach a cheile. Bha a choinneamh air a cumail anns gach taigh 's a chuairt, seachdainn mu seach, agus far am biodh deich no dusan taigh 's an roinn, bhiodh an aireamh sin do sheachdainean mus d' tigeadh i air teagh-

lach an dara uair. Bha an rian so ag oibreachadh gu ro-mhath ; bha 'n sluagh eudmhor mu'n chuis agus bha araon eolas air na sgriobtuiribh agus crabhachd air an craobh-sgaoileadh.

Ann am facal no dha faodar iomradh a dheanadh air an doigh anns an robh amfeasgar sabaid air a chur seachad aig aon do na coinneamhan so, a bha air a cumail, mar a chunnaic sinn, air an oidhche araid a th'againn 'san amharc, ann an taigh Huistein Mhoir. Bha 'n sluagh a feitheamh le geur aire ri teachd a steach an eildeir a bha gu bhi riaghladh na coinnimh. Bha cathair ghairdeanach mhor air a' cumail falamh air a shon ri taobh an teallaich agus air dha tighinn a staigh shuidh e innte, agus shin bean-an-taighe am Bioball mor 's an leabhar sailm d'a ionnsuidh bho sgeilp a bha ri taobh an teintein. Thug e a' mach salm agus sheinneadh tri rannan d'i. B' iad na briathran a ghabh iad, iadsan anns a bheil an Salmadair 'moladh Dhia airson toradh na talmhain :

An Talamh tha' thu 'fiosrachadh, 's 'g a uisgeachadh gu réidh
Le amhainn Dhé tha lan de'n uisg', trom beartach ni thu e.
Dhoibh arbhar tha thu 'deasachadh, le' d' fhreasdal caomha fein ;
'S ag uisgeachadh le pailteas mor, nan iomairean gu min.

A sgrìoban leagaidh tu a sìos, le frasaibh ni thu tais ;
A chinneas agus fhochann fos, beannaichidh tu le mais ;
Mu'n bhliadhna coron tha thu 'cur, le d' mhaithreas fein, a Dhé ;
Tha saill a' sìleadh anns gach ait, o d' cheumanaibh gu reidh.

Air clusainibh glas an fhasaich luim, nuas sìlidh iad gu mion ;
Na tullaich bheag', gach taobh a ta lan aoibhneis agus gean.
Na clusainean air an sgeadachadh le treudaibh anns gach ait ;
Na glinn, le arbhar folaichte, a seinn le iolaich ard.

Thog iad an guth gu fonnmhor binn 's an t-sailm.

gach neach a seinn a mach gu cridheil, beothail, 's a deanadh co-sheirm aluinn le cheile ; oir am measg shochairan an aite bha sgoil-sheinn anns an robh fuinn nan salm air an teagasg do'n oigridh, 's cha robh feum air coisir no air inneal ciuil ann an eaglais no ann an coinnimh.

B' e 'n cleachdadh gu'm biodh a cheud urnuigh air a cur suas le fear-an-taighe, an dara, le fear an taighe 's an robh a choinneamh air oidhche na sabaid roimhe sin, 's an treas urnuigh roimh 'n dealachadh, le fear an taighe 's am biodh a choinneamh air an ath oidhche shabaid an deigh sin. B' ann mar sin a bha air an oidhche so. Dh'iarr an t-eildear air fear-an-taighe 'dhol an ceann na h-urnuigh, 's mar neach a chleachd a bhi umhal dh'eirich e gu foil. Labhair e gu socrach, ciuin, ag cothramachadh gach facal, 's gach iartras, bha 's an urnuigh ghoirid..

A'n sin, leughadh cuibhrionn do'n fhirinn, an caibideil 's an robh ceann-teagaisg na searmoin Ghaidhlig, air madainn an latha sin, 's an eaglais. Leugh an t-eildear an ceann-teagaisg an dara uair, agus a reir gnaths na coinnimh, dh'iarr e air gach gilleog 'usduine 'bha lathair, cuibhrionn goirid do 'n t-searmoin aithris dha agus bha rud-eigin aig a h-uile h-aon diubh ri innseadh. Bha cuid aig nach robh cuimhne mhath, 's nach b'urrainn an teagasg a chual' iad a chur air rian ceart, ach thigeadh an t-eildear no aon do na daoine eile g' an codhail 's bhiodh beachdan, samhlaidhean, no teagasgan a mhinistear, mar a dh'fhaodadh na cuise 'bhith, air an cur ceart. Agus mu'n rachadh a chuibhrionn so do'n dleasdanas thairis, air uairibh, dh' fhaotadh gu'n innseadh aon do na daoine nach robh aig an t-searmoin, beachdan an ughdair

dhiadhaidh a bha e 'leughadh re an latha aig an taigh.

Bhiodh, a nis, an t-am ann airson nan ceisd. Bha leabhair-aithghearr nan ceisd air a roinn ann an trì earrannan, 's bha earrann air a gabhail gach oidhche. Bha ceisd no dha, a reir an aireamh bhiodh a lathair, air an cur air gach neach, og 'ussean agus feumar aideachadh gu robh an deagh chuimhne aig an airemh bu mho dhiu. An deigh so bha da rann sailm air an seinn agus urnuigh air a cuir suas. Leugh an t-eildear caibideil eile rgus le seinn a ris, agus urnuigh thugadh a choinneamh gu crich.

Sin an doigh a bha'm feasgar sabaid air a chaitheamh 'san sgìreachd anns an d'rugadh, 'san do thogadh an sgriobhadair, agus ann an iomadh sgìreachd eile do'n Earra-Thuath. Mar a thugadh fainear, 's iomadh bliadhna bho'n chaidh a chleachdadh so a shuidheachadh, agus tha e fathast air a ghnathachadh mar bu dual. Mar 'eil aireamh an luchd-eisdeachd aig na coinnimhean cho 'lionmhor 's a b'abhaist, cha 'n ann a chionn gu bheil tograidhean an t-sluaigh air an tarruing o nithean siorruidh, ach a chionn gu bheil clann nan Gaidheal a cosnadh am beo-shlainte fad òir falbh bho achaidhean uaine tir an duthchais, 'n am fogarraich ann an tìrìb chein ; 's mar 'eil luchd-aideachaidh cho comasach, deas-bhriathrach, ann a bhi togail fianuis air taobh na firinn 's na coireachd, 's a bha an athraichean leth-cheud bliadhna roimhe so ; mar eil gibhtean cinn Phoil aca, guidhemid gu'm biodh tomhas iomchuidh do ghradh Bharnabuis 'n an cridheachan.

NOTE.—The Business Cards following have been contributed by patrons of this book, and are commended to the favorable consideration of the reader * * * * *

Johnson's Universal Cyclopædia

*When buying a Cyclopædia
Why not get the Latest and the Best.*

IS IN POINT OF FACT

The only New, Scholarly
and Up-to-Date Cyclopædia
now on the market. * *

It is complete in Eight Extra Royal Octavo Volumes; contains 7,264 pages of 1,680 words each, or 12,203,520 in all.

CHARLES KENDALL ADAMS, LL.D., Editor-in-Chief.

ROBERT LILLEY, M.R.A.S., Managing Editor.
(*The eminent Scottish specialist*)

Assisted by Thirty-Six Eminent Scholars, including College Presidents, Professors and Government Specialists as Associate Editors, and a very large corps of contributors, each writing on his own specialty and Signing his name to his articles.

"I feel confident that any piece of work which bears the name of my friend, Dr. Charles Kendall Adams, will have been most carefully, conscientiously, and satisfactorily done."

PROF. GOLDWIN SMITH, D.C.L.

"I think the work the best I have seen for schools and private and professional libraries."

N. BURWASH, LL.D., Chancellor Victoria University, Toronto.

D. APPLETON & CO., PUBLISHERS.

Specimen pages will be mailed on request

GEO. N. MORANG, Manager for the Sale in Canada

63 Yonge St., TORONTO, ONT.

185 St. James St., MONTREAL, QUE.

THE FUNK & WAGNALLS STANDARD DICTIONARY OF THE ENGLISH LANGUAGE.

301,865 VOCABULARY TERMS

247 EDITORS AND SPECIALISTS.

583 READERS FOR QUOTATIONS.

5,000 ILLUSTRATIONS.

COST OVER \$960,000. APPENDIX OF 47,468 ENTRIES. 88 FULL-PAGE MAPS.
SCOTTISH TERMS were defined by Rev. William Wye Smith, St. Catharines, Ont.

PRICES.—IN ONE VOLUME (with Denison's Reference Index), Half Russia, \$15; Full Russia, \$18; Full Morocco, \$22. IN TWO VOLUMES (with Denison's Reference Index), Half Russia, \$18; Full Russia, \$22; Full Morocco, \$26.

Sold exclusively by Subscription.

FUNK & WAGNALLS CO., 11 Richmond St. West,
TORONTO.



Systematic



Saving

CAN be accomplished by taking out an Endowment Policy in the **Confederation Life Association** on the Unconditional Accumulative Plan.


Under this form of Policy a man can provide for the necessities of himself and family, while capital is built up from year to year to be used by himself in his old age. The policies are absolutely free from conditions, and contain liberal privileges as to cash surrender and paid-up insurance. Extended insurance is granted after two years.



Rates and full information will be sent on application to the Head Office, Toronto, or to any of the Association's Agents.

J. K. MAGDONALD, Managing Director.

W. C. MACDONALD, ACTUARY.



WHEN you hear of a medicine being in "everyone's mouth," and when you are told of a medicine that commands a larger sale than any of its competitors, and the demand for which increases year by year, and for many years, then you may be certain it possesses no ordinary degree of merit. Such, in brief, has been the history of **Dr. Thomas' Eclectic Oil** up to the present time. From far and near, from the rich and the poor alike, have poured in streams of testimony as to the wonderful cures effected by this **Oil**. In cases of Neuralgia, Rheumatism, Lumbago, Lamé Back, Asthma, Catarrh, Diphtheria, Coughs, Colds, Sore Throat and Croup it has achieved marvellous results; it has been used with equal success in the treatment of Piles, Frostbites, Chilblains, Toothache, Earache and Headache, while in its application for Burns, Bruises, Wounds and Sprains it has operated like a charm.

USED FOR ALL AILMENTS.—

MR. CHAS. G. GRIMES, Walker's Point, Ont., writes:—"Dr. Thomas' Eclectic Oil cures so many different diseases that everyone uses it, and says it is the best medicine ever sold in this part of the country."

STREET CAR ACCIDENT.—MR. THOMAS SABIN says:—"My eleven year old boy had his foot badly injured by being run over by a car on the Street Railway. We at once commenced bathing the foot with Dr. Thomas' Eclectic oil, when the discoloration and

swelling were removed, and in nine days he could use his foot. We always keep a bottle in the house ready for any emergency."

MR. JOHN GRAHAM, Stevensburg, Mich., writes:—"Dr. Thomas' Eclectic Oil is the best family medicine you can have in the house. I have been using it for fifteen years."

MR. W. B. HILL, Cobourg, says:—"I have used it for croup, and found it all you claim it to be; can also testify to its efficacy in relieving pains in the back and shoulders."

NORTHROP & LYMAN CO., LIMITED,

21 FRONT STREET WEST, TORONTO.

Without a Dollar



Bad as it may seem to be "Without a Dollar," we are proud of the fact that we have been able to close our books promptly on the 31st of December without a dollar of interest in arrears, or a dollar's worth of real estate on our hands for three successive years—1894-5-6. Where is there another institution with over \$500,000 worth of assets that can say as much?

31st December, 1896.

Without a dollar of interest overdue.
Without a dollar's worth of real estate owned.
Without a dollar of claims in dispute.
Without a dollar of death claims unpaid.
With the lowest death rate on record.
With interest income in excess of death claims.
With a premium income of \$151,318.60.
With surplus earnings for year of over \$26,600.
With gains in insurance in force of \$708,000.
With increased assets of \$34,700.
With 669 more policies in force.
With 626 more lives insured.
With \$6,760,000 of insurance in force.
With a record unexcelled for fair dealing.
With plans and policies which absolutely protect the rights of all.
With the largest number of total abstainers, classed by themselves, of any regular Company in America.
With a fixed determination to make the Company the best company in America for Total Abstainers to insure in.

THE TEMPERANCE AND GENERAL LIFE ASSURANCE COMPANY

is referred to above.

HON. G. W. ROSS,
President.

H. SUTHERLAND,
Manager.

Head Office :—"GLOBE" BUILDING, TORONTO.

- - THE HOME - -
Savings and Loan Co.

Office: **Limited.**
78 Church St. - TORONTO.

Capital, - - - \$2,000,000.

DIRECTORS.

PRESIDENT—HON. SIR FRANK SMITH, SENATOR.

VICE-PRESIDENT—EUGENE O'KEEFE.

W. T. KIELY. JOHN FOY. EDWARD STOCK.

SOLICITOR—JAMES J. FOY, Q.C.

This Company is specially authorized by its charter to lend money on the collateral security of the stocks or shares of Banks, Loan Companies, and other incorporated institutions, and also upon Government and Municipal Debentures.

Money loaned on the above securities for long or short periods, or on call, in large or small sums, and at reasonable rates of interest.

There is no expense or delay attending these loans, and they can be negotiated at any distance from Toronto.

Loans on mortgage on real estate (improved property), repayable on the straight loan plan or by instalments, at lowest current rates of interest. No valuation fee charged.

Mortgages and Government and Municipal Debentures purchased. Interest allowed on deposits.

For further particulars apply to the Manager of the Company at Toronto.

JAMES MASON, Manager.

The London and Ontario Investment Co.

LIMITED.

HEAD OFFICE—17 MELINDA ST., TORONTO, CANADA.

Capital Stock	- - - - -	\$2,750,000.
---------------	-----------	--------------

Amount of Invested Funds	- - - - -	2,800,000.
--------------------------	-----------	------------

PRESIDENT.

THE HON. SIR FRANK SMITH, K.C.M.G., SENATOR.

VICE-PRESIDENT.

WM. H. BEATTY, Esq.

DIRECTORS.

WM. RAMSAY, Esq.

HENRY GOODERHAM, Esq.

ALEX. NAIRN, Esq.

ARTHUR B. LEE, Esq.

W. B. HAMILTON, Esq.

FREDK. WYLD, Esq.

JOHN F. TAYLOR, Esq.

THA 'n seann Chuideachd so a' toirt airgid a' mach air riadh ann am Mòr-roinnean Ontario agus Mhanitoba, air urrasan cinnteach (mar fhearann, etc.). Tha an t'airgid air a thairgse air riadh iosal; air cumhnantan ceart agus cothramach, a tha air an deanadh soirbh a' dhioladh do 'n luchd-iasad.

Gheibhear fios air gach ni mu 'n Chuideachd bho.

A. M. COSBY, Riaghladair, Toronto.

THE ONTARIO BANK

Capital paid up	- - - - -	\$1,000,000.
-----------------	-----------	--------------

Reserve	- - - - -	50,000.
---------	-----------	---------

G. R. R. COCKBURN, *President.*

CHARLES MCGILL, *General Manager.*

BRANCHES.

Aurora.

Kingston.

Newmarket.

Sudbury.

Bowmanville.

Lindsay.

Ottawa.

Toronto.

Buckingham, Que.

Montreal.

Peterboro'.

Toronto, 500 Queen

Cornwall.

Mount Forest.

Port Arthur.

Street West.

London Agents:—Paris Bank, Limited.

New York Agents:—Fourth National Bank and Agents Bank of Montreal.

THE W. J. GAGE COMPANY, LTD

Manufacturers of Envelopes, Writing Tablets,

Blank Books, Etc.

Dealers in Printers' Supplies.

Selling Agents for the Royal Paper Mills Co.

SAMPLES AND QUOTATIONS PROMPTLY MAILED
ON APPLICATION

52 and 54 FRONT STREET WEST, TORONTO, ONT.

E. B. OSLER

H. C. HAMMOND

R. A. SMITH

OSLER & HAMMOND

Cable Address: "OSLER" TORONTO

Stock Brokers and Financial Agents

NORTH OF SCOTLAND CHAMBERS

18 King Street West, - - - TORONTO

Members of Toronto Stock Exchange.

Dealers in Government, Municipal, Railway, Car Trust and Miscellaneous Debentures.

Stocks on London, Eng., New York, Montreal and Toronto Exchanges
bought and sold on Commission.

INVESTMENT STOCKS A SPECIALTY.


GORDON MACKAY & CO.,



Importers

—AND—

Manufacturers,



Cor. Bay and Front Sts.

TORONTO.

TO THE TRADE.

JOHN MACDONALD & CO.

Wellington and Front Sts. East, Toronto.

GENERAL DRY GOODS - -

MEN'S FURNISHINGS - - -

HABERDASHERY - - - -

WOOLLENS AND CARPETS

FILLING LETTER ORDERS A SPECIALTY.

Imperial Bank of Canada.

CAPITAL (PAID UP)	-	-	-	-	-	-	\$1,963,600
RESERVE FUND	-	-	-	-	-	-	1,156,800

DIRECTORS.

H. S. HOWLAND, PRESIDENT.	T. R. MERRITT, VICE-PRESIDENT, <i>St. Catharines.</i>	
WILLIAM RAMSAY, <i>of Bowland.</i>	T. SUTHERLAND STAYNER.	ROBERT JAFFRAY.
HUGH RYAN.	HON. JOHN FERGUSON.	

HEAD OFFICE - - - - - TORONTO.

D. R. WILKIE, GENERAL MANAGER. E. HAY, INSPECTOR.

Branches in Ontario.—Essex, Niagara Falls, Welland, Fergus, Port Colborne, Woodstock, Galt, Sault Ste. Marie, St. Catharines, Rat Portage, Toronto—Corner Wellington St. and Leader Lane; Yonge St., cor. Queen; North Toronto Branch, cor. Yonge and Bloor Sts.; Ingersoll, St. Thomas.

Branches in North-West and British Columbia.—Winnipeg, Brandon, Calgary, Portage la Prairie, Edmonton, Prince Albert, Vancouver, B.C.

Drafts and Letters of Credit issued, available in any part of the world.

Deposits received and interest allowed. Prompt attention paid to collections.

Bonds and Debentures bought and sold.

JOHN KAY, SON & CO.,

WHOLESALE AND RETAIL

Carpets, Oil Cloths, Linoleums,

CURTAINS, DRAPERIES, Etc.,

34 KING STREET WEST,

— TORONTO.

● **WITHOUT AN EQUAL.** ●

ST. JACOBS OIL

TRADE MARK

THE GREAT REMEDY FOR PAIN

CURES RHEUMATISM, NEURALGIA, LUMBAGO, SCIATICA,

Sprains, Bruises, Burns, Swellings.

THE CHARLES A. VOGELER COMPANY, Baltimore, Md.

Canadian Depot: TORONTO, ONT.

ASSESSMENT SYSTEM.

SONS OF SCOTLAND

BENEVOLENT ASSOCIATION.

A Benevolent, Social and Fraternal Association, organized in 1876, and incorporated under the laws of the Province of Ontario on the 8th day of April, 1880, and registered under the Insurance Corporation Act of 1892.

Scotchmen and descendants of Scotchmen are eligible for membership, and upon conforming to the Constitution can secure a Beneficiary Certificate to the extent of \$500 or \$1000, as desired, upon payment of the following monthly rates:—

Age	\$500	\$1000	Age	\$500	\$1000	Age	\$500	\$1000	Age	\$500	\$1000
18	\$0 30	\$0 60	26	\$0 34	\$9 68	34	\$0 41	\$0 81	42	\$0 49	\$0 97
19	31	61	27	35	69	35	42	83	43	50	99
20	31	62	28	35	70	36	43	85	44	51	1 01
21	32	63	29	36	71	37	44	87	45	52	1 03
22	32	64	30	37	73	38	45	89	46	53	1 05
23	33	65	31	38	75	39	46	91	47	54	1 07
24	33	66	32	39	77	40	47	93	48	55	1 09
25	34	67	33	40	79	41	48	95	49	56	1 11

OFFICERS.—*Grand Chief*—Donald Campbell, Milton. *Grand Chieftain*—Alex. Fraser, M.A., Toronto. *Grand Medical Examiner*—Dr. Thomas Wylie, Toronto. *Grand Secretary*—D. M. Robertson, B.A., Toronto.

All communications should be addressed to D. M. ROBERTSON, Room 70, Canada Life Building, Toronto.



CLUINN SO ! Am bheil seann litrichean agaibh le stampaichean orra ? Tha mi 'toirt coig dolair a h-aoin airson cuid do stampaichean a tha nìs sinne na 1869. Cuiribh thugam an seorsa ceart agus cuiridh mi thugaibh an t-airgead.

THOMAS PINKNEY,
P.O. Box 2506, TORONTO

Our Newest Publications

(AUTUMN OF 1896)

Canadian Savage Folk: The Native Tribes of Canada. By John Maclean, Ph.D. Illustrated.....	\$2 50
The Warden of the Plains. Stories of the Indians and Cowboys of the Canadian North-West. By John Maclean, Ph.D. Illustrated.....	1 25
Saddle, Sled and Snowshoe. By John McDougall. Illustrated	1 00
Walter Gibbs, the Young Boss. By E. W. Thomson. Illustrated	1 25
Around the Camp Fire. By Chas. G. D. Roberts. Illustrated	1 25
In the Days of the Canada Company. By Robina and K. M. Lizars. Illustrated.....	2 00
A Knight of the Nets. By Amelia E. Barr	1 00
Rural Rhymes and The Sheep Thief. By Eric Duncan (Comox, B.C.). Morocco paper covers	0 35
By Northern Lakes. By W. W. Walker. Illustrated ..	1 00
A Stormy Voyager. By Annie S. Swan. Illustrated	1 25
Mabel Gray and other Poems. By Lyman C. Smith ...	1 00
Overland to Cariboo. An Eventful Journey of 150 Cana- dian pioneers to the gold-fields of British Columbia in 1862. By Margaret McNaughton. Illustrated.....	1 00
Three Boys in the Wild North Land. By E. R. Young. Illustrated	1 25
Rhymes of the Kings and Queens of England. By Mary Leslie. With 117 illustrations. Cloth, \$1.00; half leather, gilt edges.....	1 50
Snap Shots from Boy Life. By F. C. Trench O'Hara. Illustrated	0 75

FOR SALE BY ALL BOOKSELLERS.

~~~~~  
**WILLIAM BRIGGS, Publisher**

29-33 Richmond Street West, - - - TORONTO.

MONTREAL: C. W. COATES.

HALIFAX: S. F. HUESTIS.

# WYLD, GRASETT & DARLING.

THA na marsantan mora so a' gleidh-  
eadh gach seors' aodaichean cotain,  
olla, sioda, etc., airson mhnathan agus  
fhear.

- - - ADDRESS - - -

**COR. WELLINGTON AND BAY STS., TORONTO.**

Canada's Great  
**INDUSTRIAL FAIR**  
AND Agricultural Exposition

Is held annually at  
the .....

**CITY OF TORONTO**  
**SEPTEMBER.**

during the first two  
weeks of .....

For all information relating thereto, address—

**J. J. WITHROW,**  
PRESIDENT.

**H. J. HILL,**  
MANAGER, TORONTO.

**WM. DAVID McPHERSON.**

**JOHN MURRAY CLARK.**  
*(Commissioner for Quebec.)*

**R. U. McPHERSON.**

**GEO. C. CAMPBELL**

**FRED. C. JARVIS**

**McPHERSON, CLARK, CAMPBELL & JARVIS,**

**Barristers, Solicitors, Etc.,**

OFFICES: 27 WELLINGTON STREET EAST,  
TORONTO, CANADA.

TELEPHONE No. 1334.

CABLE ADDRESS, "CLAPHER, TORONTO."

**ROAF, CURRY, GUNTHER & GREEN**

**Barristers, Etc.**

OFFICES, 23 ADELAIDE STREET EAST (COR. VICTORIA), TORONTO  
... Telephone 1506 ...

**WILLIAM ROAF.**  
**JAMES R. ROAF,**  
Commissioner for Quebec

**JAMES W. CURRY,**  
Crown Attorney for  
City of Toronto.

**ERNEST F. GUNTHER.**

# The Trusts Corporation of Ontario

## SAFE DEPOSIT VAULTS

Bank of Commerce Building . . .

. . . King St. West, Toronto

Authorized  
Capital . . . - **\$1,000,000**

President - - - HON. J. C. AIKINS, P.C.

Vice-Presidents - { HON. SIR R. J. CARTWRIGHT, K.C.M.G., P.C.  
HON. S. C. WOOD.

This Company acts as Administrator in the case of intestacy, or with will annexed, Executor, Trustee, Receiver, Committee of Lunatic, Guardian, Liquidator, Assignee, etc., etc.; also, an agent for the above offices.

All manner of trusts accepted; Moneys Invested; Estates Managed; Rents, Incomes, etc., collected; Bonds, Debentures, etc., issued and countersigned.

Deposit Safes to rent, all sizes. Parcels received of safe custody.

Solicitors placing business with the Corporation are retained in the professional care of same.

**A. E. PLUMMER, Manager.**

## CENTRAL CANADA LOAN AND SAVINGS COMPANY

HON. GEO. A. COX

*President*

OFFICE: 26 KING ST. EAST

CORNER VICTORIA STREET

|                                     |                                 |
|-------------------------------------|---------------------------------|
| CAPITAL SUBSCRIBED - \$2,500,000.00 | RESERVE FUND - - - \$335,000.00 |
| CAPITAL PAID-UP - - 1,250,000.00    | TOTAL ASSETS - - - 5,464,944.35 |

Deposits received. Debentures issued. Loans made in large or small sums on approved real estate security. Lowest rates.

**F. G. COX, Manager.**

**E. R. WOOD, Secretary.**

# ELIAS ROGERS AND CO.



# COAL AND WOOD

[ASSESSMENT SYSTEM.]

# Independent Order of Foresters.

The Best Fraternal Society in the World.



Has 105,000 Members.

Over \$2,035,000 Surplus.

More than \$4,200,000 paid in Benefits.

Costs from \$6.50 to \$12 to join the Order, according to the amount of Benefit taken.

RATES OF ASSESSMENT PER \$1,000.

ORDINARY CLASS.

| Age. | Per Month. | Per Year. | Age. | Per Month. | Per Year. |
|------|------------|-----------|------|------------|-----------|
| 18   | \$ .60     | \$7.20    | 37   | \$ .82     | \$ 9.84   |
| 19   | .61        | 7.32      | 38   | .84        | 10.08     |
| 20   | .62        | 7.44      | 39   | .86        | 10.32     |
| 21   | .63        | 7.56      | 40   | .90        | 10.80     |
| 22   | .64        | 7.68      | 41   | .95        | 11.40     |
| 23   | .65        | 7.80      | 42   | 1.00       | 12.00     |
| 24   | .66        | 7.92      | 43   | 1.10       | 13.20     |
| 25   | .67        | 8.04      | 44   | 1.20       | 14.40     |
| 26   | .68        | 8.16      | 45   | 1.30       | 15.60     |
| 27   | .69        | 8.28      | 46   | 1.40       | 16.80     |
| 28   | .70        | 8.40      | 47   | 1.60       | 19.20     |
| 29   | .71        | 8.52      | 48   | 1.90       | 22.80     |
| 30   | .72        | 8.64      | 49   | 2.20       | 26.40     |
| 31   | .73        | 8.76      | 50   | 2.50       | 30.00     |
| 32   | .74        | 8.88      | 51   | 2.60       | 31.20     |
| 33   | .75        | 9.00      | 52   | 2.70       | 32.40     |
| 34   | .76        | 9.12      | 53   | 2.85       | 34.20     |
| 35   | .78        | 9.36      | 54   | 3.00       | 36.00     |
| 36   | .80        | 9.60      |      |            |           |

In addition to the Social and Fraternal privileges of the Courtroom, the following Benefits are furnished to members during their lifetime : By the Subordinate Court : (1) Free Medical Attendance ; by the Supreme Court (2) Sick Benefit of \$3.00 a week for first two, and \$5.00 a week for ten following weeks of any one sickness, and, in special cases, \$3.00 a week for twelve additional weeks ; (3) Total and Permanent Disability Benefit of \$250, \$500, \$1,000, \$1,500, \$2,000 or \$2,500 ; and for Beneficiaries after the death of members (4) Funeral Benefit of \$50 ; (5) Mortuary Benefit of \$500, \$1,000, \$2,000, \$3,000, \$4,000 or \$5,000. Members who live to be seventy and over receive an Old Age Benefit by being relieved from the payment of mortuary assessments and capitation tax after completing the seventieth year of age.

## INVESTMENTS OF FUNDS.

The Supreme Court surplus funds are invested in (1) Dominion Stock, \$100,000 ; (2) Government Stock deposited in Great Britain, £20,000 ; (3) Debentures deposited in United States, \$50,000 ; (4) deposited with New Brunswick Government, \$20,000 ; (5) Municipal and other Debentures, \$93,170.64 ; (6) First Mortgages on Improved Property, \$1,429,930.62 ; (7) large current deposit accounts with the Molsons Bank of Canada and The National Bank in London, England.

For further information apply to

**ORONHYATEKHA, M.D., S.C.R.,**  
Toronto, Ont.

**JOHN A. MCGILLIVRAY, Q.C., S.S.,**  
Toronto, Ont.

Or any Officer or Member of the Order.

The Order does business throughout Canada, the United States north of Lat. 38°, and Great Britain and Ireland.

#  
E  
6.



